

ساڈیاں کتاباں

پشتو ادب	گلوک	وحدت الوجود تے پنجابی شاعری
گلزار سستی	نکر دے پھل	بول تے تول
تکھیاں سولاں	پہاج	کن لیکھا
پنجاب دے لچال پتر	چکر رنگی مورتی	آکھیا بابا فرید نے
جنگ نامہ امام حسین	تائی	ہیر دمودر
دیس پردیس	ٹٹ بھج	گلیات لالی
ٹیکسلا	بار دے گیت	کھند اسائیں
چونویں انشائیے	کنیں بندے	ہیر چراغ اعوان
پنجابی ادب دی کہانی	بار دے ڈھولے	پنج تارے
قائد اعظم سوچ تے سیاست	رکھتاں ہرے بھرے	ملتان مرثیہ
جٹ دی کرتوت	جھٹھے پھلاں دی ٹھنڈی چھاں	احسن القصص
مڈھلی لفظالی	بول مٹی دیا بویا	اکبر کہانیاں
آکھیا بھے شاہ نے	جزیرہ	چرخے دی موت
آکھیا خواجہ فرید نے	شام رنگی کڑی	قصہ کہانی
آکھیا شاہ حسین نے	بوہا کوئی نہ	ڈونگھیاں شاماں
آکھیا میاں جوگی نے	لہو سہاگ	چنے دے اوہلے
آکھیا پگل سرمست نے	آزادی نگروں پنجابی ادب	سیتیاں اکھاں والے
آکھیا بابا فرید نے	نکھیرے	مٹی اُتے لیک
	گوجری ادب	شہر تے سُننے
		چونویں کہانی

14 الا کو مینشن پٹیالہ گراؤنڈ لاہور۔

042-7220962

پاکستان پنجابی ادبی بورڈ

کالیان
لالہ
کالے

الزحی

کالیاں اٹاں کالے روڑ

انور علی

پاکستان پنجابی ادبی بورڈ، لاہور

ISBN: 969-411-099-8

مل ورتن پنجاب سرکار تے اکادمی ادبیات، اسلام آباد

اوس نکے جیسے ننگے پیریں منڈے
دے ناں

جیہڑا بڑی دیر تیکر بھٹیاں تے کولیاں وچوں نکلیاں
آتشبازیاں نوں ویکھدار ہیا۔ پر جدوں بھائی دودو آنے بھٹے
دارولا پایا تے رُس کے چلا گیا۔

جنوری 1988ء

مارچ 2009ء

التمش کمپوزنگ سنٹر اردو بازار، لاہور

120/- روپے

پہلی وار

دو جی وار

کمپوزنگ

مل

ترتیب

۷	☆ کارٹون توں کہانی تیک	شفقت تنویر مرزا
۱۳	☆ ہیرا پھیری	
۱۸	-۱ گڑدی بھلی	
۲۵	-۲ ٹوں عید کتھے پڑھی؟	
۳۲	-۳ سائیکل دافریم	
۴۰	-۴ طوطے	
۴۷	-۵ امریکہ وچ	
۵۶	-۶ چٹھا چوڑکا	
۷۰	-۷ شاہکار کہانی	
۷۸	-۸ ہیر	
۸۷	-۹ اسلم	
۹۵	-۱۰ ہمزاد	
۱۰۳	-۱۱ موتی	
۱۱۷	-۱۲ چھٹی	
۱۲۸	-۱۳ کالیاں اٹاں کالے روڑ	

کارٹون توں کہانی تیک

”جدوں وی سرکارنوں انصاف داڈر پیا اوہناں اک مارشل لاء ریگولشن ہوو
لا دتی ایس طرح پتہ نہیں سرکارنوں کئے درجناں ریگولیشناں گھڑنیاں پیاں جدوں
ریگولیشنیاں دیاں اٹاں روڑیاں انصاف دے کل بوہے بند کر دتے تے اوہ بھائی
مرگیا۔“

انصاف منگدا تے مارشل لاء دے اٹاں روڑے کھاندا بھائی مرگیا اے۔
بندے نیاں نہ کر سکے سنگیاں تے بندو قان انصاف نہ کر سکیاں۔ گیت کہانیاں
نظمیں تے تقریراں تے پرچیاں انصاف نہ کر سکیاں۔ گیت کہانیاں نظمیں تے
تقریراں تے پرچیاں انصاف دی منزل یزے نہ لیا سکیاں تے برچھیاں نکل آیاں
ایہناں توں کون بچیا تے کون انصاف جھولی پاوے گا ایہہ بعد دی گل اے اوہ بھائی
تے مرگیا اے۔ اوہ بھائی جس دے بارے انور نے کہانیاں لکھیاں تے انصاف
دی منگ کیتی اوہ انور دیاں کہانیاں مجموعے دی صورت چھپن توں پہلاں ای مرگیا
اے اساں سبھناں نے مل کر اوہنوں مار دتا اے انور دیاں کہانیاں دے ہیرو نوں

موت آگئی تے اج ویہویں صدی دے بہتر ویں سال دے پہلے دیہاڑے مینوں ایہناں دی کہانیاں بارے گل کرنی پئی اے ایس مجموعے بارے گل کرنی پئی اے جو اج توں بہت پہلاں پورا ہو چکیا اے تے میں ایہناں بارے گل کرن توں سنگدار ہیا سنگن دے کئے ای سبب نیں پر مینوں جا پدا اے جیوں اصل سبب ویلاسی ویلا جیہڑا اپنے کم کاریں رجھیاں بندیاں کول نہیں ہوند او ویلا جیہڑا تاریخ دے فیصلے لکھی آرہیا اے ویلا جس پاکستان بارے ایک فیصلہ لکھ دتا ویلا جس اندر ایہہ کہانیاں لکھیاں چھپیاں تے صلاحیاں گئیاں۔

انور دیاں کہانیاں ہمیشہ ۴۷ء دے آ لے دوالے توں شروع ہوندیاں نیں تے اوس دیہاڑے اتے آ کے مک جاندیاں نیں جس بارے انور آپی لکھدا اے :-

اوس دن وی مینوں انج لگا جیویں میں اوسی ہنیر گھپ بن بوہے گول کمرے وچ دڑیاں ہاں تے چھڑیاں دے ہا سے تے چیکاں ایس ہنیرے دیاں کالیاں کندھاں نال ٹکراں مار دیاں میرے چار چو فیروں لنگھ دیاں نیں جدوں ایہہ چیکاں ہاسیاں داتا نا بانا کیسا جاندا تے میرا ساہ گھٹیا جاندا اوس ویلے میں چیکاں مار کے جاگ پیندا۔

ایہہ پاکستان دا قیامت والا دیہاڑا نہیں۔ اوس توں پہلاں چووی ورہے دا ہر دیہاڑا اے ایہہ گھپ ہنیرا تے بن بوہے والا گول کمرہ اوس دن خاص طور تے ہو روی ڈراؤنا ہو گیا جدوں خاکی وردیاں تے وڈے بوٹاں والیاں انور دے دفتر وچ ہتھکڑیاں نوں انج کھڑکایا جیویں ایہہ وکاؤ مال ہووے۔ پتہ نہیں کس سرکار نوں مخبری کیتی سی جے ایس اخبار دے دفتر وچ اسلحہ تیار ہوندا اے۔

لدھیانے دارہن والا کالجوں نکل کر شلے دے کسے دفتر وچ کلرکی کرن توں

کلرکی توں پاکستان ٹائمز دا اکارٹونسٹ بنن والا کارٹوناں راہیں اپنے ہیرو اپنے ملک دی ہر روز گل کرن والا انور کارٹونسٹ توں کہانی کار کس طرح بن گیا..... کہانی وی پنجابی وچ..... ایہہ سارا پینڈا..... کارٹون توں کہانی دا پینڈا اظہار دا اک بہرواں وسیلہ تے اوس وسیلے راہیں پورے ملک وچ شہرت حاصل کر کے انور نے کہانی کیوں لکھنی شروع کیتی؟ ایہہ دے راہیں اوہنوں شہرت نہیں ملی الٹا کچھ لوک ننھے دے انور نوں جاہلاں دی زبان اندر کہانیاں پاؤندے دیکھ کے شرما گئے کچھ غصہ کھا گئے ایس طبقے اندر اوہدی شہرت نوں نقصان ای اپڑیا ہونا اے۔ کہانی راہیں کوئی دولت وی تے نہیں ملدی، کہانی فرمائش اتے وی لکھی جاندی اے ریڈیو یا کسی رسالے دی فرمائش اتے پر انور دیاں کہانیاں تے فرمائشی وی نہیں اوہنے ایہہ کم نہ شہرت لئی نہ دولت لئی نہ فرمائش پوری کرن لئی کیتا اوہ آپی اک جگہ لکھدا اے:

”کہانیاں لکھن وچ پیدا ہوندى تے میں زراعت دے محکمے

وچ کلرکی کیوں کردا ایہہ تے رب دی ماراے، کسے پیر فقیر دی

بد دعا اے کہ بند لکھاری بن جاندا اے۔“

ایہہ رب دی مار ۵۸ء دے مگروں ایس ملک نوں پئی تے انور جو اپنے کارٹوناں راہیں اپنے دل دیاں گلاں کر لیندا سی اپنے دل دیاں گلاں دو جیاں نوں سالیندا سی دو جیاں نوں اپنے بھید دی سانجھ تے لیا کے اوہناں نوں نال ٹور لیندا سی اوہو کارٹون ہن اوہدے دل دی پوری گل نہیں سن کر سکدے یا اوہ سمجھ داسی پئی جو لکیراں اوس ۴۰ء نوں لکیرنیاں شروع کیتیاں نیں اوہناں داتا نا پینڈا ای الٹیا گیا اے جو کہانی اوس چھوہی سی اوہدی تاں اگلیاں تنداں توڑ دتی اے تے فیر انور ننھے دی شکل بناندیاں بناندیاں اپنے اندر والے ننھے دیاں کہانیاں لکھن لگ پیا۔ اوہ ننھا

جو طوطا لے کے لدھیانے توں چلیا سی تے والٹن دے کمپ وچ آلتھاسی اوہ ننھا جس
کلا نور دے مولوی احمد دین تے سائیں جمالے نوں اپنے اصل رنگ وچ تکیا اوہ
ننھے احمد دین نوں ایس ڈی ایم نقوی تے سائیں جمالے نوں سید جمال الدین
بخاری آف ٹیہ گلاب سنگھ شریف دے روپ وچ ویکھیا جد اوس ننھے اتے مارشل لاء
ریگولیشن دی تلوار لٹک گئی اوہدی دراز وچوں بمب لمھن دی کھچل کیتی گئی اوہناں کہیا
گیا سائیں جمالے نوں سائیں جمال نہ آکھو سید جمال الدین بخاری آکھوتے فیر
انور دا قلم ننھے دیاں اوہ کھچیاں لکیراں نوں پورا کرن لئی اکھراں دے مہاندے
گھرن لگ پیا بھانویں اوہنوں اک واری نہیں کئی واری ایہہ سوچ آؤندی اے:
”تیرتھ رام دا گھڑا، فضل دا گھڑا، کمہاراں دی کڑی نہیں کہانی
والی گل نہیں۔“

ایہہ خیال ہوندیاں وی انور ہولی ہولی اپنے پو لے پو لے انداز وچ لوہار
والیاں شاں ماردار ہیا اوہنوں ایہہ خیال نہیں سی بی جو اوہ لکھ رہیا اے ایہہ کہانی
اے یار پورتا تھیا کجھ وی نہیں اوہ کسے سچے وچ آؤندی ای نہیں اوہ لکھدار ہیا چودہ
پندرہ کہانیاں اوس نے اوس زمانے وچ لکھیاں جد ملک اتے اوہناں داراج سی
جہاں ایہہ ملک نہیں سی بنایا جہاں ایہہ ملک بنایا کھوہ لیا تے کالے قانون تے
مارشل لاء ریگولیشن راہیں ایس ملک ایس پو، بھرا، ماں، بہن..... نوں ٹوٹے
ٹوٹے کردتا۔

”پاکستان دا جی این پی ودھ کے کتھوں دا کتھے جا پڑیا میں اپنی جوان دھی ول
دیکھیا تے میریاں انگلاں میتھوں پچھیاں بناں ای میری جیب وچ پئے ٹیڈی پیسے
گنن لگ پیاں۔“

جی این پی ودھ رہیا سی انور دیاں انگلاں جی این پی دی نبض اتے سن جی این
پی تے ٹیڈی پیسیاں دی ایہہ کہانی لکھن دا عذاب انور دے گل پیا، کیوں؟
”جدوں ایہہ چیکاں ہاسیاں دا تانا بانا کیا جانداتے میرا ساہ گھٹیا جاند اوس
دے پے میں چیکاں مار کے جاگ پینداتے ماں میری مینوں چھاتی نال لا کے واری
واری ہاندی۔“

ماں تے پچھنے وچ واری واری جاندی اے جدوں بندہ دنیا دی بھیڑ وچ
ہاؤں دا اے اودوں اوہدے اتے ایہہ وی پچھدی اے پئی اوہ اماں اماں تے کر سکے
چھاتی نال لا کے واری واری جان والی ماں کوئی نہ ہووے تے فیر بندہ ہر حیلہ کر
گزر دا اے ماں نوں لمھن والا ماں دا حال پچھانن والا انور نے ماں نوں لمھن ماں
توں پچھانن تے ماں نوں دشمنان دی قید توں آزاد کراؤن لئی کارٹون دا وی حیلہ
درجاتے کہانی دا وی ایہدے نال نال اوہنوں آل دوالے دیاں کالیاں کندھاں دا
دی احساس اے۔

”کمہاراں دی کڑی، گھڑے، بھٹیاں والے، پٹری دیاں اٹاں، مینوں پتہ
اے اکھ والیاں کہنا اے کہ ایہہ اٹاں روڑ کیہہ اکٹھے کر چھڈے نیں اٹاں روڑاں
نال کدی کہانی بنی اے..... میرے کول ایہی اٹاں روڑ نیں ایہہ میں آپ نہیں
گھڑے جیہڑی مینوں کل اٹ وانگوں و جی میں اوہنوں چک کے جھولی وچ پالیا تے
جیہڑا روڑ مینوں چھیا اوہنوں اکھاں نال لالیا۔“

انور دے ایہہ اٹاں روڑ اوس پاکستان بارے تے اوس پاکستان دے نیں جو
۱۱ اگست ۱۹۴۷ نوں دنیا دے نقشے اتے ابھریا۔ ایس پاکستان دے نال ایہہ ہمزاد
لگا رہیا ایس ہمزاد بارے انور نے اپنے سچے سبھا نال گلاں کیتیاں نیں تے انج

کیتیاں نیں جیویں امریکہ دسدے اک یار دے ناں چھٹی وچ سب کچھ کہہ کے وی
اوہ اخیر وچ لکھدا اے:

”ہاں جوگی توں پچھیا سی جے پاکستان دا کیہہ حال اے دیکھ

گل ایویں ای لمی ہوگئی اے تے میرے کول ہور ٹکٹاں لئی پیسے

نہیں اگلی چھٹی وچ ضرورتیوں پاکستان بارے لکھاں گا۔“

انوردی ایہہ چھٹی ایہہ کتاب تھاڈے ناں اے تسیں آپے

ای ایہنوں کھولو پڑھو تے ایہد انیاں کرو۔

یکم جنوری ۷۷ء

(شفقت تنویر مرزا)

لاہور

ہیرا پھیری

جدوں توں میں کہانیاں لکھیاں شروع کیتیاں میری مائی تے نیا نے بڑے
ٹوش نیں۔ ایس توں پہلوں میں ہمیش اوہناں نوں کھاؤن وڈھن نوں پیندا ساں
اکش توں میرا مطلب اے ۱۸ اکتوبر ۱۹۵۸ء دے بعد توں۔ ۱۸ اکتوبر ۵۸ء دی
سورے جدوں میں اخبار اتے نظر ماری تے پہلی نظرے ای انج اٹھ کے بیٹھ گیا
توہیں ادھی راتیں کوئی ڈاکو بندو قاس پستولاں پھڑی تھاڈے گھر آوڑے تے
تھاڈے ہتھ اپنے کرا دیوے۔ اللہ مغفرت کرے سکندر مرزا ہوراں دی اوس دن
اوہناں پاکستان اتے مارشل لاء لا دتاسی۔ شامیں میرے گوانڈھی مینوں آواز دتی
تے کہن لکيا۔ ”انور! ساڈیاں عمراں تے گل گئیاں۔“ پر سبھ توں پہلے مارشل لاء نے
سکندر مرزا نوں ای پاکستان نوں کڈھیا تے میں بڑا خوش ہو یا پھیر میں ایہہ سوچن لگ
پیا کہ سکندر مرزا نوں دیس نکالا دین والیاں اوہدے نال مندا کیتیا چنگا۔ پر میرے
کارٹون بنان والے ہتھ میرے پچھے بنھے گئے سن تے اگے گھپ ہیرا سی جدوں
میریاں سوچاں اپنے ہڈی دے حوالات دیاں کندھاں نال سر مار دیاں تے میرے

سروچ جندرے کھڑکدے تے میں اپنی مائی تے نیانیاں نوں کھاؤن وڈھن نوں پیندا راتاں میریاں جاگدیاں لنگھدیاں اوس ڈاکو نوں اڈیک دیاں جیہڑا میرے ہتھ اچے کرا کے ٹر گیا سی ہن جد تیکر حکم نہ ہووے میں ہتھ نیویں کیویں کراں۔ ڈاکٹر میرے کہیا توں ایویں ای اوکھا پیا ایں تے اپنی جند دا آپوں ویری۔ گھوڑیاں اتے شرطاں لان لیء میرے کول پیسے نہیں سن، نہ ای تاش کھیڈن جوگے تے میں کہانیاں لکھنیاں شروع کر دتیاں۔ ڈاکٹر ٹھیک کہیا سی میری اپنے ٹبر نال کھاؤں وڈھوں گھٹ گئی پر ایہہ کہانیاں لکھن والا دارو اپنی تھاں سر پیڑ بن گیا کیہ لکھاں؟ کس بارے لکھاں؟ ہن مینوں سمجھ پئی کہ کہانیاں لکھنا تے بڑا ای اوکھا کم اے ایس توں پہلوں میں سمجھداساں کہ ایہہ کہانی کاراک اوت جیسے لوکی نیں۔ جیہناں نوں نائیاں نال ویراے تے کم چوراں دا چاء دیاں دکاناں اتے ودھ جی لگدا اے پر ہن میں ایہناں دی بڑی عزت کرداواں۔

سوچیا کہ کہانی تے بڑی نکى جئی شے ہندی اے ناول کیوں نہ لکھیا جاوے۔ اک دو سال تے لنگھ جاؤن لکھدیاں رب جانے اک دو سال بعد ویلا سوکھا آ جاوے یا میرے ای ڈکھ ڈکھ جان۔

میں اک ناول دا ڈھانچہ جیہا کھڑا کیتا تے کجھ بیلیاں نوں اکٹھیاں کر کے سنایا۔ اوہناں بڑیاں تعریفاں کیتیاں تے کہن لگے بڑی ودھیا کہانی اے۔ میں کہیا ”کیہڑی کہانی؟ ایہہ تے اک ناول دا ڈھانچہ اے۔“ ایس گل تے اوہ اینا ہسے کہ ”گو انڈھی ساڈی خیر سکھ پچھن لئی ساڈے بوہے بھن لگ پئے۔ میں سوچیا چلو کہانی تے کہانی سہی ہوراں دی رائے وی پچھ لئی جاوے۔ تے میں ایہہ کہانی کٹ وڈھ کے سنگت دی ایک میننگ وچ جا پڑھی۔ تیں پچھو گے کٹ وڈھ کے کیوں؟ ایہہ

سوال تے بڑا سدھاتے صاف اے پر ایہہ اجواب اونا ای اوکھاتے دل پھیر والا۔ گل ایہہ کہ تیں اک کہانی حضرت آدم علیہ اسلام توں شروع کر لوو تے اکھاں میٹی ٹردے جاوؤ۔ پر جد تیں ۱۸ اکتوبر ۱۹۵۸ء تے اپڑدے اوتے اگے پھاٹک بند ہوندا اے تے کہانی نوں ڈکالگ جاندا اے جے کرتیں پھاٹک ٹپ کے اپنے ماس تے ہڈیاں نال اک پنجاہ میل گھنٹے والی ریل گڈی نوں روکنا چاہو تے ایہہ تہاڈی اپنی مرضی اے۔ ایہہ کہانی میں صرف اپنے بیلیاں نوں سان لئی لکھی سی سنگت دی میننگ وچ پڑھن لئی نہیں۔ کہانی ۱۸ اکتوبر ۵۸ء توں اگے دا حصہ میں کٹ وڈھ کے اہدی تھاں گھاہ پھوس بھردتا تے اپروں رنگ روغن کردتا ہن گاؤ تکیے نوں ای لئے لوو۔ ایہہ اے اتے مخمل، ساٹن تے ہور طرح طرح دے ملائم تے رنگدار کپڑے چڑھا کے ایہوں اپنیاں پیٹھکاں وچ سجانداے نیں تے اپنے سکھ آرام لئی ورتدے وی نیں پر کدی کسے ایہوں کھول کے ایہہ اندر بھریا لوگڑ نہیں تکیا۔ پر سنگت دیاں پیٹھکاں تے آون والے بندے کجھ دکھای نیں۔ مینوں جا پدا اے کہ ایہناں وچوں ودھ اجیسے نیں جیہناں نوں یا تاں نکے ہوندیاں بہتی کٹ پیندی رہی اے یا ایہناں دیاں مائیاں ایہناں نوں گھروچ جیون نہیں دیندیاں۔ تے ایہہ اپنا غصہ کڈھن لئی ایک پورا اٹھوارا پتہ نہیں کس طرح لنگھاندے نیں۔ ایہہ میری کہانی دے ۱۸ اکتوبر ۵۸ء توں پہلے دے حصے نوں تے دواک چنگے اکھراں نال گول کر گئے۔ پر اوس توں بعد۔ اوس توں بعد ایہناں نے بوٹ لاہ لے۔

گھر آ کے میں مڑا ایس کہانی نوں ایہدی پہلی تے اصلی شکل وچ جوڑ کے رکھ لیا تے سوچیا جے کر چنگا ویلا آیا تاں ایس نوں چھوادی لواں گا۔ ایہہ میری پہلی کہانی سی رب سچے کرم کیتا تے اج ایس کتاب دی پہلی کہانی ایہی ”گڑدی بھیلی“ اے۔

ایس کہانیوں بعد میں پھیر سوچیں پے گیا۔ گل ایہہ کے بال بچیاں والے
 بندے نوں ہر کم چوکی سوچ و چاروں بعد ای کرنا چاہیدا اے۔ کولہو وچ سردینا تے
 ڈاکٹر نے نہیں دسیا۔ اوہنے تاں مینوں کہانیاں لکھن لئی کہیا سی۔ کہانیاں بندے نوں
 سولی اتے وی لٹکا دیندیاں نیں۔ تے کہانیاں گنؤ قسم دیاں وی ہوندیاں نیں۔ گنؤ قسم
 توں میرا مطلب اے ایہی چڑیاں، کانواں، کتیاں، بلیاں دیاں کہانیاں جیہناں
 نوں ۱۸ اکتوبر ۵۸ء نال لکھ فرق نیں پیندا۔ یا پھیر اجیہاں کہانیاں جیہڑیاں ایس
 کالی تاریخ توں پہلے ای مک جاوے۔ مکدی گل ایہہ کہ بیت گئے ویلے دیاں گلاں
 کرواتے ہن نوں اودوں تیکر ہتھ نہ لاؤ و جدوں تیکر ہن بیت گیا ویلا نہ بن جاوے۔
 میں طوطیاں کتیاں تے مکھیاں بارے کہانیاں لکھیاں بیت گئے ویلے دیاں گلاں
 کتیاں تے ویلا چنگا لنگھدا گیا۔ پر ہولی ہولی میریاں جند رے ماریاں سوچاں
 چوراں پیریں میریاں کہانیاں راہیں باہر آؤن لگ پیاں ایہہ فکر والی گل سی تے اک
 دن سنگت دی بیٹھکوں بعد جد راجہ رسالو نے اگلے اتوار لئی کہانی پا پچھیا تے میں اپنا
 ناں لکھادتا۔ تے نال ای کہیا ”راجیا! ایہہ میری آخری کہانی اے۔ ایس توں بعد
 کہانی لکھاں تے جو حال چوردا سو میرا“ اج کل مینوں ایہناں کہانیاں دی لکھائی
 چھپوائی نے ڈاڈا وخت پایا ہویا اے تے ایس روئے وچ جند ریاں دے کھر کے
 مینوں سنائی نہیں دیندے۔ ایہہ کتاب جس دن چھپ گئی او سے دیہاڑے میں ڈاکٹر
 کول پھیر جاواں گا۔

انور علی

۱۱ نومبر ۱۹۷۰ء

ہاں تے

ایہناں کہانیاں وچوں گجھ اجیاں نیں، جیہڑیاں، امروز وچ چھپیاں کجھ ریڈیو
 اتے پڑھیاں کہیاں تے اک ٹی وی اتے کھیڈی گئی۔
 جس لئی میں امروز ریڈیو پاکستان تے پاکستان ٹیلی ویژن کارپوریشن دا
 احسان مند ہاں۔

دوجی گل

ایہناں کہانیاں وچ کل بندیاں، جانوراں، تے تھانواں دے ناں میں آپوں
 کھڑے نیں، کوئی صاحب اپنے ناں نال لان دی کوشش نہ فرمان۔

بھل چک معاف

میریاں تے کتابت دیاں غلطیاں

آپوں ٹھیک کر دے جاناں۔

گڑدی بھیلی

مولوی احمد دین کلا نوری محلے دی مسیت وچ اپنے ساڈے تیراں نمازیاں
اکے مُشرکاں تے قبر پرستاں دی ایسی تیسی پھیر رہیا سی۔ تے موقع محل ایس وعظ دا
سی سائیں جمالے دالنگر۔ لنگر سائیں جمالے داوی نہیں سی۔ اصل وچ خلیفہ مام دین
نے اپنے گھر پتر ہون اُتے نیاز دتی سی تے مکوڑے شاہ دے مزار اُتے دیگاں
چڑھائیاں سن۔ سائیں جمالے تے بچارا مزار دادربان سی۔

سائیں جمالے دی کل کائنات دو کوٹھڑیاں تے اک نکا جیہا ویہڑا سی۔ اک
کوٹھڑی وچ اہدا کولہو لکھا سی۔ ایہہ اوہدا کارخانہ دکان تے گودام سبھ کجھ سی۔ دوجی
کوٹھڑی اوہدا گھر جس وچ جمالا، اوہدی بیوی، دو پتر تے اک کاکی رہندے سن، رہ
گیا ویہڑا، ویہڑے دے باسی سن مکوڑے، گہرے بھورے رنگ دے موٹے موٹے
سراں والے نکے نکے مکوڑے۔ ایہہ فجرے فجرے اپنی کھڈوں نکل کھڑے ہوندے
تے گھر دے کونے کونے وچ پھیل جاندے تے ہر شے تے ہر جی نوں مونہہ مار
دے۔ گوانڈھناں گوانڈھی جمالے دے گھر جان توں ڈردے جمالے تے اوہدی

بیوی سوکارن کیچے پر مکوڑیاں اگے اک نہ چلی۔ ایہہ اک کھڈ بند کر دے اوہ دس
کھڈاں ہو رکڈھ لیندے۔ ایہہ دوائیاں چھڑکدے تے ایہناں دے اپنے نیانے
بیار پے جاندے تے مکوڑیاں دے دند ہو رتیز ہو جاندے۔ محلے دے بڈھیاں دا
کہنا سی کہ جس تھاں جمالے دا مکان اے او تھے کسے ویلے قبرستان ہوندا سی تے
ایہہ مکوڑے مکوڑے نہیں با بے سن۔ جمالا بڈھیاں بابیاں نوں نہیں سی مند پر مکوڑیاں
دے ہتھوں تنگ آکے اوہنے تے اہدے ٹہرنے مکوڑیاں نال سمجھوتا کر لیا۔ اوہناں
اپنی بچی بچی روٹی تے مٹی ملی کھل کھڈ کول پاوئی شروع کردتی۔ ہن مکوڑیاں نوں اپنی
دال روٹی لئی دور نہ جانا پیا تے باقی دا گھر بچیا رہیا۔ ایس سمجھوتے ایس اک گھر
دے دو طرح دے باسیاں نوں اک دوجے دی عزت کرنی تے مل جل کے رہنا سکھا
دتا۔ ہن بے کوئی بابا اپنے بھون توں بھٹک کے دوروی چلیا جانداتے چلدے پیر
رک جاندے تاں بے بابا اپنی راہ چلدا رہوے۔ اوہدھر بابیاں بندیاں نوں وڈھنا
بند کردتا گوانڈھی گوانڈھناں مڑ جمالے دے گھر آن جان لگ پیاں تے جمالے
دے تیل تے کھل دی وکری ودھ گئی اک دن جمالا دس من سرہوں منڈیوں لیایا
دو بے دن بابیاں دی برکت نال برطانیہ نے ہٹلرنوں جنگ دا الٹی میٹم دے دتا۔
پھیر کہہ سی جمالے دی دس من سرہوں دس من سونا بن گئی اوس دن جمالے بڑی
عقیدت نال بابیاں دے کھڈاں بھیلی گڑ دی چڑھائی۔ محلے وچ ایہہ خبر پھیل گئی کہ
بابیاں جمالے نوں برکت بخشی۔ جمالے نوں بشارتاں ہون لگ پیاں محلے دیاں
تنبویاں بابیاں نوں گڑ چڑھانا شروع کردتا کسے دا بچہ بیمار ہووے کسے دی سس نال
لائی ہووے سبھ آکے بابیاں نوں گڑ چڑھاوندیاں تے سائیں جمالا اوہناں لئی
دعاواں تے گنڈے تعویذ کردیندا۔

سائیں جمالے بابیاں دی کھڈا تے اک چھوٹا جیہا چھپر پادتا تے ہر جمعرات
 اوتھے دیو ابلدا۔ لوکی اوتھے تیل پھل پتاشے تے دوپٹے چڑھان لگ پئے۔ سائیں
 جمالا ساری رات ریاضت کردیاں دے کولہو نہ چلا سکدا۔ پھیراک رات اوہنوں
 بشارت ہوئی تے اوہنے کولہو چکا دتا۔ بلد وچ دتا کوٹھڑی نوں حجرہ بنا لیتا تے اپنے
 پتراں نوں چوڑے بازار وچ دوپٹیاں دی ہٹی پادتی ایہہ اوہناں دناں دی گل اے
 جے خلیفہ مام دین دی جوان بیوی نوں اک پتر دی لوڑ پے گئی۔ خلیفہ دی پہلی بیوی
 توں اولاد جوان سی پر نوران نوں بچہ نہیں سی ہوندا تے خلیفہ دی چنگی چوکی جائیداد
 سی۔ نوران سائیں جمالے نوں اپنی پتاسنائی سائیں ہوران نوران نوں دسیا کہ
 خاندن عورت دے سرداتا ج ہوندا اے تے اوہدی اجازت توں بناں کسے دربار وچ
 رسائی نہیں ہوندی اگلی جمعرات خلیفہ مام دین نوران نوں لے کے سائیں جمالے
 کول حاضر ہو گیا تے نال دوکا لے لکڑ سوا سیر گھبوتے پنج سیر مٹھائی وی نذر کیتی نوران
 چالی دن تے چالی راتاں حجرے اندر وظیفہ کیتا۔ بابیاں نوران دی سن لئی تے
 اوہنوں اک جن جیہا پتر دتا۔ اوس بختاوردن خلیفہ مام دین نے بابا مکوڑے شاہ
 دے مزار تے دیگاں چڑھائیاں تے اوسے دن مولوی احمد دین کلا نوری نے قبر
 پرستی تے شرک بارے جمعیت وچ وعظ کیتی۔

پر جیہناں اتے بابا مکوڑے شاہ مہربان ہووے اوہناں نوں دشمنان سیاہ
 سینیاں توں کیہہ ڈر۔ رب سچے سائیں جمالے نوں ہور عزت بخشی اہدار تہہ ودھا کے
 سید جمال الدین شاہ بخاری کردتا تے بابا مکوڑے شاہ دامزار حضرت شاہ داڈیرہ بن
 گیا سید جمال الدین شاہ بخاری تے اوہناں دی آل مبارک اپنی نویں حویلی آستانہ
 شاہ وچ چلے گئے تے حضرت شاہ داڈیرہ پہلے کولوں ودھ آباد ہو گیا۔

ڈیرے نوں مڑ کے بنایا گیا۔ گنبداں محراباں نال سجایا گیا۔ سرکار عالیہ نے شاہ
 صاحب نوں خان بہادر دا خطاب دتا تے ڈپٹی کمشنر سمٹھ صاحب بہادر نے آل شاہ
 نوں دورا شن ڈپوالات کردتے۔ ہن چڑھاوے دے صندوق نال ایک صندوقچی
 ہوروی رکھی گئی جیہدے اتے لکھیا سی وار فنڈ اک دن ضلع کانگرس دے صدر سیٹھ
 چمن داس ننگے پیریں آکے ڈیرے سلام کیتا تے حضرت شاہ ہوران دے چرناں
 نوں ہتھ لائے اوس توں بعد اوہ ہر جمعراتیں ڈیرے سلامی دیندا حضرت شاہ ہوران
 دیاں نیکیاں کرامتاں دیاں تعریفاں کردا تے ہندواں تے مسلمانوں نوں بھراواں
 داگوں رہن دی نصیحت کردا۔ اوہناں ای دناں ضلع مسلم لیگ دے صدر خان غیاث
 الدین خان تے مجلس احرار دے صدر مولانا ثناء اللہ انصاری نوں وی باری باری
 بشارتاں ہوئیاں تے اوہناں وی باری باری حضرت شاہ ہوران دے ہتھ تے بیعت
 کیتی ہن ڈیرے تے حاجت منداں دی بھیڑ ہون لگ پئی تے حضرت شاہ ہوران
 لئی کل سرکاری تے غیر سرکاری اکٹھاں اتے جانا ضروری ہو گیا۔ ڈیرے دی رونق
 ودھدی گئی تے حضرت شاہ دے مرا تے بلند ہوندے گئے۔

پھیر کر نارب دا کہ پاکستان بن گیا۔ حضرت شاہ ہوران نوں شیطان دھوکے
 وچ رکھیا تے لدھیانہ پاکستان وچ نہ آیا حضرت شاہ ہوران نوں ہجرت دا حکم ہویا۔
 پاکستان آکے اوہ ہر ویلے روندے رہندے۔ صاحبزادیاں اوہناں نوں بڑا سمجھایا
 کہ پندراں سیر سونا کیہ شے ہوندی اے پر حضرت شاہ دے اتھرو نہ رکدے۔
 اوہناں نوں تاں ڈیرے دی جدائی دا گھن لگ گیا سی۔ ہولی ہولی مریداں نوں پتا
 لگیا تے اوہ والٹن کیمپ حضرت شاہ ہوران کول پہنچے مریداں نوں مل کے حضرت شاہ
 شاد ہوئے۔ اک رات بشارت ہوئی تے حضرت شاہ صاحبزادیاں، بی بی پاک تے

مائی پاک نوں میاں منیر احمد لدھیانوی بی اے ایل ایل بی ایڈ وکیٹ دی کوٹھی چھڈ
کے آپوں ٹبہ گلاب سنگھ چلے گئے۔ بے دا پٹواری آپ دے نال سی ڈیرے دی
جدائی دے ضعف باعث آپ کھوٹے تے پورا بھار پا کے چلدے اک تھاں کھوٹا
شریف زمین وچ کھب گیا۔ آپ نے وی او تھے ای تشریف رکھ دتی۔ پنڈ والیاں
کھڑیاں کھڑیاں اک چھپر کھڑا کر دتا منجیاں بستر آگئے تے نوکرانیاں حضرت شاہ
دیاں مٹھیاں بھرن لگ پیاں اگلے دن تحصیلدار آیا آپ دے پیر پھڑ کے رون لگ
پیا اوہ وی آپ دامریدی۔ ایہہ زمین اک سردار پر تاپ سنگھ چھڈ گیا سی۔ کل
پندراں سو کھلے ایس دی الاٹ منٹ تے ہی رب دے شکر گزار ہوئے۔ ٹبہ گلاب
سنگھ دے دن پھر گئے حضرت شاہ دے ڈیرے ٹبہ گلاب سنگھ نوں ٹبہ شریف بنا دتا۔
مریداں نوں بے شریف دی خبر اپڑی تے اوہ ڈیرے حاضری دین لگے ڈیرے
دے طفیل اوہ مڑ گھراں زمیناں دے مالک بنے اوہ وی ٹبہ شریف دے آلے
دوالے۔ جیہناں دے دلاں وچ شک دی سیاہی سی اوہ خوار ہوئے تے ڈیرے دا
جلال وودھدا گیا۔ حضرت شاہ دی بزرگی دی شہرت دور دور تک اپڑی تے پاکستان
دے کونے کونے توں امیر غریب فیضیاب ہون لئی بے شریف آن لگے۔

کرنا خدادا، جدوں مثقلیاں دی باری آئی تے حضرت شاہ دیاں جمع بندیاں
مشرقی پنجاب توں نہ آئیاں۔ ڈپٹی کمشنر بے حد کوششاں کیتیاں پر پر تاپ سنگھ دے
پندراں سو کھلے اک اے ڈی ایس ایم کے نقوی نوں مل گئے۔ اوہ چھبی سوا یکڑ دا
باغ بارہ بن کی وچ چھڈ آیا سی تے جمع بندیاں دی اوس نوں لوڑ نہیں سی۔ پر جس دن
اوہ زمین ویکھن آیا اوہدے دو بے دن ای اوہنے اپنی منتقلی منسوخ کروالئی۔
مریداں حضرت شاہ ہوراں نوں دسیا کہ ایہہ اے ڈی ایس ایم کے نقوی اصل

دھوں مولوی احمد دین کلا نوری سی۔ پر حضرت شاہ ہورں دی شان ویکھو اوہناں
اوس مردود واسطے دعا فرمائی تے اوہنوں عارف والے وچ ٹبہ شریف توں ودھ چنگی
زمین مل گئی۔ ایس توں ودھ اسمبلی دے الیکشناں اتے جدوں کمشنر صاحب حضرت
شاہ ہوراں نوں ممبری واسطے آکھیا تاں آپ نے پھتے دے سراتے ہتھ رکھ دتا پھتتا
پھتتاں چودھری فتح دین ایم پی اے بنیا تے اسمبلیاں تے دفتر اں وچ حضرت شاہ
ہوراں داناں برے ادب نال لتا جان لکيا۔ حاجت منداں دیاں حاجتاں پوراں
ہون لکياں تے بدکاراں اتے رب دا غضب برسیا۔ زمیندار مزارع آپس وچ پیار
نال رہن لگ پئے۔ جے کوئی مزارع کے غریب زمیندار نوں تنگ کردا تے مزارع
دی دھی کڈھی جاندی تے حضرت چوتھے پنجویں تھانیدار نوں سنیہا بھیج کے مزارع
نوں حوالا توں منگوالیندے۔ آپ دی دعا نال مزارع دی دھی وی آپوں گھر مڑ
آؤندی۔ انج بے شریف تے اوہدے باسیاں اتے رب دی رحمت برسدی رہی۔

اک گل جیویں دی تیویں رہی اوہ ایہہ کہ حضرت شاہ دیاں جمع بندیاں نہ آئیاں تے
زمین دا پکا فیصلہ نہ ہویا۔ پر حضرت شاہ نوں کیہہ غم زمین تاں ڈیرے دی سی اوہناں دی نہیں
اوہناں نوں تے اوس وڈی سرکار دو چولاں دیاں ملاں تے اک آئس فیکٹری بخش دتی سی
پھیر وی جدوں وزارت بدلدی تے کمشنر آ کے حضرت شاہ ہوراں نوں خلوت وچ ملدا تے
زمین بارے گل بات کردا پر فیض پا کے جاندا ہر نویں وزارت وچ حضرت شاہ دی پارٹی پہلے
کولوں ودھ نکلڑی ہو کے نکلدی انج جدوں وی وزارت بدلی حضرت شاہ ہوراں نوں
بلڈنگاں فیکٹریاں تے سینما گھراں دے نذرانے پیش ہوئے۔

صاحبزادہ علاؤ الدین شاہ بخاری تے صاحبزادہ تاج الدین شاہ بخاری ٹبراں والے
ہو چکے سن تے اگیوں اوہناں دے پتر آکھیں کالج دیاں اچیاں جماعتاں وچ اپڑ گئے

سن۔ حضرت شاہ ہوراں نوں اپنے پوتیاں نال بڑا پیاری۔ اوہناں گلبرگ وچ اک اکتالی کنال دا ٹکڑا لے کے اک آستانہ شریف لاہور وچ وی بنالیا۔ تے ہون بوہتا ویلا اوہتھے ای گزار دے۔ مائی پاک گوشہ نشیں ہو چکے سن تے آپ نے بشارت مطابق اک بھاگ بھری چیخل بائی نوں حرم وچ شامل ہون دی عزت بخشی۔ حضرت شاہ ہوراں ریاضت دیاں حداں ٹپ چکے سن۔ ہُن اوہناں دا ودھ وقت وزیراں تے سیکرٹریاں نوں عزت بخش وچ گزار دایا کدے کدے گورنمنٹ ہاؤس ہو آوندے۔ تے باقی ویلے اوہ چیخل بائی کولوں مجاز دے گیتاں وچ حقیقت دے راز سندے۔ تے حرم دیاں دو جیاں پیماں اوہناں دی مٹھی چابی کر دیاں۔ ایہہ بی بیاں حضرت شاہ ہوراں بشارت مطابق پاکستان دے کونے کونے توں چینیاں سن۔ اوہناں واسطے وکھ وکھ کوٹھیاں بنوائیاں تے ہر اک دے واسطے اوہدی مرضی دی کار تے ڈرائیور۔ ایہہ پیماں حضرت شاہ دیاں خدمت گزار سن تے اوہناں دے پوتیاں تے نثار حضرت شاہ دے پوتے دن رات آستانہ شریف دی انیکسی وچ گزار دے۔ ایہہ چار کنال دی انیکسی حضرت شاہ ہوراں کولوں ایک غیر ملکی سفارت خانے والیاں بیچ لکھ دے بدلے تن سال لئی کرائے تے لئی ہوئی سی۔ ایہہ اوس سفارت خانے دا مہمان خانہ سی ہر شامیں سفارت خانے دا اک بندہ آوند اتے اک بکس وکی تے چاکلیٹ تے کینڈی دے ڈبے چھڈ جاندا۔ پھیر حضرت شاہ ہوراں دے چھ پوتے تے اوہناں دے پندراں ویہہ یار بیلی امیراں افسراں دیاں تیہہ چالی دھیاں نال رات بھر ٹوسٹ کردے تے دو بجے دن فجرے فجرے نوکراں دے نیانے ربڑ دے غباریاں توں لڑدے۔ ایہناں کڑیاں دیاں مانواں گھر وگھری اپنی دھیاں لئی سوچاں دے محل بناؤندیاں۔ پر حضرت شاہ ہوری ملک دے سبھ توں وڈے آدمی نوں عزت بخش گئے تے اک سٹیل مل تے اک جیوٹ مل دی گل کیتی تے اوس سبھ توں وڈے بندے نے اپنیاں دو دو ہتیاں دا ذکر کیتا ویاہ دا ون رکھن لئی ہن حضرت شاہ ہوراں نوں بشارت دی اڈیک اے۔

توں عید کتھے پڑھی؟

ہر عیدوں بعد لوکی مینوں پچھدے نیں۔ توں ”عید کتھے پڑھی؟“ تے میں ہر مہمن والے نوں وکھری عید گاہ دا ناں پتہ دسناں آں۔ اج تیکر کسے بھلے بندے نے ایہہ نہیں پچھیا جے توں عید پڑھی وی کہ نہیں۔ ہر ورھے جھوٹ بولدیاں میں اوکھا پے گیا آں تے اج علاینہ وچ بازار کہناں آں جے میں عید دی نماز نہیں پڑھدا تے مدتاں توں پڑھنی چھڈی اے۔

ایہہ تے میں بعد وچ دساں گا جے میں عید دی نماز کیوں نہیں پڑھدا پر پہلے مینوں کوئی اللہ دا بندہ ایہہ دے جے دنیا سال بھر دے فرضاں نوں بھل کے عید دیاں سنتاں بارے کیوں اینارولا پاندی اے۔ نمازوں پہلے گھر گھر وچ گھوڑو پیا ہوندا اے کسے دی ٹوپی نہیں لہدی کسے دی پگڑی نوں ماوا گھٹا اے تے کسے دی نوں ودھ۔ پگڑی بندیاں ہر کسے دا طرا گھنڈا او دھدا رہندا اے صندوقاں وچوں پروہنیاں والا کھیس نہیں ملدا تے آخری پروہنے دی نیک نیٹی بارے نیانیاں دے سامنے اچی اچی گلاں کیتیاں جاندیاں نیں۔ ہر کوئی شہر دی سبھ توں وڈی عید گاہ نوں

اپنے اگلیاں دی ملکیت سمجھدا اے تے اودھرا ی ٹھدا اے جس کے دی نماز کھس جاوے تے اوہ ایس واقعے دیاں نکیاں نکیاں گلاں ایسے دکھ بھرے فخر نال دو جیاں نوں دسدا اے جیویں اوہدا گھوڑا فوٹو فٹش وچ آ کے ہار گیا ہووے۔ نمازوں بعد گوانڈھی گوانڈھی نوں انج چھے مار کے ملدا اے جیویں دونوں ہنے چوداں چوداں سال دی کٹ کے نکلے ہون۔

نماز نوں چھڈ کے عید دیاں ہو روی بہت ساریاں گلاں ہون دیاں نہیں جیہڑیاں گھٹ ودھ میں ساریاں ای پوریاں کر دینا آں۔ ایخوئی کہ عید دے دن میں اپنے افسرنوں عید مبارک کہن ضرور جاناں تے اوہ اپنے افسرنوں ایخوئی گل کہن لئی ٹریا ہوندا اے تے اوہدا افسر اپنے افسرنوں۔ ایس طراں کردیاں میرا خیال ایہہ جے کہ عید دے دن پاکستان وچ پاکستان دا سبھ توں وڈا افسر ای اپنے گھر بہندا اے۔ دو جیاں دیاں عید مبارک قبول فرمان لئی میرے توں کچھ میرا ہیڈ کلرک میرے گھر آؤندا اے تے اوہدا گھر باقی دے کلرک تے کلرکاں دے ہیڈ کلرک دے گھر چڑا اسی جمعدار۔ پھیر ایہہ گل چڑا اسی۔ جمعدار علاقے دے، جمعدار میرے دھوبی تے چھٹی رساناں نوں نال ملا کے میرے گھر آؤندے نیں۔ تے مینوں کنگال کر کے خوشی خوشی اپنے گھر ٹر جاندے نیں۔ چھوٹی عیدوں پہلے تے عید دے دن طرح طرح دیاں بڈھیاں مائیاں میری مائی نوں ملن آؤندیاں نیں تے اوہناں نوں میرا مطلب جے میری مائی اوہناں طرح طرح دیاں بڈھیاں مائیاں نوں میری آمدنی وچوں فطرانہ زکوٰۃ اپنے حساب نال کڈھ کے دیندی اے میری آمدنی دے حساب نال نہیں۔ ایہہ طرح طرح دیاں بڈھیاں مائیاں میری مائی نوں دعاؤاں دے کے ٹر جاندیاں نیں پر میں باقی دا سارا سال اپنا سر کھر کھدا رہتا آں تے لوکی میرے

کولوں پرے ہو کے بہندے نیں۔

بکرا عید اتے چھوٹی عید والیاں گلاں توں دکھ اک بکرا وی دینا پیندا اے میں ورتا کے دیکھیا اے کہ جے کسے طرح اک ران پیدا کر لوو تے بکرا عید دا کاروبار بڑا کھلا حال لنگھ جاند اے۔ پر بندہ گوانڈیاں نوں کیہ کرے جد تیکر اک بکرا تہاڈے گھر دے باہر بٹھیا دو راتاں باں باں نہ کردار ہووے اودوں تیکر اوہناں نوں نیند نہیں آؤندی۔

گل میں اصل وچ عید دی نماز دی کر رہیا سی ایہہ بڈھیاں مائیاں تے بکرے ایس وچ آوڑے۔ پھیر وی ایہناں بڈھیاں مائیاں بکریاں تے ہو ردو جیاں گلاں دی عید دی نماز نال بڑی گوڑھی شریکے داری اے۔ اوہ کیویں؟ میں دسدا آں موٹا دھبہ حساب جمع تفریق تساں آپے کر لیناں۔ پہلے تے منڈیاں دے تکھیاں نوکاں والے بوٹ۔ ٹیڈی پتلوناں تے کوٹ عیدوں چھ مہینے بعد تیکر بندے نوں سرت نہیں آون دیندے مائی تے دھیاں دے جوڑے تن مہینے ہو رکھا جاندے نیں باقی رہ گئے تن مہینے اوہ بڈھیاں مائیاں بکریاں تے چڑاسیاں وغیرہ دے نامے لکھے ہاندے نیں۔ ہن جس بندے نوں سال ای سرت نہ آوے اوہ عید کیہہ پڑھن ہادے بے سرتی دے عالم وچ تے نماز پڑھن توں انج دی منع کیتا گیا اے۔

ایہہ تے سی آپ بیتی ہن ذرا جگ ورتاواوی سن لوو۔ جدوں میں عید پڑھدا سی اودوں باقی دے کل عید پڑھن والیاں ایہہ متھی ہوئی سی جے مینوں عید نہ پڑھن دی ہادے۔ وحدہ لا شریک دی قسم اے جے میں ایہناں لوکاں دا کجھ نہیں سی وگاڑیا پر ایہناں نوں میرے نال اک رب واسطے داویری۔ تے ایہہ مینوں عید پڑھن توں ہار کھن لی ایڈیاں کمینیاں حرکتاں کر دے جے میں دساں تے تسیں توبہ توبہ کراٹھو۔

اوس باری تعالے دے گھر اوہ دے حضور وچ کھڑیاں ایہناں نوں ایڈیاں گھٹیا گلاں
 کردیاں کدے شرم نہیں آئی۔ مینوں آپوں ایہہ گلاں دسدیاں شرم آوندی اے پر
 عید دی نماز اتے جد پہلی تکبیر بعد میں ایدھر اوہر ویکھدا جے ہتھ بنھنے چاہیدے یا
 نہیں تے میرے سجے والا میرے ہتھاں ول دیکھن لگ پیندا میں اپنے کجے ول
 ویکھدا تے اوہ اپنے کجے ول دیکھن لگ پیندا میں ایہناں لوکاں دی کینگی بارے
 سوچ ای رہیا ہوند اے اگلی تکبیر ہو جاندی ایس واری میں بڑی ہشیاری نال چوری
 اکھیں سجے ول تگدا تے اوہ فٹ بنھے ہتھ چھڈ دیندا میں ادھیاں بند اکھیاں دی
 پتلیاں کجے پاسے گھماندا تے کجے والا چھیتی نال ہتھ بند لیندا میں پھیر بڑی صفائی
 نال پتلیاں سجے پاسے پھیردا تے سجے والا ہن تیکر ہتھ چھڈی کھڑا ہوند اللہ اکبر ایس
 تکبیروں بعد سجے تے کجے والے ہتھ بنھن تے چھڈن دا کاروبار بدل لیندے۔ ہن
 سجے نے ہتھ بنھے ہوندے تے کجے نے چھڈے میں ایہناں دی چال سمجھ کے تے
 ایہناں دوہاں نوں چھڑ کے باقی دی قطار ول نظر ماردا پہلے تاں جد میں جھک کے
 کجے تے سجے نظر ماردا تے ایہہ سارے ای اپنے متھیاں اتے تیزیاں پالیندے۔
 دو جے ایہہ جے اپنی متھی مطابق اوہناں وچوں ادھیاں ہتھ بنھے ہوندے تے
 ادھیاں چھڈے۔ ہن میرے لئی اکو گل رہ جاندی جے میں ہتھ بنھیاں تے ہتھ
 چھڈیاں وچوں جیہڑے ودھ ہون اوہناں نال رل جاواں۔ جد میں انگلاں اتے
 گنتی کردا تے انگلیاں دیاں پوراں مک جاندیاں جے میں مونہہ وچ گنتی کرن لگدا
 تے کجھ لوکی کھنکن لگ پیندے تے باقی دے باجماعت مینوں گھورن لگ پیندے۔
 تے میں مڑ گنتی بھل جاند ا۔

اک گل جیہڑی ایہہ لوکی کدی نہیں بھلے اوہ ایہہ جے ایہہ نیا نیاں نوں نال لیانا

کدی نہیں بھلے میری قطار لئی ایہہ کوئی ست توں لے کر ستائی تیکری نیا نے ضرور
 لیا۔ ایہناں دیاں عمراں دکھو دکھ پر ایہہ سبھ اوہ منڈے سی جیہناں نوں اک
 واری شیطان ٹکریا سی تے نک نال لکیراں کڈھ کے نٹھ اٹھیا سی۔ ایہناں توں دکھ
 اکھاں تے پتلیاں قطاراں ہر قطار وچ اپنے کو ستونگڑے ہو رہٹھائے ہوندے تاں
 سجے میں اک قطار چھڈ کے دو جی قطار وچ نہ جا کھڑا ہوواں۔ ایہناں ستونگڑیاں
 نوں ایہناں دے پود نیا جہان دیاں سبھ توں الٹیاں کھیڈاں سکھا کے لیاندے رکوع
 وچ ہاندیاں ای ایہناں دے کھیڈ شروع ہو جاندے۔

”اوئے کہنی کیوں مارنا ایس۔“

”اوئے! دیکھ اوئے سامنے بھائی دانا لالٹک رہیا ای“

”ناں کھچیں اوہ حرام دیا مارے گا بابا۔“

”ناں، اونہہ اوں اوں۔“

سجے دا مطلب سی کبڈی۔ کبڈی لئی ایک قطار دے منڈے پورے نہ
 ہوندے تے ست اٹھ قطاراں دے منڈے رل جاندے ”کوڈی، کوڈی، کوڈی،
 کوڈی“

”اوہ ماریا“

”ناں“

”ہاں ہاں“

”اونہہ، اوں اوں“

میں ایہہ سبھ کجھ دیکھدیاں سندیاں وی چپ رہندا مینوں چپ دیکھ کے اگلی
 قطار دا اک بند اپنے پترنوں زور نال چھیڑ ماردا تے اوہ اچی اچی رون لگ پیندا

میں پھیر وی نیت بنھی رکھدا پھیر میرے کھبے تے سجے والے تے تھوڑی دیر بعد باقی دے کل نمازی ایس طرح دیاں آوازاں کڈھدے جیویں اوہ اپنا ہاں سا روک رہے ہوں اصل وچ چال اوہناں دی ایہو ہندی جے میں کے طرح ہس پواں تے اوہ کو تو ال نوں کہہ کے مینوں شہروں کڈھو ادین۔ نہ میں شہر وچ ہوواں تے نہ عید پڑھن آواں پھیر ہو رہندے ہو رہیاں نوں مار دے تے ہو رہے پچے اک دو جے کولوں اپنیاں ٹوپیاں تے رومال کھوہن لئی لڑ دے تے ہو رہندے ہو رہو طرح دیاں آوازاں کڈھدے۔

اک واری اک منڈے نے اک نیلیاں لکیراں والی قمیض والے بھائی دے پیراں کول اک پٹاخہ چلا دتا تے اوس بھائی انج ہو اوچ چھال ماری جیویں اوہدے پیر پٹھ سپ آگیا ہووے۔ نمازوں بعد اوس منڈے دے پیر اوہناں اوہ ماریا جے رہے رب داناں۔ تے اوس منڈے وی اوہ باں باں کیتی جے عید گاہ گونجن لگ پئی۔ سارے لوکی منڈے دے پیو دے نال سی جد میں اوس منڈے نوں چھڈان لئی اوہدے پیو نوں سمجھان لکیاں تے منڈے دا پیو تے باقی دے لوکی منڈے نوں چھڈ کے میرے گل پے گئے میں کہند اسی جے بچہ بے سمجھ اے ایہدے کولوں غلطی ہو گئی اے تے ایہنوں ہن جان دیو پر اوس منڈے کولوں اک ایڈی وڈی غلطی ہو گئی سی جے کوئی وی اوس نوں معاف کرن لئی راضی نہیں سی۔ وچوں گل ایہہ سی جے ایہناں ساریاں لوکاں چندا کر کے ایس منڈے نوں پٹاخا خرید کے دتا سی جے سجدے گیاں میرے پیراں کول رکھ کے ایہہ پٹاخا چلا دیوے۔ پر اوہ بچہ بے سمجھ نیلیاں لکیراں والی تے نیلیاں ڈیاں والی قمیض وچ غلطی کر گیا۔

مدتاں ایہہ لوکی ایس طرح دیاں گھٹیا چالان چلدے رہے پر ایہناں دی اک

نہ چلی اخیر..... اک واری..... اک عید دے آخری سجدے وچ اوہناں لوکاں اک منڈے نوں پڑھا سکھا کے میرے ول گھلایا ایہہ منڈا ایڈا وڈا فن کاری جے کتے ہالی وڈ وچ ہونداتے ایہدے ماں پو کروڑ پتی ہوندے ایہہ منڈا مینوں موٹھیاں پھڑ کے اٹھان لگ پیا۔

”ابا ابا! جیرا مینوں مارداے۔“

”ابا ابا اٹھ جیرے نوں مار۔“

”ابا ابا“

اویں ابا تینوں کیہہ ہو گیا اے۔“

پھیر اوہ مینوں مارن لگ پیا جد مار دیاں مار دیاں تھک گیا تے میرے اتے جھک کے بہہ گیا تے اڈیاں مار مار گھوڑا دوڑان لگ پیا سجدہ ختم ہو گیا سلام وی ہو گئے گنہگاروں دی بخشش کل عالم دی سلامتی تے امت رسول دی نیک راہی لئی دعاواں دی ہوئیاں پر اوہ شہسوار اپنے گھوڑے اتے جیہا رہیا۔

پھیر اوہ لوکی آئے تے اوہناں اوس نکلے فن کار نوں میرے اُپروں چکیا۔ جد میں سر چکیا تے اوہ میرے آلے دوالے کھڑے ہس رہے سی۔

اوہ جت گئے تے میں ہار گیا سی۔ اوہ دن جاوے تے اج دادن آوے میں عید نہیں پڑھی۔ اج میں اعلانیا کہناں وچ بازار کہناں جے میں عید دی نماز نہیں پڑھا مدتاں توں نہیں پڑھی تے اگے لئی وی کوئی عید پڑھن دا پروگرام نہیں۔

پہ میں جاندا آں جے ایہہ جواب مضمون پڑھن سنن توں بعد وی لوکی مینوں پھندے رہن گے ”توں عید کتھے پڑھی“ تے میں پھیر جھوٹھ بولاں گا۔

دارا ایس مہنگائی دے رونے دی تار نال تار جوڑ کے اپنے نیا نیاں دیاں کتاباں سکولاں کالجاں دیاں فیسوں تے جتیاں کپڑیاں دا کوئی ایڈالما چوڑا رجسٹر کھول کے شیخ جی دے اگے رکھ دیندا جے شیخ جی نوں کراہیہ ودھان بارے گل کرن دی ہمت نہ ہندی۔ شیخ گھر مڑ داتے احاطے وچ شیخانی دی آواز گونجی تے نیاں اک دو جے نوں کہہ دے لے اوئے پھیر رکھا ڈلگ گیا ای۔

حافظ ریکارڈاں، ریڈیو گانیاں تے دو جیاں غیر اسلامی گلاں دے بڑا خلاف سی۔ قرآن تے حدیث تے اوہنوں ایس طرح حفظ سن جے تسلیں مونگی دی دال بارے گل کردتے کوئی تر تالی حدیثاں تہا نوں سنا دیوے۔ تے جے کوئی اوہدے ہتھ پڑے ہاندا تے حافظ اوہنوں اللہ تے اللہ دے پیارے رسول ﷺ دے احکام اوہوں ہکر سناں دار ہنا جدوں تیکر اوہ بھائی ایہہ کہہ کے نہ ٹھٹھا جے حافظ جی میری دانی گدی تھلے آ کے مر گئی اے تے میں اہدا کفن لیا ونا اے۔ دانی شہر بھر دیاں خبراں احاطے دیاں کل مائیاں نوں جا کے دسدی تے ہر گیارہویں شریف نوں ختم دواندی تے حافظ دے گھر نوں چھڈ کے باقی سارے گھراں وچ اک اک تھالی کھیر دی ہندی حافظ تے اوہدے گھر والیاں نال دانی دا کوئی بہتا پیار نہیں سی۔

سرکاری افسر البتہ دو جیاں کولوں کچھ دکھ دکھ رہندا۔ ہاں دانی نوں اوہ ہر مہینے رقم دوان لئی چینی دا پر مٹ دواندا تے میرے نال اوہدی چنگی گل بات ایس کر کے ی سہے میں کدے اوہنوں کوئی سفارش تے لٹے سدھے کم لئی نہیں کہیا۔ ہیڈ ماسٹر احاطے دے بچیاں دے داخلے سکولاں کالجاں وچ کرواندا تے امتحاناں وچ اچے نمبر آون دے ٹروی دسدا۔ جس گھر وچ کوئی بیمار ہوندا حکیم اوس گھر جا کے ودھو دھو دانی چھڈاؤندا تے نال ای ترکیب استعمال وی۔ ہاڑاں نوں فجر فجرے تے

سائیکل دا فریم

شیخ محمد حسین دا پو بڑا دنیا داری۔ اوہنے ”شیخ منزل“ بنائی تے ایس طرح کہ بیٹھاں دکاناں تے اُپر رہائشی مکان پچھلے پاسے چھوٹا جیہا احاطہ تاں جے کرائے داراں دے نیاں اپنے احاطے وچ ای کارستانیاں کر لین تے ایہناں نوں ایس کم لئی باہر نہ ای جانا پوے۔ احاطے دے وچ کچھ نوکراں لئی کوٹھڑیاں۔

دکانداروں نوں چھڈ کے شیخاں دی منزل وچ اک تے مالک مکان شیخ محمد حسین آپوں اک سرکاری افسر اک حافظ اک حکیم ایک دانی ایک ہیڈ ماسٹر تے ایک ایہہ غریب گنہگار رہندا سی۔

اپنے آپ نوں کڈھ کے باقی ساریاں بارے میں قسم کھا کے ایہہ کہہ سکدا جے اوہ سارے بڑے ای چنگے بندے سن۔ خدا خونی کرن والے تے اک دو جے دے کم آون والے۔ ایناں وچوں شیخ جی میرا مطلب مالک مکان بھتوں ودھ ملنسار بند اسی اوہ ہفتے وچ ایک واری ضرور ہر کرائے دار کول جاندا۔ اوہدی تے اوہدے بچیاں دی خیر خیریت پچھداتے پھیر مہنگائی تے گھٹ آمدنی داروں نوں داتا کرائے

سیالوں نوں دوپہریں دکاندار اپنیاں اپنیاں کرسیاں کڈھ کے تھڑیاں اتے بہہ جاندے تے کھیاں توں لے کر ممدوٹ تے دولتانے دی سیاست تیکر گلاں کر دے تے بے وقت احاطے والیاں دے چیک وی کیش کر دیندے۔

ایڈے چنگے گوانڈھیاں نال میں بڑے سکھ نال رہندا سی تاں جے اک دن فضل نے فجر فجرے آکے مینوں دسیا جے احاطے وچ اک سائیکل دافریم پیا اے اوہدی گل میرے پلے نہ پئی تے میں اوہنوں سلپر لیان لئی کہیا۔ اوہ سلپر لیا تے اوہدا مونہہ ادھ چوسے انب ورگا بنیا ہو یا سی۔ میں سمجھ گیا جے اوہدی پھیرناں دی کڑی نال لڑائی ہو گئی اے میں بڑی دیر اوہدے غم بارے سوچدار ہیاں تاں جے ناشتہ کر دیاں اک دم ٹوسٹ دا اک ٹکڑا میرے گل وچ سائیکل دافریم بن کے پھس گیا ہن مینوں فضل دے مونہہ دے نقشے تے اوہدے دکھ دے بھیت دا پتہ لکیا سائیکل دافریم۔ ایہہ تے چوری دی سائیکل دافریم اے چوراں ایہدے ہینڈل پہیاں تے پرزیاں دے پیسے کھرے کر کے ہن ایس لاش نوں ساڈے احاطے وچ سٹ دتا اے چوری دا سائیکل..... چوری دے سائیکل دافریم ساڈے احاطے وچ۔ ہن کہہ بنے گا؟ دو جافرائی انڈامینوں زہرورگا لگیا سپ دی زہرورگا۔ کالا لشکد اسپ۔ سائیکل دے فریم ورگا۔ ساڈے وچ کالا ناگ شوکد اسی۔ دفتر جاندیاں مینوں اچاٹے وچوں لنگھ کے جانا پوے گا۔ احاطے وچ کالا ناگ ہووے گا۔ ڈردیاں ڈردیاں میں پوڑیاں اتریا تے سائیکل دا کالا فریم گیٹ دی کندھ نال پھن پھلائی کھڑا سی اوس دن مینوں پتہ لکیا جے ساڈا احاطہ تے کوئی ڈھائی تن میل لما اے حافظ اک بھورے جیسے لفافے وچ کچھ لئی باہروں آرہیا سی اوس دن حافظ مینوں کھڑا کر کے قرآن حدیث بارے کچھ نہیں دسیا صرف سلام لیکر کردار اگے لنگھ

کہاتے نہ ای ساڈیاں اکھیاں آپس وچ ملیاں تاں جے اسیں دوویں سائیکل دے فریم توں دو جے پاس ویکھدے پئے سی۔

میں دفتر وڑیا تے میرا اک پیر بوہے دے اندر تے اک باہر چکی دیاں سلاں وچ پھس کے رہ گیا میرے اپنے دفتر وچ میرا اپنا چڑا سی ایک سائیکل دافریم مانج رہیا سی۔ پہلے تے اوہ رسمی سلام لیکر کر کے اپنے کیں لگ گیا پر جد اوہنے مینوں تے میرے پیراں دے پینتیریاں نوں غور نال ویکھیا تے شیشے دی ایش ٹرے اوہدے ہتھوں ڈگ کے ٹٹ گئی تے اوہ پاگلاں وانگوں انج ایدھر اوہر ویکھن لگ جیا ہویں کسے اوہنوں اک خونی پاگل دے نال اکو کوٹھڑی وچ بند کر دتا ہووے۔ اوس دن چڑا سی دن بھر میرے دفتر دے باہر کھسکھس کر دے رہے تے میں اپنے دفتر وچ بیٹھا سائیکل دے فریم بارے سوچدار ہیا۔ ایہہ فریم جالے پہلوان دے بندیاں داکم سی جے پہلوان نوں کہیا جاوے تے شاید کسے بندے نوں کہہ کے فریم پکوادے۔ پر پہلوان نال گل کون کرے؟ پتہ نہیں اوہ اپنے ڈیرے ہووے کہ نہ۔ کہہ پتہ اوہ کسے ڈی ایس پی ڈی آئی جی دے دفتر بیٹھا سیاست الیکشن تے امن قانون بارے گلاں کر رہیا ہووے۔ پر اک گل پکی سی جے قانون مطابق مینوں ایس فریم دی اطلاع پولیس نوں ضروری دینی چاہیدی سی۔ رپٹ لکھان لئی تھانے آہاں جانا پند اتے علاقے دا اے ایس آئی کدے تھانے وچ نہیں ہوندا ہمیش تفتیش اتے لایا ہوندا اے یا کچھری کسے کیس دی پیشی بھگتان لئی تے جے کر دو دن دی چھٹی لے کے اوہنوں پھڑوی لواں تے محرر رپٹ لکھ وی لوے تے میری ضمانت کون دے گا کوئی صاحب جائیداد۔ میرا مالک مکان پر میری بیوی اوہ ایہہ تے من لوے گی جے میں ہفتہ دو ہفتے حوالات وچ رہ لواں پر ایہہ کدے نہیں جھلے گی جے

میرے مالک مکان دی بیوی دامیاں میری ضمانت دیوے۔ اتھے میں اک گل کھول دیواں تاں جے کوئی معتبر مفت وچ اپنی کارروائی دس لئی میرے بارے جھوٹیاں سچیاں رپورٹاں نہ لکھدا پھرے جے ایہہ سائیکل دے فریم دی گل اوہناں دناں دی گل اے جدوں سیاستدانان ہنیر پایا ہویا سی تے اوہناں دی شہ اتے پولیس تے سول سروس والے ایہناں توں ودھ من آئیاں کردے سن تے اے تیکری ساڈے پیارے صدر مملکت فیلڈ مارشل محمد ایوب خان ہوراں دا انصاف تے سچائی دا سورج نہیں سی چڑھیا۔ اوہ سارا دن ایہناں سوچاں وچ لنگھ گیا تے میری ان ٹرے ”کوڑے دے ڈھیر وانگوں اچی ہوندى گئی تے آؤٹ ٹرے مونہ اڈی پئی رہی۔“ شامیں ہنیرے ہوئے میں گھر مڑیا تے ہنیرے احاطے وچ کالا فریم دس ہزار واٹ دے بلب وانگوں لاٹاں مار رہیا سی۔ اوس دن مانواں اپنے بچیاں نوں احاطے وچ نہیں جان دتا تے نہ ای دکاندواں اپنیاں کرسیاں باہر وچھائیاں سن اوہ رات بڑی لمی تے ہنیری سی تے رات بھر اسمانوں تاریاں وانگوں فریم ٹٹ ٹٹ کے ڈگدے رہے۔

دو جے دن دفتر جان لئی گھروں نکلیا تے احاطہ شاں شاں کردا سی۔

اک فریم سی جیہڑا کندھ نال مونڈھا نکائی ایویں کھڑا سی جیویں علاقے دا بد معاش تے میں چوراں پیریں احاطے وچوں باہر نکل گیا۔ اوس دن سکندر چھٹی تے سی تے دو جے چپڑا سی میرے کمرے وچ وڑن توں ڈردے سی۔ مینوں آپوں ایس کمرے توں ڈر لگدا سی ایس اک کمرے دے چار کونیاں وچ اک اک فریم کھڑا سی ایک میری میز اتے ستا پایا سی۔ میں بڑا جگرا کر کے اپنا سر زور زور نال جھٹکیا تے اوہ اٹھ کے فرش اتے جا کے لما پے گیا میں ہولڈر چکیا تے فریم میرے ہتھ وچ آ گیا میں

دراڑ کھولیا تے اوہ کاغذاں وچ پیاسی میز بیٹھاں پیافریم گھڑی گھڑی میرے بوٹاں نال کھیند اسی جد میں حوصلہ کر کے اوہنوں ٹھڈا ماریا تے اوہ اڈ کے چھت نال جا لگیا پھیر ہولی ہولی نیواں ہوندا میرے سر توں دوانچ اتے آ کے رک گیا تے کالے ہونڈ وانگوں میرے سر دے آ لے دوالے پھیرے پان لگ پیاہن میں اٹھ کے کھڑا دی نہیں سی ہوسکدا۔ میرے اگے میزی میز توں اگے کندھ احاطے دی کندھ تے احاطہ سائیکل دے ہینڈل ورگیاں مچھاں والیاں سپاہیاں نال بھریا ہویا سی۔ اوہناں سپاہیاں کندھ سنے فریم احاطے دے کل نوکراں دے سراں اتے رکھوایا ہویا سی تے اوہناں نوں ہکی تھانے لئی جا رہے سن۔ اک کونے وچ حافظ اک حوالدار نوں گھیری کھڑا سی تے اوہنوں خدا ترسی دیاں برکات تے غفور الرحیم دے فضائل دس رہیا سی میں پھیر سوچیں پے گیا۔

سوچدیاں مینوں اپنے سرکاری افسر گوانڈھی دا خیال آیا اوہ بڑا اثر رسوخ والا بندہ اسی تے اوہدی اک پارٹی اتے تے میں آئی جی پولیس نوں وی دیکھیا سی پرائیس سرکاری افسردی اک بڑی مشکل سی اوہ لطیفے بڑے لمے سناں اسی۔ اوہنے ٹیلیفون چکدیاں ای پنڈ دے منڈے والا لطیفہ شروع کردتا جدوں اوہ اوس کڑی تیکر پہنچیا جیہڑی دو جے پنڈوں گنیاں دی بھرکی چکی آؤندی سی تے میں موقع پا کے فریم دی گل پھیر دتی کیہ فریم؟ کیہڑا فریم؟ توں گل تے پوری کر لین دیا کر کے نوں طور طریقہ تے تیرے نیڑے وی نہیں لنگھیا۔ میں چپ کر کے لطیفہ سناں رہیا اک ویلے اوہ اپنا گلا صاف کرن لئی رکیا تے میں پھیر فریم بارے دو فقرے کہہ دتے۔ اوہ بولدا ”کیا ایہہ لطیفہ ۴۳ منٹ لما اے تے میں ایہہ اک سوانا ٹھویں وار پہلے سن بیٹھا سی اک سو ٹھویں وار سنن تے ہسن توں بعد میں پھیر اپنی فریم دی فریاد شروع کیتی فریم؟“

سائیکل دافریم؟ احاطے وچ؟ اوہدے پلے کجھ نہیں پیا۔ میراوس چلے تے سارے کوڑھ مغزاں نوں کا لے پانی بھجوا دواں۔ ”سائیکل دافریم؟ احاطے وچ؟ چوری دی شے؟ سچی سچی دس توں تے سائیکل نہیں سی چوری کیتا!! فضل نوں کیوں نہیں کہندا جے اوہنوں چک کے احاطیوں بارسٹ دیوے۔“ ہن اوس جھلے نوں کون سمجھاوے جے چوری دی شے نوں ہتھ لاؤندیاں بندہ آپوں چور بن جاؤندا اے۔ انگلیاں تے ہتھاں دے نشان۔ فضل دے ہتھاں دے نشان تے فضل نوں پولیس پھڑ کے لے جاوے گی تے نال ای مینوں وی پھیر کیہہ بنے گا؟ بن دا بناندا کجھ نہیں میرا گوانڈھی کہن لگا۔ اج شامیں میں گھر آواں گاتے تیرے نال گل کراں گا۔“

اوس شامل میں پھیر دیر نال پہنچیا تے اوہ اپنی کلب ٹر گیا ہو یا سی۔ اوس رات میں ڈیڑھ و بجے تیکر سائیکل دے فریماں دے بستر اتے پیا پلسیٹے ماردار ہیا تے فریماں دے کونیاں تے ٹکراں نے میرا سریر لہو لہان کر دتا۔ ڈیڑھ و بجے توں بعد اوہ گھر آیا اوہنے اپنی گڈی گیراج وچ بند کیتی تے تھوڑی دیر بعد دگر دگر کردا اپنیاں پوڑیاں چڑھ گیا مینوں حوصلہ نہ پیا جے میں اوہدے نال کوئی گل کردا۔ اک تے ادھی رات اوہ وی ہنیری دو بجے احاطے وچ فریم پیاسی میں کیویں احاطے وچ جاندا میں جاگدا رہیا۔ باگی نے فجر دی بانگ دتی تے مینوں اپنا بچپن یاد آ گیا جدوں میں کل نمازاں پڑھدا سی تے سارے روزے رکھدا سی بانگی دی بانگ توں مینوں مڑرب یاد آ گیا تے میرے دل نے اپنی زبان وچ پتہ نہیں اوس پاک پروردگار نال کیہہ گلاں کیتیاں پر جد میری اکھ کھلی تے دن دے ساڈے نو وچ گئے سن احاطے وچ بڑا رولا سی میں مڑا کھیاں میٹ لنیاں ہولی ہولی میں آوازاں وکھریاں وکھریاں کیتیاں ایہہ تے احاطے دے بچے سی کرکٹ کھیڈن لگے بے سمجھ

ہن اوہناں نوں کیہہ سمجھ سی جے احاطے وچ اک بڑی خطرناک شے پئی اے پھیر ہن اوہناں دیاں ماداں اتے غصہ آیا۔ تے میں غصے نال اٹھ کے احاطے ول گیا جے اناں حرام دیاں نوں جھڑک کے گھر و گھریں بھیج دیاں جد میں تھلے جھاتی ماری تے اک منڈا اپنے گوڑیاں اتے ہتھ نکائی گیند کچھ کرن لئی عین اوس تھاں کھڑا سی جتھے کل سائیکل دافریم کھڑا سی پر اج نہیں سی مینوں یقین نہیں آیا تے میں احاطے وچ اتر کے منڈیاں نوں باؤ لنگ کران لگ پیا تے آپوں گیند دے کچھ نس نس کے احاطے دا کونا پھر ول پھڑیا پر سائیکل دافریم کتے نہ نظریں پیا اک منڈے نے اک اچی ہت ماری تے میں دیکھیا جے درختاں اتے چڑیاں چوں چوں کر دیاں تے کھیڈ دیاں میں تے اسماں او نا ای گوڑھا نیلا اے جتاں اودوں ہوندا سی جدوں میں نیانا ی تے مالے سکول نہیں سی جان لکھا میرے پیچھے دیاں زور نال ہوا بھری تے کڈھ دی میں مڑوٹھے اتے چڑھ آیا۔ سامنے پاسیوں سڑک ول جھاتی ماری تے دکاندار کرسیاں باہر ڈا ہی بیٹھے اچی اچی کے گل اتے ہس رہے سن۔

لی گل کیہہ کراں احاطے دے کل باسی حافظ دانی مالک مکان سرکاری افسر حکیم ایڈوکیٹ تے کل دکاندار مڑاوسی طرح رہن لگ پئے جیویں سائیکل دے فریم توں پکڑے رہندے سی تے ہن تیکر اوہناں دے کماں کاراں تے طور اطواراں وچ کجھ فرق نہیں آیا پر میں جس ویلے دیہلا بیٹھا ہونا واں اوہ سائیکل دافریم میرا ضمیر بن کے مینوں کہنی ماردا اے تے کہندا اے توں چور! توں قانون شکن! توں سائیکل دے فریم دی رپٹ کیوں نہیں سی لکھوائی؟ تے مینوں مڑتریلی آجاندا سی اے۔

جے اج فراند جیوند اہوند اتے پتہ نہیں ایس بارے کیہ کہندا۔ پر مینوں طوطے
 زہر لگدے نیں پہلا طوطا سلیم سی پتہ نہیں کس اوہدا ناں طوطا پایا سی پر اوہدا نک بالکل
 طوطے دی چنچ ورگاسی۔ اوہ پڑھن لکھن وچ بڑا ہشیاری۔ منڈے کہندے جے اوہ
 ادھی ادھی رات تیکر پڑھدا رہندا۔ پر جد ماسٹر اوہنوں منیٹر بنادتا تے اوہدی باقی دی
 ادھی رات وی ماری گئی اوہ رات بھر ایس غم وچ جاگدا رہندا جے جس دن اوہ
 پینتی توں گھٹ شکایتاں لگائیاں اوہ دن ماسٹر اوہدی منیٹری کھوہ لوے گا تے
 اختیار دی خاطر بندا کیہ کجھ نہیں کردا۔ میریاں اوہنے کوئی دس ہزار توں ودھ
 شکایتاں لائیاں ہونیاں میراوس چلدا تے اوہنوں بڑھے دریا دے بھتوں ڈونگے
 ڈمھ وچ دھکا دے آندا۔ اج کل اوہ ولایت وچ اے تے انگریزاں دے بچیاں
 نوں انگریزی پڑھاندا اے۔ جد کدی وی اوہ لاہور آؤندا اے تے مینوں ضرور ملن
 آؤندا اے ایس طرح جیویں کدی کجھ ہو یا ای نہیں سی۔ سلیم آپوں ولایت ٹر گیا
 میرے پچھے طوطے لا گیا طوطیاں ایہہ متھ لئی اے جے جیوندے جی مینوں سکھ نال نہیں

طوطے

جیوندینا تے مینوں لگدا اے جے میرے میریاں اتے اوہناں میری قبر اتے آہنے پا
 لینے نیں۔

میتھوں پہلے میرے والے فلیٹ وچ اک پارسی رہندا سی جد میں ایہہ فلیٹ
 کرائے اتے لین لئی ویکھن گیا تے اوہنے اپنا ٹیک وڈا فرنیچر مینوں مڑھن دی
 کوشش کیتی۔ ایہہ اوہناں دناں دی گل اے جدوں ہنے ہنے پاکستان بنیا سی تے
 میں اپنیاں کل منجیاں تے پیڑھیاں لدھیاں نے چھڈ آیا سی میں ہر مزجی دا فرنیچر ضرور
 خرید لیندا پر جد اوہنے مینوں دسیا جے فرنیچر دے نال اک طوطا مفت ملے گا تے میں
 طوطے دی چال سمجھ گیا۔ ایہہ طوطا بڑا بڈھا سی تے اکھیاں توں معذور۔ ہر مزجی جد
 اوہنوں کہندا ”آؤ“ تے اوہ آواز دی سیدھ تے آکے اپنی چنچ پنجر یوں باہر کڈھ
 لیندا۔ ہر مزجی اوہدی چنچ نوں پیار کردا تے اوہ مڑ اپنی ٹیک اتے جا بہندا انھے
 حافظاں وانگوں اوہنوں وی اپنے پنجرے دا جغرافیہ چنگی طرح حفظ سی اوہدیاں
 ایہہ گلاں دیکھ کے شاید کوئی چھوٹی موٹی عقل دا بند ادھو کا کھا جاندا پر میں طوطیاں توں
 واقف سی فٹ سمجھ گیا جے مینوں پھسان دی کوشش ہو رہی ہے حافظ جی دی چال نہ
 ہلے۔ اصل وچ ایس توں تھوڑا چر پہلے اک طوطے نے مینوں بہت خراب کیتا سی تے
 رلم مالے ہر اسی میں لدھیا نیوں پاکستان آرہیا سی گڈی دی چھت اتے بیٹھ کے
 گڈی تھاں تھاں رکدی تے میں ہر تھاں اتر کے اپنی مائی کولوں اپنا بیمار پتر پھڑ کے
 اوہنوں تازہ ہوا کھواندا۔ اوہ سے گڈی دے اک دو بے ڈبے وچ اک طوطا سی اک
 بڈھی مائی کول اک پنجرے وچ بند جتھے وی گڈی رکدی تے میں اپنے بیمار پتر نوں
 ہوا کھوان لئی اتردا ایہہ مائی مینوں پنجرہ پھڑا دیندی تے کہندی پتر ایس بے زبان
 نوں دی ہوا کھوادے۔ بڈھی مائی دی عمر دالحاظ کردیاں اک مونڈھے تے گھگھوتے

اک ہتھ وچ طوطے دا پنجرہ پھڑی ریل دی پٹری دے نال نال پھر داتے طوطا ایس طرح پر مار داتے ٹیس ٹیس کردا جیویں کوئی پہلوان کشتی جت کے ”یا علی“ دے نعرے لار ہیا ہووے تے بلوچ سپاہی اپنی ریفلاں دے کندے دکھا دکھا کے مینوں کہندے اوئے طوطے باؤ گڈی تے چڑھ جا جے جان دی خیر چاہیدی اے۔“ ہن تسیں آپوں دسو جے کوئی تہاڈا تے تہاڈے سبھ توں وڈے ویری داناں اکو ساہ وچ لوے تے تہاڈے اتے کیہہ بیٹے گی۔

اولاد بری کولی شے اے تے ایس دی خاطر بندے نوں طرح طرح دے سمجھوتے کرنے پیندے نیں۔ اک واری گھگوکتوں دو طوطے لے آیا۔ ایہناں طوطیاں جو میرے نال کیتی اوہ میں ای جاندا آں۔

ایہناں دوہاں دا اک اک کندا ٹیٹا ہو یا سی دن بھر اوہ کھلے پھر دے تے راتیں گھگو اوہناں نوں اک پنجرے وچ بند کر کے موسم مطابق کمرے دے اندر یا باہر ویٹھے وچ رکھ دیندا ٹیس ٹیس کردے تے تھیں تھیں بٹھاں کر دے اوہ انج اندر باہر پھر دے جیویں اوہو گھر دے مالک ہون تے جد میں مزدوری لے کے گھر مڑدا اوہ میرے پیراں پٹھ آون دی کوشش کردے۔ اوہناں وچ شہادت دا جذبہ بڑا گٹ گٹ کے بھریا ہو یا سی۔ اوہ وی میرے پیراں پٹھ آ کے شہید ہون دا۔ میرا جی کردا جے اوہناں نوں چک کے احاطے وچ سٹ دیواں۔ پر پھیر مینوں گھگو دا خیال آ جاندا جے اوہ طوطیاں بنا کیہہ کرے گا دو جے ایہہ طوطے بڑی چالاکی نال گھر دے دو جے جیاں نال ایس طرح رل مل گئے سی جیویں سارے اکو ٹبر دے بندے ہون صرف راشن کارڈ وچ اوہناں دے ناں درج نہیں سن بند اپنے گھر دے جیاں نوں تے گھروں باہر نہیں نہ دیندا ناں ہاں میں آپوں گھر دے ایہناں نویاں جیاں

کالوں لگ پے کے بہتا ویلا باہر لنگھاندا تے رات پئی گھر مڑا اک دن میں رات پئی گھر مڑیا تے گھگو بوہا کھولیاں ای بڑا مونہہ بنا کے کہن لگا ڈیڈی طوطے گواچ گئے۔ میرا جی کیٹا جے ہنے جا کے دکاناں کھلاواں تے محلے دے منڈیاں نوں جگا جگا کے شری ونداں پر اولاد اولاد اے۔ میں ایہہ نہ کیٹا ایہہ ضرور اے جے مونہوں کل کھا مٹا ملی کھا گئی ہونی اس تے گھگو ہور وی رونی شکل بنالیتی اگلے دن فجر فجرے گھگو آیتے کہن لگا ڈیڈی اک طوطا مل گیا اوہ کھانے دے کمرے دے بوہے پچھے ایٹا سی اوس دن گھگو بہانہ بنا کے گھراں بیٹھا رہیا سکول نہ گیا تے میرے جان توں بعد دو جے طوطے نوں لہسن لگ پیا۔ اوہنے کاڈھ ایہہ کڈھی جے دو جا طوطا سامنی لکھ دے پر نالے وچ ڈگ پیا اے۔ اوہدی کاڈھ ٹھیک نکلی جدا ہونے اک نکا جیہا روز اپنا نالے وچ سٹیا تے طوطے پٹھوں ٹیس ٹیس کر کے جواب دتا ایہہ دیگی لوہے دا پر نالے کدھ دے نال کوئی ویہہ فٹ پٹھاں جا کے دکاناں دے تھڑے وچ چلا جاندا اے تے تھڑے دے اندر ایل دی شکل بنا کے سڑک دے نالے اتے جانکلدا اے۔ طوطا ایس ایل دی کہنی وچ پھسیا بیٹھا سی تھڑا تزان لئی گھگوراج مزدور بلا لیا یا۔ مزدور اں نوں دیکھ کے دکاندار اکٹھے ہو گئے پھیر راہ جان والے لوکی وی رُک گئے طوطے بڑا اکٹھ کر لیا تے ایس اکٹھ دے کل لوکاں دو ٹولیاں بنالیاں ادھے بندے گھگو دل ہو گئے تے ادھے دکانداراں نال دکانداراں دی اک اڑی سی جے ایہہ تھڑا اوہناں والا لنگھا اے اک دو جے کول آون جاون داتے اوہ اک ٹٹے طوطے خاطر تھڑا جس توڑن دین گے گھگو دے ہانیاں دا کہنا سی جے گھڑی دو گھڑی دی تکلیف ال کہہ فرق پیندا اے آخر نکا باؤ ایہہ وی تے کہندا اے جے اوہ تھڑا مڑ بنواد یوے کالیاں ہالے پہلوان دے بندے دی اکٹھ وچ آ گئے۔ اوہناں سوچیا جے شاید

ایس جھگڑے وچ کجھ آمدن دی صورت بن جاوے اوہ تے تھانہ دوری نہیں تے
پولس والے دی نقص امن دی دفعہ لے کر پہنچ جاندے۔ راج مزدوروں وچ وچاؤ
کر ادا تا اوہناں گھگھونوں سمجھایا جے تھڑا توڑن نال طوطا وی مر جاوے گا۔ ہن گھگھو
ترکیاں سوچن لگ پیا اوہنے میری مچھیاں پھرن والی ڈوری نال ایک روڑا بنھیا
تے اوہنوں پر نالے وچ اتار دتا جد روڑا طوطے نوں لگاتے اوہنے ٹیں ٹیں کر دیاں
ڈوری پھڑلئی ہن ڈوری نوں پر نالے دی سیدھ وچ رکھ کے ہولی ہولی گرے
گرے کھچدیاں تے کلمہ پڑھدیاں گھگھو آ خر طوطے نوں باہر کڈھ لیا۔ اوہدے کندے
لہو لہان ہوئے ہوئے سی تے اوہ پر نالیوں نکلدیاں ای ڈھے پیا تے بیہوش ہو گئے
ہن گھگھو اپنی ماں نوں چھیتی نال چاء بنان لئی کہہ کے میری الماری وچوں براہڈی
ڈھونڈن لگ پیا اوس پاگل نوں ایہہ چنگا بھلا پتہ سی جے میں تے میرا گوانڈھی اک
دو جے دی الماری وچ کوئی پین والی شے نہیں چھڈ دے تاں جے بس نہ جاوے
اوس راتیں میں پھیر دیر نال گھرا پڑیا تے پھیر گھگھو نے بوہا کھولیا تے میرے پچھیاں
بناں ای کہن لگا ڈیڈی دو جا طوطا وی مل گیا اے۔“ مینوں غصہ تے بڑا آیا پر ایویر
ای اوہداجی رکھن خاطر میں پچھ بیٹھا کتھوں تے اوہنے طوطے پر نالے تے تھڑے دی
کل کہانی سنا دتی۔ مینوں اوس ویلے ایہہ یقین ہو گیا جے گھگھو وڈا ہو کے اک دن
لکھاری بنے گا تے اپنیاں اتھر و بھریاں کہانیاں نال دنیا دے کل سر کڈھ لکھاریاں
وچوں سبھ توں سر کڈھ لکھاری منیا جاوے گا تے اپنے ماں پیو دا ناں روشن کرے
گا میں ایہہ لئی کہنا آں جے میرے تے طوطیاں وچ ورھیاں پرانے ویر دے
ہوندیاں وی میریاں اکھیاں بھر آئیاں گھگھو نے طوطے دے پنجرے اتے کمبل پائے
اوہنوں ہیٹر دے کول رکھیا ہو یا سی میں کمبل لاہن لئی اگے ودھیا تے میرا ہتھ پھڑ

تے کہن لگا نہیں ڈیڈی ہنے چاء پی کے ستا اے۔ فجرے ویکھ لینا۔ میریاں اکھیں مڑ
کے سک گئیاں گھگھو بارے میری دُلکیاں لاندی سوچ اک دم رک گئی تے ایہہ اٹھ
اٹاں اچا لکھاری مینوں اک گٹھ مٹھا بونا لگن لگ پیا۔ گھگھو جیہا گھٹیا بند کدے وی
لکھاری یافن کار نہیں بن سکدا۔ اوس توں بعد پھیر طوطے اندر باہر ڈٹھاں تے ٹیں
ٹیں کر دے پھر دے تے پھیر میرے پیراں پٹھ آ کے شہید ہون دی کوشش کر دے رہے
اک دن رجمی دے ہتھوں منجی ڈگ پئی۔ اوہدا اک پاواسدھا اک طوطے دی پٹھ وچ لگاتے
اودھتے ای شہید ہو گیا۔ دو جے دن دو جے طوطے نے سامنی بالکنی توں چھال مار کے خود
کشی کر لئی یا ایہہ وی ہو سکدا اے جے اوہ اپنے ساتھی دے جان توں بعد بن باسی بننا
پاوند اسی تے اوہنے بالکنی توں اڈاری ماردتی پر اوہ اک گل بھل گیا سی اوہ ایہہ جے اوہدا
اک کندا اٹھیا ہو یا اے تے اوہ سڑک دے وچکار جا ڈگا۔ اودھر لاہوراومنی بس والیاں اک
ٹریلر چلائی ہوئی سی جیہدی ٹائمنگ اوہناں ایس طرح کڈھی ہوئی سی جے اوہ کل
ٹاپاں تے رکدیاں سواریاں لیندیاں سائیکل سواراں ریٹریاں تے رکشیاں توں بچدیاں
مین اوس ویلے نکلسن روڈ دی اوس تھاں تے پہنچے جتھے ادھ منٹ پہلے ایک طوطا ڈگیا
اودھے ایہہ طوطا ادھاتے بس دے اگلے سچے ٹائر نال چلا گیا باقی ادھ وچوں ادھا گھگھو
نے سڑک اتوں کھرچ لیا ندا تے اوہدی قبر احاطے وچ پہلے طوطے دی قبر دے نال
کڈھی۔

وقت لنگھدا گیا تے میں طوطیاں نوں بھل جیہا گیا۔ کدے کدے میں ایہہ وی سمجھن
لگ پیا جے طوطے مینوں بھل گئے۔ پر اک دن میں غسل خانے وچ نہاؤں توں پہلے اچی
اپنی کا کے بے خبر سستی سستی نوں جگان دی کوشش کر رہیا سی جے پھیر اوہی ٹیں ٹیں دی
آواز میرے کنیں پئی۔ مینوں کا نبا چھڑ پیا، نہایوں بناں ای میں باہر نکل آیا نور اں تو لیے

نال اک طوطا پھڑیا ہو یا سی تے نگی مانے رو رو کے کہندی سی چھڈ دے چھڈ دے پر نور اں
 بڑے غور نال طوطے دی چج تے کینٹھی نوں دیکھدی رہی جد میں طوطے کولوں ودھ زور
 نال نور اں نوں ٹیں ٹیں کیتا تے نور اں اپنی نوکری کھسن توں ڈردیاں طوطے نوں چھڈ دتا
 اوہنے جانا کتھے سی اوہنے مشکل نال تے میرا گھر لبھیا سی اوہ مڑ کے گھگودے کمرے وچ جا
 وڑیا تے اوہدی منجی دے سرہانے اتے جا بیٹھا میں کہیا جے ایہہ طوطا مینوں بیمار لگدا اے
 تے ایہدے مرن دا سانوں ایویں سنتاں چڑھے گا۔ ایہنویں پھڑ کے باہر اڈا دیو گھونا
 اپنے کرکٹ دے دستانے پائیٹیاں ماردا اوہنوں پھڑن لئی اگے ودھیا۔ پر طوطا اوس توں
 ودھ پڑھیا لکھیا سی اوہنے سیٹیاں دا جواب سیٹیاں نال دتا۔ تے تن سکنت رک کے دو
 واری اپنا ناں وی دیا۔ میاں مٹھو۔ ہن نور اں رولا پادتا جے بی بی ایہہ طوطا تے بولد اے
 ایہنوں رکھنا چاہیدا اے۔ طوطے نوں پان لئی مانے اپنا مالٹا چک لیا کی تے مانے دی ماں
 اپنی روٹی ہانڈی چھڈ کے طوطے نوں دیکھن آگئی مینوں انج لگا جیویں پانی پت دے
 میدان میں لماں پیا ہوواں تے بار دے سپاہی میرے آلے دوالے کھڑے ہسدے
 ہون جد مینوں کچھ سرت آئی تے پنجرے بارے گلاں میرے کنیں پیاں۔ گھونا غائب
 ہو گیا تے نال ای میری گڈی وی تھوڑی دیر بعد اوہ لنڈیوں اک پنجرہ لے آیا تے مہینے دی
 چھبی تاریخ نوں میرے کولوں پنج روپے کڈھالے میرا خیال اے جے اوہنے پنجاں
 وچوں گھٹو گھٹ دور روپے ضرور نکلے ہونے نیں ہن ایس طوطے نوں میری سویر دی چاء توں
 پہلے چوری ملدی اے تے اوہ کا کے تے مانے نوں کول بٹھا کے ”میں میاں مٹھو
 آں“ ”چوری کھانی اے“ تے ہو را ایس طرح دی بکواس کرداے۔ میں کولوں لنگھاں تے
 اوہ کھٹکدا تے سیٹیاں ماردا اے کوئی سلیم نوں پچھے جے کسے دی اولاد نوں نال ملا کے
 اوہنوں ایس طرح تنگ کرنا کتھے دی شرافت اے۔ کینگی دی کوئی حد ہوندی اے۔

امریکہ وچ

اک دن فجرے فجرے مینوں سگرٹاں دی لوڑ پے گئی۔ نور اں ودالین گئی ہوئی
 سی تے میرے گھر ہو کر کوئی نوکر نہیں اے۔ اصل وچ میں نوکر رکھن دے حق وچ نہیں
 آں۔ امریکہ وچ سارے لوکی اپنا کم آپوں کر دے نیں۔ گھر دی صفائی، کپڑیاں
 دی صفائی، بازاروں سودا لیا نا سبھ کچھ اوہناں دے گھراں وچ جھاڑ پونچھ لئی دیکھیوم
 کلینر کپڑے دھون لئی واشنگ مشیناں بھاف والیاں بجلی دیاں استریاں گھروں نکلو،
 لاک دے کونے سگرٹاں دی مشین پیسے پاو و جیہڑے مرضی سگرٹ کڈھ لوو۔ میں اپنی
 رضائی لاہ کے باہر نکلیا تے مینوں کا بنا چھڑ پیا گل ایہہ کہ میرا کمرہ ایئر کنڈیشنڈ نہیں
 اے تے نہ ای باقی دا گھر۔ باورچی خانہ تے نہ ای برانڈا تے پوڑیاں امریکہ وچ
 کوئی گھر دکان، کارخانہ ایسا نہیں جیہڑا ایئر کنڈیشنڈ نہ ہووے۔ میرا پان سگرٹاں والا
 سڑکوں پار بہند اے اوس پار پڑی نہیں تے اوہ کچے اتے بہند اے میں امریکہ وچ
 کوئی مکی تھاں نہیں دیکھی ہاں سمندر کنارے ریت ہوندی اے۔ ریت، سمندری
 پھل دیاں بٹھاں تے مچھلیاں دے شکاری مچھلیاں پھڑ دے نیں بڑے حساب

کتاب نال پر ساڈے لوکاں نوں حساب کدے نہیں آؤنا۔ ہن ایس پان سگرٹاں والے بھینے نوں ای ویکھ لو و اوہنے مینوں دو پیکٹ سگرٹ دتے تے اک ماچس میں اوہنوں اک روپے دانوٹ دتا اوہنے مونہہ وچ کچھ بڑ بڑکیتا تے چھ ٹیڈی پیسے مینوں موڑ دتے میں کہیا بھیا! توں اک جمع تفریق والی مشین کیوں نہیں خرید لیندا۔ ٹائپ دی مشین ورگی ہوندی اے۔ دو چار انگلاں مارو فٹ حساب کتاب ہو جاندا اے اک ٹائپ ہوئی پرچی وی نکل آؤندی اے اوہ گاہک نوں پھڑادیو۔ اوہدی وی تسلی ہو جاندی اے کہ دکاندار نے ودھ قیمت نہیں لائی بھینے دی عقل بڑی موٹی اے اوہنے میرے ول تکیا ای نہیں اوہدے کچھ پلے پیا ہوندا تے تگدا تے جواب دیندا۔ اوہ اک بابولئی پان لان لگ پیا۔ میں ہولی ہولی سگرٹاں دی ڈبی دے اتلا مومی کاغذ پھاڑیا تے مٹھی وچ چڑ مڑ کر کے اوہدی اک گولی جیہی بنا دتی پھیر میں ایدھر اوہر ویکھن لگ پیا کہ ایہنوں سٹاں کتھے بھیا بولیا یہیں کہیں پھینک دیجیے نا۔“ میں بھینے نوں گھور کے تکیا تے اوہ پاناں دیاں پڑیاں پنھن لگ پیا بابو بولیا دو بندھ دے تے اک مینوں پھڑادے۔ اک پان پھڑ دیاں ای اوہنے مونہہ وچ پالیا تے ہتھ اپنے سر تے پھیر لیا اوہدی داڑھی نہیں سی مینوں بڑا ای برا لگا پر میں کیہ کہندا اوس بابو نوں میری اوہدی میل ملاقات نہیں سی۔ جدوں اوہ چلا گیا تے میں بھینے نوں کہیا۔ بھیا! توں ٹشو پیپر دے رومال کیوں نہیں رکھ لیندا ویکھیں ناں اوس بھائی نوں اپنا ہتھ اپنا والاں نال پونجھنا پیا امریکہ وچ ٹشو پیپر دے ڈبے ملدے نیں کسے دی کھان پن والی تھاں جادو ایہہ ڈبے کھلے پئے ہوندے نیں جنے مرضی کاغذ کڈھو جیویں مرضی ورتو کوئی نہیں پچھدا۔ ساڈے ملک وچ جتھے بیماریاں ای بیماریاں نیں سانوں تے صحت دے اصولاں دا ہور وی ودھ خیال رکھنا چاہیدا اے ہن توں اپنی مائی ول

ای ویکھ کئی سکی ہوئی اے توں کدی ایہدا ایکسے کروایا اے میں جدوں امریکہ وچ ہوندا سی تے اک دن سٹوڈیو جاندیاں ہاورڈ سٹریٹ دے موڑ اتے اک مائی مینوں روک لیا تے ایک ہیلتھ وین ول انگل کر کے کہن لگی اپنا ایکسے کروالے مائی سوہنی سی تے میں اوہنوں ویکھ کے ہسیا تے اوہ وی ہسی تے ہس کے کہن لگی بالکل مفت اے ایکسے۔“ میں ہور ہسیا تے اوہنے مینوں غصے نال تکیا پھیر میں اوہنوں دسیا کہ میں پاکستانوں آیا ہاں تے جدوں میں ٹوکیو بی او اے سی دا ڈی۔سی۔ ٹین چھڈ کے پین ایم وایونگ ۷۰۷ پھڑیا تے کئی گھنٹیاں دی فلائٹ توں بعد ہونو لود دے ہوائی اڈے تے اتریا سی اوس ویلے تہاڈے کسٹم والیاں میری ایکسے دی فلم چیک کر کے مینوں تہاڈے ملک وچ وژن دی اجازت دتی سی تے ایہہ کوئی چھ کو ہتھیاں دی گل اے مائی میریاں گلاں سن کے خوشی نال پریشان جیہی ہو گئی تے ہس کے میرے ول ہتھ ودھایا تے کہن لگی میرا ناں جینے میں کہیا میرا ناں علی اے تے پھیر اوہدے نال ہتھ ملایا اوہدی بڑی اچھیا سی کہ میں اوہنوں پاکستان بارے گلاں دساں بھیا امریکہ دے لوکی پاکستان نوں پے کستان ای کہندے نیں اوہناں دے گل کرن دا ڈھنگ ای کچھ اچھا اے پھیر جین اک دم میرا ہتھ چھڈ کے اک کپڑیاں دی کھڑی والی مالی ول نٹھی تے نال ای مینوں آواز دتی۔

مطلب اے ٹھہریں ذرا علی نٹھ نہ جاویں۔ بھیا کہن لگا لیکن انور صاحب آپ کا نام تو انور ہے۔ ہاں ہاں ٹھیک اے بھیا میں کہیا پر میرا پورا ناں تے انور علی اے ناں تے سان فرانسسکو وچ جتھے میں رہندا ساں اوہ تھ دے کل بھائی تے مائیاں مینوں علی کہندے سن۔ اصل وچ ساڈے آج کل دے آغا خان ہوراں دے پیونوں دنیا دے کل لوکی پرنس علی کہندے سن بڑی واری ایہناں امریکی مائیاں مینوں پچھیا کہ

علی ایہہ پرنس علی تیرا رشتے داری تے میں کہند انہیں۔ پر اوہناں میرا کدے اعتبار نہ کیتا تے ہر شا میں اوہ ٹی وی دیکھن دے بہانے اپنی اپنی بیڑ چکی میرے کمرے وچ آجاندیاں بھیا بیڑ اصل وچ شراب نہیں ہوندی ایہہ تے جو آں دا پانی ہوندا اے تے ایس دے وچ نشہ بہت ای گھٹ پھیر امریکہ دی بیڑ تاں ہور وی ہلکی ہوندی اے ہلکا شرتی رنگ درجن ڈبے پی جاو و مجال اے ڈھڈ ذرا وی بھارا ہو جاوے امریکہ وچ بیڑاں وچوں جرمن بیڑ سبھ توں اچی منی جاندی اے ایہہ بیڑ جرمنی توں نہیں آوندی امریکہ وچ ای بن دی اے پر جرمنی دے نسخہ نال انج وی امریکہ وچ طرح طرح دیاں قوماں وانگوں جرمنی دے لوک آباد نیں ہوسکدا اے کہ ایہہ بیڑ بنان دے نسخے جرمنیوں اپنے نال لیائے ہون بھیا کیلی فورنیا وچ اک تھاں اے ناپا ویلی۔ او تھے کوئی بے تحاشہ ای وائی نریاں ہن۔ تے اوہ لوک ستر اسی طرح دے انگور اگاندے نیں تے ایہناں توں کوئی اک سو چھیا نوے طرح دیاں شراباں کڈھدے نیں ہروائی نری وچ شراب نوں پکاون لئی سرنگاں بنیاں نیں جیہڑیاں میل میل لمباں نیں۔

ایہہ تھاں سان فرانسکو توں کوئی سٹھ ستر میل دور اے اک دن میں تے میرے نال اک امریکی بھائی ایک اٹلی دی مائی تے اک بھائی تے اک سپین دا بھائی ناپا ویلی گئے ایہناں کل مائیاں بھائیاں وچوں سپین والا بھائی بڑا مزے داری۔ اوہداناں بڑا عجیب جیہاسی ”مے گل“ بھیا توں کہہ سکدا ایں مے گل؟ چھوڑیے انور صاحب جب سے پاکستان میں آئے ہیں اپنی تو زبان کا حلیہ بگڑ گیا ہے اور آپ..... اچھا چل چھڈ ایس مے گل دی گل نوں پر بھیا بڑا مزے دار بھائی سی ایہہ مے گل اوہ سپین ایس لئی چھڈ آیا سی کہ اوہری برادری تے جرنیل فرانکو دی آپس وچ بندی

نہیں سی پر مے گل امریکہ وچ ہر ویلے ہمدار ہندا۔
امریکہ وچ کلے سپین دے نہیں دنیا جہان دے بندے اکٹھے ہوئے نیں بھیا اک دن کھانے دی میز تے مینوں اک چلی دی مائی ملی تے کہن لگی میں اک ساری خریدنی اے مینوں ککھ سمجھ نہ آیا کہ کہندی کیہہ اے۔ ساری ساری اوہ کیہہ شے ہوندی اے؟ کہن لگی اوہ کپڑا جیہڑا تہاڈیاں مائیاں پاؤندیاں نیں پھیرا ہن ہتھ تال اپنے آ لے دوالے ولن دا اشارہ کیتا میں کہیا اچھا تیرا مطلب اے ساڑھی ایہہ کیہ مشکل گل اے ایہی کوی، پنج ست گز کپڑا خرید لے تے اوہنوں لپیٹ لے اوہ کہن لگی نہیں چارلس سٹریٹ وچ اک دکان اے او تھے ساڑھیاں وکدیاں نیں توں میرے نال چل کے مینوں پسند کرادے میں کہیا چنگا اوس شامیں اوہنے بائی ڈالر دے اک ٹی جیہی سوت دی ساڑھی خریدی۔ اگلی شامیں اوہ ساڑھی لے کے میرے کمرے وچ آ گئی تے کہن لگی علی ہن مینوں پواوی دے بھیا رب گواہ اے۔ ہن میں کدی اوہدے ول دیکھاں کدی ساڑھی ول تے کدی اپنے ول۔

ہن تیکر رحمت روہتکیا آرام نال بیٹھا ہو یا سی پر بہتے آرام نال وی نہیں اوہ کدی کدی اپنی ٹنگ کھرک لیندا سی تے کدی کھنگھدا وی سی پھیرا وہ بھیے دا پڑیاں دھن والا اخبار چک کے پڑھن لگ پیا ایہہ سارے اوہدے ڈام سن۔ اصل وچ اوہ میریاں گلاں بڑے دھیان نال سن رہیا سی۔ رحمت روہتکیا سفیدیاں کرن داکم کردا اے تے جس دن اوہدی دھاڑی لگ جاندی اے اوس توں اگلے تن دن اوہ بھیے کول بیٹھ کے آرام کردا اے اوس دن وی اوہدا بھیے کول پٹھن دا پروگرام سی۔ پر جس طرح اوہ پرانا اخبار بھیے دے پیراں کول رکھ کے چپ کر کے کھسک گیا میں شرط لا کے کہہ سکداں کہ رحمت دی ماں بڑی سخت بیماری تے اوہ میریاں گلاں وچ رجھیا

اودھ دی دوائی لیانی بھل گیا سی نہیں تے ایہہ کیویں ہو سکدا اے کہ میں چلی دی مائی بارے گل کر رہیا ہواں تے کوئی ایس طرح اٹھ کے چلا جاوے چلی دی مائی تے ساڑھی دی گل ساندیاں تے میں آج تیکر کسے نوں اکھ نہیں جھپکن دتی۔ پر ماں دی بیماری کولوں ودھ دنیا وچ ہو ر کوئی مجبوری نہیں رحمت دی مجبوری بارے سوچدیاں میری گل دی تارٹ گئی تے میں کہیا بھیا میں کیہ کہہ رہیا سی؟ بھینے نوں کدی کدی اچا سنن دادورہ پے جاند اے اوہ اکھیاں اچیاں کر ٹاہلی دے پتر گن رہیا سی ہاں ٹھیک اے میں کدی جو نیا ول تگاں کدی ساڑھی ول تے کدی اپنے ول جو نیا کہن لگی علی مینوں ساڑھی پواوی دے میں پھیر اودھ لے ول تکیا پھیر ساڑھی ول پھیر اپنے ول بھیا پھیر پتہ ای میں کیہ کہیا؟ ہن بھینے دے اچے سنن دادورہ مک چکیا سی تے اوہ فوراً بولیا ”ہمیں کیا معلوم انور صاحب آپ تو پڑھ لکھے آدمی ہیں۔“ ہن مینوں یاد آیا کہ بھینے نے پچھلی وار جھوٹھ بولیا سی اودھتی اردو تے چنگی بھلی سی پر اودھ لے مونہہ دا نقشہ ضرور لقوے دے بیمار وانگوں وگڑیا ہو یا سی پھیر پتہ اے میں کیہ کہیا بھیا؟ میں کہیا گل سن مائی قسم اے اوس پیدا کرنے والے دی میں اپنی کل حیاتی ساڑھی کدی نہیں بنھی۔ البتہ گل ایہہ وے جدوں وی میں ہسنا تے ہمیشہ سچا ہاسا ہسناں جھوٹے ہاسے نوں میں کدی نیڑے وی نہیں آون دتا۔ ایس کر کے میرا افسر مینوں کوئی بہت چنگا نہیں جاؤندا۔ انج وی سچا ہاسا ہسنا بڑا اوکھا کم اے ایہدے وچ چھاتی تے گل دا زورانی نہیں لگدا ایہدے لئی سارے سریر نوں ورتا پیندا اے۔ جدوں میں ہسداں تے میرے کناں دے پردے پانی بن کے میریاں اکھاں اتے اتر آوندے نیں تے مینوں ساری دنیا اک جھولا لگدی اے میرے پھیرے لوہار دی پھوکنی وانگوں چلدے نیں تے میرے گل وچ چٹے اکتارے تے ڈڈو آں دیاں

لمایاں جلیاں آوازاں نکلدیاں نیں۔ میرا سریر میرے قابوؤں باہر ہو جاند اے تے میں ہوا وچ انج لتاں باہاں مارداں جیویں کوئی کلا بند خالی ہتھیں دوسو جتاں دی فوج نال لڑ رہیا ہووے۔ لڑدیاں لڑدیاں میرے گوڈیاں دے قبضے ڈھلے پے جاندے نیں تے مینوں کسے آسرے دی لوڑ پے جاندی اے۔ میری اک گل پلے بھ لوو کہ جے کرتھانوں کدی ایس طرح دا وقت آپوے تاں کسے بندے دا آسرانہ لینا۔ میں شروع شروع وچ ایہہ غلطی کر کے بڑا دکھ جھیلیا اے۔ ایسے ویلے میں کرسی میز کھبے یا ہو ر کسے ایس طرح دی بے جان شے دا آسرالیناں۔ ہاسے دے دوریوں بعد مینوں سرت آوندیاں ادھا گھنٹہ تے ضرور لگ جاند اے۔ جدوں مینوں سرت آئی تے میں ٹاہلی نوں جھما مار یا ہو یا سی ٹاہلی نوں چھڈ کے میں اپنا لک سدھا کیتا تے اپنے کوٹ دی بانہہ نال اپنیاں اکھیاں پونجھ کے بھینے ول تکیا۔ بھینے نوں مڑاچے سنن دادورہ پیا ہو یا سی تے اوہ اپنیاں ماچساں تے سگرٹاں دیاں ڈبیاں گن رہیا سی ہاں تے بھیا جین اوس کپڑیاں دی گھٹری والی مائی نوں ہیلتھ وین وچ داڑ کے آئی تے کہن لگی ”علی، میں پے کستان بارے بہت کجھ جاننا چاہندی آں میں اونہوں اپنے سٹوڈیو دا کارڈ دتا تے اپنے گھر دا ٹیلیفون نمبر جدوں اوہنے میرے کولوں تاریخ منگی تے مینوں کجھ حساب کتاب کرنا پے گیا اوس دن منگل سی تے میں تے میری تھیٹر ہاناسی کلن جولی دی شام سی پرسوں این نے مینوں اپنیاں سہیلیاں نال ملانا سی اوس توں اگلی شامیں جوڈی نے آنا سی اگلے دن ہفتہ تے ہفتے دی شامیں کلب دیاں کڑیاں میرے بناں کیہ کرن گیاں پھر آگیا اتوار ہن بھیا اپنے پیسے گن رہیا سی اتوار نوں بندہ ہفتے دی رات دے انیندرے نال بے جان ہو یا ہوندا اے پیر توں.....

میں نے زور نال اپنا بکسا بند کیتا۔ پیر نوں پیر دی سویر والی اُداسی رات تیکر پچھا نہیں

چھڈ دی اگے آیا منگل ہاں ٹھیک اے میں کہیا اتنجل اگلے منگل اتنجل خوشی نال بیہوش
جیہی ہو کے میرے اتے ڈگ پئی بھیا اوس ویلے اتنجل میرے موڈھے نال لگی ہوئی
سی تے بھیے نے اپنا بکسا سراتے چکيا ہو یا سی۔ تے اوہ سلام دعا کیتیاں بناں ای
ریلوے اسٹیشن ول ٹر پیا۔ اتنجل نوں اپنے مونڈھیوں لاہ کے میں بھیے دی عقل
بارے سوچن لگ پیا۔

ایس گل نوں کنے ای دن بیت گئے پر بھیا مڑنکلسن روڑ تے نہیں آیا۔ اک دن موٹر
سائیکلاں والا چودھری کہن لگا انور صاحب! کارپوریشن والیاں بڑی وار چھاپا ماریا تے
بھیے دا بکسا چک کے لے گئے تے ہر دار اوہ جرمانہ بھر کے اپنا بکسا لے آندا تے مڑا ایس
ٹاہلی بیٹھ آہند پر پتہ نہیں تسیں اوس دن اوہ دے کن وچ کیہ پھوک ماری کے اوہے مڑ
ایدھر آؤن دانان نہیں لیا۔“ چودھری دی گل توں مینوں گل تجھی تے اگلے دن میں منگمری
روڑ تے پٹیا لہ آؤ انجینئرنگ ورکس گیا ایہہ انجینئرنگ ورکس اک لکڑ دا بکسا اے جیہڑا
سڑک دے کنارے پیار ہندا اے۔ دن بھر مستری بشیر تے اوہ دے دو چھوٹو گاہکاں دیاں
گڈیاں کچی پڑی تے سڑک اتے لا کے اوہناں دیاں مرمتاں کر دے نیں تے شامیں
مستری اپنا اک پلاس دو پیچ کس چھ ست چابیاں تے اک ہتھوڑا ایس انجینئرنگ ورکس
وچ بند کے شفیع آٹو سپیر پارٹس دی دکان وچ رکھ کے اپنے گھر چلا جاندا اے مستری بشیر
میری گڈی دا کار بوریٹر دیکھدیاں ای اعلان کردتا کہ ایہہ بالکل ختم ہو چکيا اے پھیر
اوہنے بھاء شفیع نوں آواز دتی تے کہیا بھاء جی ایس کار بوریٹریاں فلایناں اڈ گئیاں نیں
سلائی دی ڈھلی اے تے بش وی اڈیا ہو یا اے۔ ایہدی مرمت ہو سکدی اے؟ کیوں
نہیں مستری۔ فلایناں سلائی تے بش کسے خرا دیئے کولوں بنوا لو وکھڈیاں وچ چاندی بھروا
لو فس کلاس کم دیوے گاتے پیسے وی نویں کار بوریٹریاں کجھ گھٹ ای لگن گے ہاں بابو جی

اک پٹرول پمپ ضرور لگوا لینا گڈی اک میل وچ تین گیلن کرے گی ایہہ کہہ کے اوہ زور
نال ہسیاتے ہسد اہسد اپنی دکان وچ جاوڑیا۔ میں چپ رہیا ہن مستری بشیر کار بوریٹر
کھولن لگ پیا تے میں اوہنوں امریکہ وچ کار بوریٹریاں مستریاں تے ورکشاپاں بارے
گلاں دسن لگ پیا۔ شروع شروع وچ تے اوہ بڑے دھیان نال سندار ہیا وچ وچ کوئی
سوال وی پچھ لیندا پر تھوڑی دیر بعد اوہنے ہنگارا بھرنا وی بند کردتا پھیر اوہدی طبیعت خراب
ہون لگ پئی ایس توں بعد اوہنوں تریلیاں آؤن لگ پیاں تے کدے کدے اوہ دے دندا
ایس طرح پیسے جاندے جیویں مداری تانبے دا پیسہ ٹکدا اے جدوں اوہنے کار بوریٹر کھول
کے گڈی وچوں کڈھیا اوس ویلے اوہنوں اپنی ڈھڈ پیڑ ہو رہی سی کہ اوہ کل کار بوریٹریاں
فلایناں سلائیوں سنے اک چھوٹو دی بک وچ پا کے آپ نٹھ کے نال دی گلی وچ جاوڑیا چھوٹو
کار بوریٹر صاف کر کے مڑ گڈی وچ لا دتا چھوٹو نال کوئی گل بات نہیں ہوئی اوہ کنوں بولا
تے مونہوں گونگا سی۔ نہ ای اوہنے مزدوری لئی اشائیاں نال مینوں دسیا کہ بھاء کہہ گیا سی
باؤہوراں کولوں پیسے نہیں لینے۔ ایہہ اپنے ای بندے نیں آج کل منگمری روڑ تے میکورڈ
روڑ دے چوک دے چکر دے وچ کار ایہی کنوں بولا تے مونہوں گونگا چھوٹو بیٹھا رہندا
اے تے جس ویلے میں گھروں دفتر تے دفتر گھر آؤندا آں ایہہ دوروں ای میری
گڈی دی آواز سن کے منگمری روڑ ول مونہہ کر کے زور نال آواز دیندا اے ”بھاء جی پھیر
آیاؤ“ تے آپوں نٹھ کے عبدالکریم روڑ دی بھیڑ وچ گواچ جاندا اے۔

ہن لاہور کارپوریشن والیاں نوں جے رب کجھ مت دتی ہووے تے اوہناں نوں
چاہیدا اے کہ پٹریاں توں چھابڑیاں ریٹریاں تے ورکشاپاں چکوان لئی مینوں ملازم رکھ
لین پر مینوں پتہ اے کہ اوہ ایہہ کم کدی نہیں کرن گے سچی گل اے ساڈے ملک وچ ہندی
کوئی قد نہیں۔ امریکہ وچ.....

چلھا چونکا

جے کانواں دے کہے ڈھگے مردے ہوندے تے اج توں ورھیاں پہلے رب نے عبد الغفور نوں مت دے دتی ہوندی تے اوہنے اپنا چلھے چونکے دا کاروبار چھڈ چھڈ یا ہوندا مینوں نہ تے عبد الغفور نال کوئی ویراے تے نہ ای اوہدے چلھے چونکے نال۔ ویکھن ولوں وی چنگا بھلا لگدا اے پر پتہ نہیں کیوں اوہ مینوں دنیا دا سبھ توں وڈا مسالچی سمجھدا اے ہر دسویں پندرھویں میرے ٹیلیفون دی ٹلی کجھ انج و جدی اے کہ اوہدے وچوں طرح طرح دے مسالیاں دی خوشبو آوندی اے۔ ایہہ ہوندا اے عبد الغفور دا شام دے کھانے دا بلاواتے نال ای اوہ مینوں چھیتی آون دی وی تاکید کردا اے اجیہی شامیں اوہ کوئی اٹھ دس مہمان ہو رہا ہوندا اے عبد الغفور پوچھوں میں تے ایہہ اٹھ دس مہمان اسیں سارے ای کجھ ہمار شمار رہندے آں۔ تے سانوں ساریاں نوں ساڈے ڈاکٹراں ایہہ دسیا اے کہ اسیں ساریاں کلیاں کلیاں چھ چھ بوتلاں دارو دیاں ہر مہینے نہ خالی کیتیاں تے ساڈی موت واقع ہو جاوے گی تے پھر اوہ ذمے دار نہیں ہون گے۔ عبد الغفور نوں اپنے طرح اپنے مہماناں دی

صحت دا وی بڑا خیال اے تے اوہ ہر اجیہی شامیں ایہناں دے دارو دا وی اپنے پلیوں بند و بست کردا اے مفت دا دارو کینوں کوڑا لگدا اے تے ایہہ کل مہمان بن ج کے پرانے لطیفے نویں طریقیاں نال یاد کر کے اپنیاں اپنیاں مائیاں دی انگلی لگے دارواری عبد الغفور دے گھر اپڑ جاندا اے میں ایہناں دے آون تیکر جو کجھ میرے تے بیت گئی ہوندی اے اوہ میں ای جاندا ہاں پر ایہہ کل مہمان مینوں کجھ ایس طرح گھوردے میں جیویں میں اوہناں دے حصے دا دارو وی پی گیاں۔

اجیہی شامیں دو پہروں بعد ای عبد الغفور دی نوکرانی میرے گھر پھیرے پاوے لگ پیندی اے نوکر نوں اوہ ایس کر کے نہیں گھلدا کہ کتے میں اوہنوں باہروں ای نہ ٹر خادیاں تے اجیہی شامیں میں میرے دفتر وچ آنیاں بہانیاں اودوں تیکر بیٹھا رہناں جدوں تیکر چوکیدار اپنے دفتر دے باہر پئی بیٹج نوں اپنے چابیاں دے گچھے نال توڑن نہیں لگ پیندا تے میرے گھر عبد الغفور دی نوکرانی میری مائی کول بیٹھی میری مائی نوں چھڈ کے دنیا دیاں کل مائیاں دیاں بدخونیاں کر رہی ہوندی اے مینوں ویکھدیاں ای اوہ کھڑی ہو جاندی اے تے اپنے صاحب دا حال کجھ اجیہے درد نال دسدی اے جے مینوں تھل وچ کسی یاد آ جاندی اے۔

اودھر عبد الغفور اپنا پریش کرکرتے دو جاوٹ پٹانگ کٹھا کری اپنے گھر دے پچھلے ورائنڈے وچ انج ٹہل رہیا ہوندا اے جیویں پنجرے اندر شیر عبد الغفور ناموں تے مسلمان ای لگدا اے پر اوہ ایمان ایہہ اے کہ ایہہ کل کائنات سورجاں چنداں نے صرف ایس گل لئی بنائی گئی اے کہ ہر بندہ ہر دسویں پندرھویں اک ہانڈی ضرور آپوں پکاے اوہدے حساب نال مینوں اپنی بخشش کجھ اوکھی ای نظر آوندی اے کیوں جو اپنی کل حیاتی وچ میں اک واری حلوہ بنایا سی تے حساب دے دن اوہدی سزا جزا

وی میرے بیلیاں نوں ای ملے گی میں اوہناں نوں بڑا کہندار ہیا کہ میرے کولوں کھوہ توں پانی منگوا لو۔ بھانڈے منجوا لو کچھ کروا لو پر ایہہ کھان پکان داکم نہ کرواؤ پر اوہ کہن لگے کہ پک تک دامزہ کیہ آیا جے تیرے کولوں کھانا نہ پکویا۔ اوہناں دی ہونی اوہناں دے سراں تے اڑی بن کے بولدی پئی سی بڑا ای سوکھا جیہا کھانا حلوہ تے میں ایس کر کے من لیا کہ چھوٹے ہوندیاں میں اپنی ماں نوں حلوہ پکاندیاں بڑی وار ویکھیا سی پہلے اوہ پانی وچ مٹھاپا کے پکاندی سی پھیر کڑا ہی وچ سوچی تے گھوپا کے بھندی سی تے پھیر دونوں نوں اکٹھا کر دیندی سی۔ میں وی بالکل ایہی کیتا پر حلوہ نہ بنیا۔ بڑی دیر میں ایس حلوے جیہی شے بارے تے اپنی ماں بارے سوچدار ہیا پر گل میرے پلے نہ پئی۔ گل ایہہ سی کہ جدوں میری ماں حلوہ پکاندی سی میں ایہہ کدی نہیں سی غور یا کہ اوہ کئے مٹھے وچ کتنا پانی پاؤندی اے تے کئی سوچی نوں کئے گھو وچ کئی دیر بھندی اے میں تے ہمیش پستے باداماں دیاں گریاں اتے شست لائی بیٹھا ہونداساں۔ ایس حلوے جیہی شے دی شکل کچھ اجیہی سی جیویں کسے بہت سارے پانی وچ تھوڑی جنی کالی مٹی گھول دتی ہووے میں بڑی اگ بالی تے بڑا چمچا پھیریا پر گل کچھ اگے نہ ودھی کچھ فرق ضرور پیا اوہ ایہہ کہ ایہدی شکل کچھ اجیہی ہوگئی سی جے ہن ایہہ نہ کھایا جاسکد اسی تے نہ ای پویا۔ اپنے بیلیاں دی مشکل حل کرن لئی میں کہیا ”ایہہ حلوہ! حلوے دے ناں تے اوہناں مینوں انج گھوریا جیویں ہن میرے ڈکرے کر دین گے میں کہیا کہ ایس حلوے نوں ایسے طرح شہر لے جاندے آں۔ نورے پتنگاں والے دے کم آوے گا اخیر اک بکریاں والے نے صلح من لئی تے بک ڈیڑھ بک سنگھوں لاہن توں بعد اکھ بچا کے کڑا ہی اپنیاں بکریاں اگے الد دتی بکریاں اوہنوں سنگھن توں بعد ککراں دے

کنڈے کھان ٹر گھیاں اوس توں بعد میرے بیلیاں مینوں کسے وی چلھے دے نیڑے نہیں پھڑکن دتا اوہ مینوں بالن اکٹھا کرن لئی بھیج دیندے میں میلاں میل چل کے جدوں دوتن گھنٹے بعد تن چار جھاڑ تے اک دو گوہے لے کے مڑداتاں ایہہ ہانڈی روٹی کر کے مینوں اڈیکدے ہوندے سانوں ساریاں نوں رب تھوڑی بہت کمینگی ضرور بخشی ہوندی اے پر کچھ لوکی بہتے ای کمینے ہوندے نیں۔ ایہناں کمبیاں وچوں کچھ میرے توں پہلے ای جا کے دور دور تیکر جھاڑ و دے آوندے تے میرے لئی من کے اک اک میل دے فاصلے تے کتے اک جھاڑ تے کتے اک گوہار کھ آوندے۔ جدوں میں ایہہ تن چار گوہے تے اک دو جھاڑ لے کے مڑداتاں ایہہ ایناں گوہیاں تے جھاڑاں نوں سامنے رکھ کے تھکدے تے ہسدے تے طرح طرح دیاں بے سریاں گلاں کردے۔

عبدالغفور بے سریاں گلاں تاں نہیں کردا پر میرے دیر نال اپڑن تے اوہ کڑک ککڑی وانگوں گڑگڑا کر ن لگ پیندا اے۔ دو جے اوہدی کمینگی پڑھیاں لکھیاں والی ہوندی اے اوہنے اک کونے وچ اک میز اتے بیچ ست سیر گنڈھیاں دا ڈھیر لایا ہوند اے کہنا تے اوہدا ایہہ اے کہ گنڈھے کھان نال بندے نوں دل دی بیماری نہیں ہوندی پر اصل وچوں اوہنوں کوئی دماغی بیماری اے تے اوہ گنڈے کترن والے دے اتھرو تے اوہدیاں بجیاں اکھیاں ویکھ کے اندر خانے خوش ہوند اے سدھی گل اے کہ گنڈھے کتر نامسا لچی دا کم اے ورائنڈے دے وچکار عبدالغفور کوئی ترانوے طرح دے مسالے اپنے گھر دیاں کل میزاں تے تپائیاں اتے اپنے آلے دوالے سجائی پنساری بنیا کھڑا ہوند اے میری پہلی شامیں اوہنے اپنی ہٹی مسالیاں دے نانواں دے پہلے اکھراں دے حساب نال سجائی ہوئی سی الف آم ب بلی وانگوں ایس حساب نال رائی دا ڈبہ چکن لئی اوہ پہلے الف توں

رے تیکر اپنیاں انگلاں دیاں پوراں اتے پڑھدا اسی پھیر جس پورے اوہ اکھر آوے اوس پور اتے نشان لا کے اوہ مڑاوس پور تیکر گنتی کردا اسی ایس طرح رے دانمبر باراں ہويا۔ ہن اوہ اپنے بجیوں ڈبے شیشیاں بوتلاں بھانڈے ٹھیکر گندا اسی تے بارہویں نمبر دی شے چک لیند اسی اوس شامیں میں ویکھیا کہ بڑی وار حرف نمبر تے شیواں گڈمڈ ہو گئیاں تے ہرواری عبد الغفور نے مجید دی عقل بارے نامناسب گلاں کیتیاں اوس شامیں میں شامت دامارا کہہ بیٹھا کہ کل کل مسالیاں دے نانواں دی لسٹ بنا کے اوہناں دے اگے اوہناں دے نمبر لکھ دتے جان پھیر اوس مسالے والے ڈبے شیشی یا بوتل تے اوس نمبر دی چٹ لادتی جاوے ہن جس مسالے دی لوڑ پوے اوہداناں لسٹ وچ ویکھ لوو تے اوس ناں دے اگے لکھے نمبر والا ڈبہ یا شیشی چک لوو۔ عبد الغفور نوں میری ایہہ گل ایڈی دل لگی کہ اوہنے اوسے ویلے کھڑیاں کھڑیاں مینوں اپنا مسالچی بنالیا مینوں اوہ ویلا کدی نہیں بھلے گا پر ایس طریقے وچ وی گڑ بڑ رہی اک واری لسٹ گواچ گئی عبد الغفور پولیس وچ رپٹ تے نہیں لکھوائی پر باقی سبھ کچھ کر چھڈ یا پھیر اک واری کتے دس تے اٹھائی نمبر دے ڈبے اگے پچھے ہوئے تے دھنیے دی خوشبودی تھاں عبد الغفور دے نک نوں مرچاں چڑھ گئیاں تے پھیر مجید دی شامت آگئی تے بیگم صاحب نوں آوازاں پین لگ پئیاں اجیہی دعوت والی شامیں عبد الغفور دی مائی دن کھڑے ای اپنی کسے سہیلی نال کوئی بڑی ضروری گل کرن چلی جاندی اے تے اوہدے نیانے اپنے اپنے کمریاں وچ اپنیاں کل کتاباں کاپیاں اکٹھیاں کر کے اوہناں دے پچھے لک جاندے نیں۔ عبد الغفور جمہوریت دا بڑا حمایتی اے۔ ایس کر کے اوہ پانی توں لے کے پودینے تیکر میری تے مجید دی رائے ضرور پچھدا اے پر کردا اوہ اپنی مرضی اے۔ میں حلوہ پکان توں بعد کچھ سیانا ہو گیاں تے ہن کھان پکان بارے اپنی رائے کچھ کنجوسی نال ای ورتدا ہاں مجھی مانہہ دی دال مرغی، مٹر کوئی وی شے ہووے

عبد الغفور مینوں تے مجید نوں ضرور دکھانداتے سنگھانداتے پھیر پچھدا اے ”ویکھوتاں ٹھیک اے یا نہیں؟“ پندرہاں بندیاں لئی پوری اے یا گھٹ؟ پچھلے کئی ورہیاں توں میں کچھ ایسیاں آوازاں گھڑ لیاں نیں جیہناں دا مطلب نہ مانہہ ہوندا اے تے نہ ای ہاں جے کرتیں پو لے جیہے نک وچ چھیتی نال ”اوس آں“ کہہ جادوتاں کسے اگلے وقت تہانوں کوئی وی ملزماں دے کٹھرے وچ کھڑا نہیں کر سکدا مسالا بھنن توں پہلاں اوہ اک بڑا ای وڈا چمچا مرچاں دا بھر کے مینوں دکھانداتے ”انور، ایہہ کافی نیں؟ میں پو لے جیہے نک وچ چھیتی نال اوس آں کہہ جاناں۔ پھیر اوہ مرچاں دے کافی ہون بارے مجید دی رائے دی پچھدا اے مجید دا جواب اوہدا اپنا فعل اے عبد الغفور مرچاں نگر وچ پا کے دو چار واری چمچا مار کے کہندا اے میرا خیال اے کچھ گھٹ نیں کیوں انور؟ میں پھیر اوس آں کر جاناں عبد الغفور اک چمچا مرچاں دا ہور بھر کے سانوں دکھانداتے تے ساڈے خیال پچھدا اے ایہہ عمل ہر مسالے لئی اوہ کوئی تن توں لے کے تیہہ واری کردا اے تے میں اوئی واری اوس آوں کر چھڈناں عبد الغفور دی ہٹی وچ کئے مسالے ہوندے نیں ایہہ میں پکی طرح تے نہیں دس سکدا۔ پر اک گل اے کہ ایہہ اک عام گھر دے باورچی خانے وچ نہیں آ سکدے تے ایہناں نوں رکھن لئی اک دکھرا گودام چاہیدا اے۔ اک واری میں اوہدے ڈبے گنن لگاتے اوہنے جھٹ مینوں ٹوک دتا کہن لگا ”نظر نہ لادیو یس۔“ ہر ہانڈی وچ اوہ ایہہ سارے ای مسالے پاؤندا اے جے کر غلطی نال اوہ کوئی اک ادھا مسالا بھل جاوے تاں مجید نوں ایس غلطی دا جواب دینا پیندا اے تے مینوں بڑ بڑ سننی پیندی اے گنڈھے کتر کتر کے میریاں اکھیاں اینیاں پیڑ کر رہیاں ہوندیاں نیں کہ جدوں عبد الغفور مینوں پچھدا اے۔ سنیں ہن مگر دی آواز کیسی اے؟ اوس دیلے میریاں اکھیاں وچ بڑے موٹے موٹے روڑاں تے سٹھ میل فی گھنٹے والی ہنیری وگ رہی ہوندی اے تے اوس ہنیری دی

شاں شاں وچوں مگر دی شوں شوں وکھری کرنی بڑا اوکھا کم اے عبد الغفور ایس شوں شوں توں مگر دے اندر لا پریش مند اے تے تان دی اک خاص اٹھان تے اوہ مگر دی موری تے پنج دس یا پندرہاں پونڈ پریش والہ بھار رکھ دیندا اے تے ٹائم پیس نوں الارم لا دیندا اے الارم لا ون تیکر عبد الغفور دا پچھلا ورائڈ اکیمیٹی دا کوڑا گھر بن گیا ہوندا اے تے اوہ مینوں نال لے کے اگلے ورائڈ آکھڑا ہوندا اے۔ جدوں مجید سانوں سنبھا دیندا اے تے اسیں مڑ پچھلے ورائڈ آجانے آں پہلی شامیں مینوں انج لگا کہ اسیں کسے ہو ردے گھر آوڑے آں۔ ہن پچھلا ورائڈ اکیمیٹی دا کوڑا گھر نہیں ہوندا کرسیاں رکھیاں ہوندیاں نیں۔ ہر دو کرسیاں لئی ایک تپائی تے ایش ٹرے۔ اک کوئے وچ ہیڑا تے پیا مگر سر سر کر دا اے عبد الغفور مگر دے سُر اں تے مست دارودی بوتل کڈھ لیا ندا اے اوس ویلے عبد الغفور دی مائی اپنی سہیلی نال بہت ضروری گل کر کے مڑ آندی اے۔ تے کمریاں وچوں نیانیاں دے ہسن کھیڈن دیاں آوازاں آون لگ پیندیاں نیں۔ وارو واری مہمان بن سچ کے آپنیاں آپنیاں مائیاں دی انگل پھڑ کے اپڑ جاندا اے نیں مائیاں اک دو جے دے کپڑیاں دیاں تعریفاں کردیاں نیں ہر بھائی گل نوں ٹور کے اجیہے موڑ تے لے جان دی ٹل لاند اے جتھے اپڑ کے اوہ اپنا لطیفہ سنا سکے مجھی تے کولیاں دے لطیفے دی۔ ہر کوئی عبد الغفور نوں سفارش کردا تے اوہ کوئی ڈیڈھ دو واری اپنا گل گھروٹ کے میرے دل تکدا اے۔ ایہہ لطیفہ اک نکی جیہی گل توں شروع ہو یا ورھے لنگھدے گئے تے عبد الغفور ایہدے وچ طرح طرح دے جھوٹ پا وندا گیا۔ ہن ایہدی شکل کجھ اجیہی ہو گئی اے کہ ایہدے وچوں اگلی گل چھانیاں وی نہیں ملدی۔ ہو یا ایہہ کہ اک واری کتے دور یوں مڑ دیاں عبد الغفور جالاں والیاں کولوں ڈولیاں خرید لیا یا۔ عبد الغفور اپنی حیاتی وچ پہلی وار ڈولیاں ویکھیاں سن تے اوہ مینوں بلا کے کچھن لگا کہ ایہہ کیہڑی مچی اے۔ میں اوہنوں ڈولیاں

دی ذات اوہناں دے کنڈیاں دی بناوٹ تے محل وقوع بارے تے اہناں دے بھسن تلن تے شورے دے وکھ وکھ سوادد سے فیصلہ اوہنے ایہہ کیتا جے ایہناں نوں تلیا جاوے۔ تے بیوقوفی اوہنے ایہہ کیتی کہ تلن دا کم میرے سر لا دتا ایہہ ایہناں ڈولیاں دی اپنی ہونی سی کہ ایہہ کوئی بہت زیادہ ای تلیاں گئیاں تے کھانے دی میز اتے بیٹھیاں عبد الغفور اپنے نیانیاں سامنے میرے اتے ایہہ تہمت لائی کہ میں اوہدیاں ڈولیاں چوری کر کے اوہناں دی تھاں کو لے تل دتے نیں۔

کھانے دی میز تے جدوں عبد الغفور دی پکائی ہوئی ہانڈی دا ڈھکنا لہندا اے تے اوہدے وچوں کجھ اجیہاں لپٹاں اٹھدیاں نیں کہ ہر کوئی اپنا ساہ روک لیندا اے تے دارو دا اک ہو رگلاس بھرن لئی دو جے کمرے چلا جاندا اے گرمی ہووے سردی ہووے عبد الغفور دی مائی کل بوہے باریاں کھول کے پورے زور نال پکھا چلا دیندی اے پھیر ہر کوئی عبد الغفور دی ہانڈی دی تعریف کردا اے تے ہر بندہ ایہہ کوشش کردا اے کہ ہر دو جا بندہ ایہہ مزید ارسالن ودھ توں ودھ کھاوے۔ ایس طرح ہتھو تھی چلدا ڈونگھا مڑ عبد الغفور کول بھریا بھرایا اپڑ جاندا اے کل بھائی مائیاں تے نیانے نوکراں دے پکائے کھانے نال ای ڈھڈ بھر لیندے نیں۔ میتھوں ایہہ کھانا وی گھٹ ای کھادا جاندا اے کیوں جو گنڈھے کتر دیاں ہر واری میرے سچے ہتھ دا گوٹھا وی کتر یا جاندا اے تے سچے ہتھ دے گوٹھے تے پٹی بنھ کے کوئی کم وی سدھا نہیں ہوندا دو جے جے کرتیں کھانا کھاندیاں کجھ ہو سوچ رہے ہو دو تاں پھیر وی کھانا گھٹ کھادا جاندا اے اجیہی شامیں کھانا کھاندیاں میں ایہہ سوچ رہیا ہوندا آں کہ آج توں دس پندرہاں دن بعد جس دن وی میرے گوٹھے دا کھڑنڈ اتریا اوس دن عبد الغفور دا ٹیلیفون پھیر آوے گا۔

پٹیاں بنھے ہتھ

پچھلی سونیں ساڈی برساتی چون لگ پئی۔ پہلے تاں اسیں غور یا نہ۔ پر جدوں برساتی اندر پانی کھڑا ہون لگ پیا تے اسیں اپنیاں سنجیاں پرانیاں پیڑھیاں تے ہور نک سک تھلے لے آندا تے جدوں برساتی دیاں کندھاں وچ بجلی بھر گئی تے اسیں برساتی دی بجلی کٹ چھڈی۔ جدوں توں اسیں مکان دا کرایہ ودھان توں نانہہ کیتی اے ساڈے مالک، مکان دیاں سفیدیاں، مرمتاں کرانیاں بند کر چھڈیاں نیں تے ساڈی آمدنی تے خرچے نے کدی وی سنوں سُر ت نہیں آون دتی جے اسیں دو جے دے مکان دیاں مرمتاں کراندے رب سچے ساڈے اتے اپنا ای فضل کیتا ہوندا تے اسیں اپنا مکان نہ بنوالیندے۔ پر پرانیاں منجیاں پیڑھیاں تے دو جا کوڑا کباڑ بیٹھ آن کر کے میری مائی دی طبیعت خراب رہن لگ پئی تے اوہ نیا نیاں نوں گلوں بے گلوں کھان نوں پیندی تے میرے گھر ہوندیاں بھیڑا جیہا مونہہ بنائی پھر دی اخیر اوہنے برساتی دی چھت دی لپائی دا اک پنچ مہینے دا منصوبہ بنایا اوہدے ہر اجیہے منصوبے دی سٹ میری سگرٹاں اتے پیندی اے اکوں میں اپنے چڑا اسی نال کھہیندا

رہناں تے میرے یار بیلی مینوں ویکھ کے اپنے سگرٹ لگالیندے نیں۔ اک دن میں اک مستری نوں بلا کے برساتی دی چھت دکھائی اوہ بڑی دیر تیکر برساتی دی چھت اتے سیر کردار ہیاتے ناں کتے کتے پیر مار کے مونہوں ٹخ ٹخ کر دا پھیر اوہ میرے کولوں پیسے لے کے اک گڈ مٹی تے دو من توڑی لین چلا گیا میں ایہہ سوچ کے جے اج لپائی ہو جاوے دفتر وں چھٹی لے کے گھر بیٹھا رہیاں میں پنچ و جے اوہ گڈ لے کے مڑیا تے مٹی پیٹھ ا حاطے وچ سٹا کے ایہ کہہ کے اپنے گھر ٹر گیا کہ توڑی فجرے آوے گی مٹی دی اک گڈ نال سانوں اک دھاڑی پے گئی میری مائی میرے نال اوکھا ہو کے بولی تے میں اوہنوں سمجھایا کہ شکر کر رب دامتسری دھاڑی نال ادھ گھنٹے دا اوور ٹائم نہیں منگ لیا اگلے دن فجرے دس و جے توڑی آئی اج مستری اپنے نال اک مزدور دی لے آیا سی اوہ مزدور مٹی دے ڈھلیاں نوں آپس وچ لڑا کے اوہناں دے نکے نکے ڈھیلے بنان لگ پیا تے مستری توڑی وچوں کنک دے دانے چکن لگ پیا ہر ادھے گھنٹے بعد مستری میری کولوں پن لئی پانی منگواندا تے ہر اک گھنٹے بعد مزدور نوں چلم بھرن لئی ہندا شامیں چار و جے تیکر مستری کنک دے دانے چکدا رہیا تے نال مٹی تے توڑی وچ ملاوٹ تے دنیا توں خدا خوفی دے اڈ جان دا گلا کردار ہی چار و جے مزدور نے مٹی اکٹھی کر کے اوہدے اپر توڑی دا ڈھیر لا دتا تے ماشکی نوں بلان چلا گیا۔ چار توں پنچ و جے تیکر مستری ٹھنڈی چلم تے مزدور بارے بھیڑیاں بھیڑیاں گلاں کردار ہی پنچ و جے مٹی تے توڑی نوں باراں گھنٹیاں مکر پانی پن داکم دے کے مستری پاڈیڑھ پاکنک دے دانے اپنے پر نے وچ بنھے تے مزدور اپنی روٹی والی خالی پوٹلی پھری اپنے اپنے گھر ٹر گئے تے میں چوراں میں اپر چڑھ آیا اگلے دن جدوں مستری نے مٹی تے توڑی نوں ویکھیا تے اپنا سر

پٹ لیا۔ کم چوری دی وی کوئی حد ہوندى اے۔ توڑی تے مٹی نے پورا پانی نہیں سی پیتا باراں وے تیکر اوہ تے مزدور ایس مٹی توڑی دے ڈھیر توں ذرا پرے بیٹھ کے حقہ پیندے رہے تے توڑی تے مٹی نوں پانی پیندیاں ویکھدے رہے اج میں اک گھڑا پانی داتے اک پکا گلاس اوہناں دے کول لیا رکھیا سی ایس کر کے نہ تے مستری تے نہ ای مزدور نوں پیاس لگی باراں توں اک وے تیکر مزدور اپنا دا گنڈھا پیاز دا اک روٹی نال کھاندا رہیا شاید مستری دی روٹی دے نال پیاز دا گنڈھا وی نہیں ہوندا یا اوہ مزدور نوں صلح مارن توں ڈر دا پر مستری اپنی روٹی کتے کلیاں جا کے کھاندا جدوں اوہ روٹی کھا کے مڑیا تے دوویں حقہ پین بہہ گئے تے ڈھیر بارے گلاں کرن لگ پئے اخیر مزدور نے بڑے دکھ نال اپنی چادر اپنے توں دکھ کیتی تے اللہ دانائے لے کے ڈھیر وچ جا اتریا کبھی تے اوہ لیانی بھل ای گیا سی تے مستری کہیا ”بابو جی ذرا ایہنوں اٹھ آنے پھڑانا اٹھ آنے پھڑن توں پورے اک گھنٹے بعد کبھی آئی ہن مستری ڈھیر توں پرے بیٹھ کے مزدور نوں ڈھیلیاں دے نام پتے دس لگ پیا تے مزدور مستری دے دسیاں ڈھیلیاں نوں اپنی کبھی تے پیراں نال پھین لگ پیا دو گھنٹے بعد گھانی تیار ہو گئی تے مستری نے اک لماں ساہ کھن تے کڈھن بعد کہیا لو بابو جی اک کم تے ہو گیا ہن کل لپائی ہو جاوے گی لپائی لئی تن مزدور راں دی لوڑی اک مزدور نال لپائی تن دن لوے گی تے مستری دیاں دیہاڑیاں دکھ ہو جان گیاں تے مستری ایہہ نہیں سی چاہوندا کہ اوہ دے بابو دا ودھ خرچہ ہووے ایہناں تناں مزدور راں وچوں اک داکم اگ بالنا تے چلم بھرنا سی دو بے داکم ہر چلم لئی باہروں تمباکو لیانا تے تیرا ہر گھنٹے بعد اک تسلی مٹی دی مستری نوں برساتی اُتے پھڑا آ وندا ایہہ تنوں مزدور ہر فن مولاسن ایہناں وچوں ہر کوئی تنوں کم جاندا سی ایہی کہ چلم بھرن

والا مزدور بازاروں تمباکو دی لیا سکدا سی تے مٹی دی تسلی وی مستری نوں پھڑا سکدا سی ایس طرح باقی دے مزدور وی اک دو بے داکم کر سکدے سن اصل وچ ایہہ تنوں مزدور اک دو بے نال واری واری کم وی وٹاندے رہے تے مستری برساتی دی چھت اُتے بیٹھا مٹی دی اگلی تسلی دے آن تیکر ایدھر لیاں او دھریاں چھتاں اُتے کپڑے سکے پان والیاں مائیاں نوں نکدار ہندا شا میں مائی میری مینوں مزدور راں دے پیسے کجھ ایس طرح پھڑائے جیویں کوئی بیمار تاپ ٹن تے نیاز وٹا اے اوس راتیں جدوں تیکر میں ستا نہیں مائی میری بڑ بڑ کر دی رہی اصل وچ اوس نیک بخت نوں کدی حساب نہیں آیا۔

ہر کم اپنا وقت تے اپنے پیسے لیندا اے تے ہر کے اپنی روٹی تے پیاز دا گنڈھا کسے طور تے کمانا ہے ایہدے وچ بڑ بڑ کرن دی کبھیہ لوڑا اے۔

اگلے دن دن مائی مزدور راں مستریاں دی جان تے میری پھوہڑ پنے نوں روپ پٹ کے اپنے چلھے چوٹے نوں لگی ہوئی سی تے میں اپنیاں لتاں اپنے اگے کھلاری اخبار وچ اک بڑی مزیدار خبر پڑھ رہیا سی جیہدے وچ رپورٹر نے اک نقلی پیر دے ہتھوں اک غریب مائی دی آبرو لٹن دی کہانی کجھ ایس طرح لکھی ہوئی سی جیویں ایس کل واردات دی ہر کئی تے گئی گل اوہنے اپنی اکھیں دیکھی ہووے اپنے وچ پوڑیاں وچوں آواز آئی ”بابو جی“ میری مائی چھال مار کے باورچی خانیوں باہر نکلی تے مینوں کچھن لگی ایہہ پھیر کون آیا اے؟ ایہدے وچ میرا کبھیہ قصور میں کہیا پچھناں کوئی تیسری کاٹھی بھل گیا ہووے گا مستری اک سفیدی والا ڈبہ تے اک کوچی پھڑی پوڑیاں وچ کھڑا سی اوہنے سوچیا کہ پوڑیاں وچ سفیدی تے سانوں کرانی ای پوگی پھیرا یہ سوچ کے کہ بابو کتھے بے ایمان مستریاں دے پچھے

خراب ہوندا پھرے گا آپوں ایک کوچی ڈبہ لے کے آگیا۔ پوڑیاں وچ سفیدی کران دی ساڈی کوئی نیت نہیں سی پر تسلی والا مزدور اپنے مٹی بھرے ہتھ پوڑیاں دیاں کندھاں اتے ٹیک کے چڑھدا اتردار ہیا سی پھیر میں دسیاناں کہ ایہہ تنوں مزدور تسلی لیان لیجان داکم بارو باری کر دے رہے سن۔ نفسیات دے استادان دا کہنا ہے کہ ہر بندہ ہر دو جے بندے کو لوں دکھ طریقے نال اپنا ہتھ کندھا اتے ٹیکدا اے تے ایہناں تنوں مزدوراں وی دکھ وکھ نفسیات نے پوڑیاں دیاں کندھاں اتے کچھ اولڑے تجریدی نقش نگار بناد تے سن مکدی گل ایہہ کہ مستری تے اک مزدور نے رل کے اوس دن ساڈیاں پوڑیاں وچ سفیدی کیتی شامیں دیہاڑی لین لئی اپر آئے تے مستری اپنا ڈبہ تے کوچی وی نال لے آیا۔ پیسے لین توں بعد اوہنے ساڈے پچھلے ورائنڈے نوں اپروں پیٹھوں تے جیون کھبوں تکیا پھیر مینوں غور نال ویکھ کے کہن لگا بابو جی لگدا اے سفیدی ہندو آں دے جان توں پہلے وی ہوئی اے پھیر اوہنے کوچی سفیدی دی بھر کے ورائنڈے دیاں کندھاں اتے پنج ست تھاں پھیر دتی ہن تیکر اسیں ایہہ سمجھدے رہے سی کہ ساڈے ورائنڈے دی سفیدی چنگی بھلی اے پر ایہہ پنج ست بے تکیاں کوچیاں لگن توں بعد سانوں ورائنڈا کچھ اجیہا جاپن لگا جیوں کسے پکے رنگے دے بندے نوں پھلہری ہوئی ہووے۔

اگلے چار دن ساڈے تن کمریاں تے دو ورائنڈیاں وچ سفیدیاں ہوندیاں رہیاں سفیدیاں داکم مک گیا تے کمریاں وچ ہنیرا تے گھٹ گیا پر سفیدی کندھاں اتے گھٹ تے بوہیاں تاکیاں اتے ودھ پھیری ہوئی سی پھیراک دن اوہ رنگ روغن لے کے آگیا تے سانوں بوہیاں تاکیاں نوں رنگ کرانا پے گیا کندھاں تے بوہیاں تاکیاں دی طرح ہن رنگ روغن بوہیاں تاکیاں اتے گھٹ سی تے شیشیاں اتے ودھ شیشیاں اتوں رنگ کھرچنا

بڑی کاریگری داکم اے اگلے دیہاڑے اوہنے ساڈے شیشیاں اتوں رنگ کھرچیا تے تیہاں وچوں ستارھاں شیشے ٹٹ گئے۔ ایہناں شیشیاں دے ٹٹن دا اوہنوں کوئی دکھ نہیں ہو یا کیوں جے ایہہ شیشے بالکل کچے سن تے ایہناں دا ٹٹنا ای اچھا۔

اوہدے اک یار بلی دی شیشاں دی دکان سی جتھوں اوہ بڑے ای پکے تے سستے شیشے لیا کے بڑی گھٹ مزدوری تے جڑسکد اسی گل تے اوہدی جی لگدی سی پر زندگی وچ پہلی واری میں نہ کیتی تے ایس نہ اتے اڑیا رہیا۔

اگلے کئی دن مائی میری فرشاں توں سفیدی تے رنگ کھرچدی تے دھوندی رہی تے ننگے پیریں پھرن نال اوہنوں نزلہ زکام ہو گیا۔ اک دن میں بازاروں ستارھاں ثابت شیشے لے کے ٹریا۔ پر گھر آ کے ویکھیا تے اوہناں وچوں چھ ٹٹے ہوئے سن۔ جدوں ایہناں شیشاں نوں بوہیاں تاکیاں وچ جڑن لگا تے مینوں پتہ لگا کہ ایہناں شیشیاں وچ تے مقناطیس بھریا ہوا اے ہتھوڑی کل نوں لگن دی تھاں مڑ گھر شیشے نوں وجدی جے کر میں کچھ ودھ کاریگری نال ہتھوڑی نوں ورتدا تے شیشے دا مقناطیس ہتھوڑی دا مونہہ کچھ ایس طرح موڑ دیندا کہ اوہ میریاں انگلاں اتے وجدی ایس طرح گیاراں شیشیاں وچوں پنج شیشے ٹٹ گئے میرے کھبے ہتھ دا گوٹھا تے دو انگلاں پھٹن ہو گئیاں تے شیشیاں ٹٹدے ویلے میرے بچے ہتھ اتے اک لماتے کنے ای نکے نکے چیر پادے۔ باقی چھیاں شیشیاں وچوں چار ٹٹے ہوئے نیں پر ایہہ چار ٹٹے تے اوہ ان ٹٹے شیشے دی کچھ ایس طرح انکے ہوئے نیں کہ بندے دے بولن نال ستارواں گوں چھٹندے نیں پتہ نہیں ایس کر کے میری مائی میرے نال بول چال بند کر چھڈی اے۔

اج کل جے کر میں کسے بندے دے ہتھ اتے پٹیاں بنھیاں ویکھداں تے میرا جی کردا کہ اوہنوں پچھاں بھائی توں وی اپنی برساتی دی چھت اتے مٹی دی لپائی کرائی سی؟

شاہکار کہانی

دو جا حوالاتی بولیا: تھانیدار کچھ کہیا تے سی پرہن میں بھلداں آں اوہناں
کیہڑی دفعہ میرے اُتے لائی اے۔

پہلا حوالاتی کہن لگا: باؤ! قانون جانیوں بناں واردات کرن نال بندا بے
گناہیں مار یا جاندا اے۔

دو جے حوالاتی کہیا: گامیا، قانون ولوں تے میں اکا ای کورا آں۔ انج
چوداں جماعتاں پاس واں سولاں وی کرلیندا تے پھیر وی ایہو کردا جو کردا آں۔

پہلے حوالاتی کچھیا: پر باؤ توں کردا کیہ ایس؟ گنڈھ کچی؟ نوںس بازی؟ ایڈیاں
موٹیاں موٹیاں توں عینکاں لائیاں نیں تے بانہاں تیریاں کانیاں ورگیاں نیں کوئی
جنیاں والا کم تے توں کیہہ کر سکدا ایس؟

دو جا حوالاتی بولیا: نہیں گامیاں، میں تے قلم کھائی کردا آں۔

پہلے حوالاتی کچھیا: ایہدے وچ پیدا تے چنگی ہونی اے باؤ؟

دو جا حوالاتی کہن لگا: نہیں گامیاں، کہانیاں لکھن وچ پیدا ہوندى تے میں

کھرکی کیوں کردا۔ ایہہ تے رب دی ماراے۔ کسے پیر فقیر دی بد دعا کہ بندا لکھاری
بن جاندا اے۔ مینوں جا پدا اے مینوں میرے اک استاد دی بد دعا اے۔ اوہ کالج
وچ سانوں پڑھاندا سی۔ پڑھاندا گھٹ سی پروغظ و دھ کردا سی اوہدا کہنا سی جے بندا
کچھ ای کرے پر اوہدے وچ نام پیدا کرے۔

تے میں کالج چھڈ نوں بعد بڑی دیر تیکر کوئی اجیہا کم لوڑ دار ہیہا جیہدے نال
سوکھیاں نام پیدا کر سکاں پر کچھ نہ سمجھیا اک دن میرے اک بلی مینوں صلاح دتی کہ
کہانیاں لکھیا کر کہانیاں لکھن دی مینوں کی جاچ نہیں سی تے ایس بلی میں نوں پنج
چھ انگریزی دیاں پرانیاں کتاباں لیا دتیاں تے کہن لگا ایہناں کہانیاں دے ترجمے کر
کے اپنے نام میں چھو لیا کر۔ ایہہ بڑا کم دانشہ نکلیا گامیا، میریاں کہانیاں اخباراں
رسالیاں وچ چھپن لگ پیاں۔ ایڈیٹر مینوں کہانیاں لئی فرمائشاں پان لگ پئے تے
پڑھے لکھے لوکی مینوں بڑا اچا لکھاری جان لگے پھیر رب دا کرنا اک دن میرا تے
میرے ایس بلی دا کچھ جھگڑا جیہا ہو گیا ایویں چاء دے بل اتے۔

پہلا حوالاتی بولیا: تے اوہنے تیری مخبری کردتی؟

دو جا حوالاتی کہن لگا: پتہ نہیں، اوہ تے ہن تیکر قسماں کھاندا اے پر اوس
جھگڑیوں بعد لوکی رسالیاں اخباراں وچ میرے خلاف مضمون لکھن لگ پئے تے
جیہدے مینوں اچا لکھاری جاندا ہے سن ہن مینوں چور ڈاکو کہن لگ پئے میرا جی کھٹا
ہو گیا گامیا تے میں کہانیاں لکھنیاں بند کر چھڈیاں پر ایہدے نال میری طبیعت
خراب رہن لگ پئی پھیر مینوں کھنگھ لگ گئی تے نال ہلکا ہلکا تاپ وی رہن لگ پیا۔
میں اک ڈاکٹر کول گیا ایس ڈاکٹر میریاں کہانیاں پڑھیاں سن پر جا پدا اے کہ اوہنے
میرے خلاف مضمون نہیں سی پڑھے۔ کہن لگا ”بہت دناں تے تہاڈی دن کہانی نہیں

پڑھی، میں کہیا ڈاکٹر جی تہا ڈے کولوں کیہ لکونا۔ تے میں ڈاکٹر نوں کل قصہ کہانیاں تے تاپ کھنگ دا دیا ڈاکٹر بڑا سیانسی اوہنے مینوں دوائی دتی تے نال کہن کہانیاں لکھدارہ ایہہ دنیا کہانیاں نال بھری ہوئی اے اتھے ہر گھر، ہر سڑک بازار وچ کہانیاں ای کہانیاں نہیں تیرے اندر باہر آ لے دوالے سبھ پاسے کہانیاں نہیں۔ ایہناں نوں کولوں ویکھ بہت کول ہو کے اپنے اندر جھاتی پا کے دو جیاں دے دلاں وچ جھاتی پا کے ویکھ تے پھیر کہانی لکھ۔ ڈاکٹر دی ایہہ گل میرے دل لگی تے گھر کے میں اپنے گھر دے آ لے دوالے ویکھیاں۔ اک مٹے جیسے گھر وچ اک نائی اوہدی مائی تے نیا نے نائی دا اک بھائی اوہدی مائی تے نیا نے تے ایہناں دوہاں بھائیاں دے بڈھے ماں پور ہندے سن میں سوچیا جتھے اپنے سارے جی اکو کمرے وچ رہندے ہوں او تھے کہانی لئی کتھے تھاں ہو سکدی اے۔ ہوراں گھراں وچ بھڑیاں بھڑیاں مائیاں ڈھلے میلے کپڑے پائی دن بھر کیڑیاں وانگوں اپنے کمرے رجھیاں رہندیاں تے وچ وچ ساہ لین لئی اپنے نیانیاں نوں گاہل مندا کر دیاں ایہناں لوکاں دی کیہ کہانی ہو سکدی اے؟ کچھ نہیں۔ ویلا لگھندا گیا، گامیا۔

پھیر کر نارب دا اک دن میرے کمرے دے بالکل سامنا دفتر والا چوبارہ خانا ہو گیا تے اوہدے وچ اک میاں بیوی تے اوہناں دا اک چھ کوڑھیاں دا پتر آ کے رہن لگ پئے ایہہ ٹبر صاف ستھرے کپڑے پانداسی کرسیاں اتے بیٹھ کے روٹی کھانسی ایہہ بھائی کوئی چھوٹا موٹا ایکٹریسی مائی بہتا ویلا شیشے اگے بیٹھی رہندی تے فلم گانے گاندی تے بھائی گل گل اتے اچی اچی ڈائلاگ بولد میں سوچیا ایس گھر وچ کہاں اے۔

ایس گھر دے ڈھائی کمرے سن اک کمرہ اوہناں دی بیٹھک تے کھانے

کمرہ دو جاسون دا کمرہ تے تیجا ادھا باورچی خانہ سی ایہناں دیاں تنوں تاکیاں ہر ویلے کھلیاں رہندیاں پر میں اپنے کمرے دیاں دونوں تاکیاں بند رکھنا ساں تاں جے ایہہ میری دور بین نہ ویکھ لین میں اپنی اک تاکی اتے کالا پڑا پایا ہو یا سی تے ایس پڑ دے دے وچ اک گول موری کیتی ہوئی سی تے ایس موری راہیں میں دور بین وچوں ایہناں دے کل کاروبار ویکھدا تے دوروں سنن والے آ لے نال ایہناں دیاں گلاں وی مینوں صاف سنائی دیندیاں دو مہینے تیکر میں ایہناں نوں دُور بین وچوں ویکھدا رہیا تے ایہناں دے ڈائلاگ لکھدار ہیاں پر جدوں وی میں بیٹھ کے ایہناں دیاں گلاں وچوں کہانی لوڑی تے گامیا کہانی والی گل نہ بنی۔

پھیر، کل شامیں ایہہ ایکٹر بھائی کتے گیا ہو یا سی مائی ایہدی نے اپنے پتر نال بیٹھ کے روٹی کھائی تے پھیر گھڑی گھڑی اپنی گھڑی ویکھن لگ پئی۔ پر بھائی نہ آیا تھوڑی دیر بعد اوہنے ہانڈی روٹی جالی وچ رکھ دتی تے آپوں کپڑے بدل کے مڑ گھڑی ویکھن لگ پئی کوئی ساڈھے نوو بجے اوہ بھائی گھر آیا تے مائی شیرنی وانگوں اوہنوں پئی تے اپنے گھڑی والی بانہہ اوہدے اگے کر کے کہن لگی یہ وقت تمہارے آنے کا؟ ہاں تے گامیا، ایہہ مائی جھنگ مگھیا نے دی بولی وچ اردو بولدی سی تے بھائی بہت اوکھی تنگ موہری والی اردو بولد اسی بھائی بڑی عاجزی نال آکھیا ساہ وی لے لین دے بھلیے مانسے گھر وڑ دیاں ای ڈرامہ شروع کر دتا اے مائی چکی اوہناں چھنالاں نال تیراجی ودھ لگدا اے تے بھائی بولیا نیک بختے او تھے کوئی چھنالاں نہیں سن میں گلاب خاں تے نذیر بیگم اک پروڈیوسر دیاں خوشامداں کر رہے سی ویکھیں ناں روٹی لئی بندے نوں کیہ کچھ کرنا پیندا اے۔ مائی پھیر چکی ایہہ روٹی اے جیہڑی توں سانوں دیندا اے؟ ایہدے کولوں چنگی تے اک دیہاڑی دار دے گھر پکدی

اے مائی آکڑ دی گئی بھائی آپوں جا کے روٹی چک لیا یا تے اک تپائی اپنے سامنے کھج کے روٹی کھان بہہ گیا اوہنے اک برکی دو کووار چتھی ہونی اے کہ انج بھڑک کے اٹھیا جیویں اوہدے مونہہ وچ دھند اکولا پے گیا ہووے پھیر اوہ نٹھ کے باورچی خانے گیا تے کر لیاں کرن لگ پیا پھیر اوہ پانی دا اک جگ پھڑی مڑیا تے مڑ آپنی روٹی اتے بہہ گیا ہن اوہ ہر برکی روٹی دی لاون نال چھوا کے مونہہ وچ پاند اتے پھیر بڑا ای بھیرا جیہا مونہہ بناند اتے اپروں اک گھٹ پانی دا پنی لیندا۔ مائی اک دوواری ہلی پر بھائی اکھیاں نیویاں پائی رکھیاں تے روٹی گلیوں لاہندار ہیا اخیر مائی تنگ پے کے اٹھ کھلوتی تے پہلواناں وانگوں آکڑ کے کھڑی ہو گئی تے کہن لگی مونہوں کیوں نہیں پھندا گھر دی روٹی کیویں تیرے نک پٹھ آوے ہوٹلاں دے تے کباب ای پسند نیں تینوں تے توں کتھوں دا خاندان مغلیہ دا آخری چشم و چراغ آیا ایں کہ تیرے لئے تتریاں دیاں جھجھاں تے بیڑیاں دے مغزای ہونے چاہیدے نیں پر بھائی اکھیاں نیویاں پائی پانی نال برکیاں لاہندار ہیا شاہی محل کچھ چھڈ آیا ایں۔“ تے مائی بولدی گئی آگیا بلند شہروں پاکستان فتح کرن لئی۔ بانہاں ہلاند کجھ پتہ وی اے اگلے پچھلے تیرے کون سن؟ بھائی نے اپنے متھیوں پسینہ پونجھیا تے سگرٹ سلگالیا تے مائی پچھیا کدی اوقات وی پچھانی اے اپنی؟ پر بھائی اکھیاں مٹی متھے تے تیریاں پائی سگرٹ پیندا گیا مائی پھیر گئی کیہہ ہو گیا اے؟ دندل کیوں پے گئی اے؟ بڑے ڈائلاگ بولد اسی پہلے تے ہن بھائی کہنیاں اپنے پٹاں اتے ٹیک لئیاں تے ”یا میرے اللہ“ کہہ کے اپنے دوہاں ہتھاں نال اپنے سرنوں شکنجہ جیہا پالیا۔

میں سوچیا کہ ایہہ مائی تے اوہ مائی نہیں جیہڑی شیشے اگے بیٹھی فلمی گانے گاندی سی۔ غصے وچ بندے دا اصل نکل کے آکھلوند اے گا میا، ایس مائی دے بول اگ

دے بھانڈن۔ میں کہانی بارے بالکل بھل گیا سی ایہہ ذلیل عورت اک غریب فن کار دے تے بوٹیاں کر رہی سی ایس ڈائن نوں جیون دا کوئی حق نہیں۔ ایہناں سوچاں وچ مینوں نیند آگئی تے میں ویکھیا کہ اوس بھائی اپنے جیب وچوں اک قلم کڈھیا ایس قلم دی نب چاقو ورگی سی تے ایہہ نب ودھدی ودھدی اک خونخوار خنجر بن گئی۔ پھیر ایہہ خنجر اوس ڈائن دی شاہ رگ اتے سی۔ اوہ چیک مار کے اٹھی۔ میری اکھ کھل گئی پر اوہ چیک حالے تیکر میرے کمرے وچ گونج رہی سی اک ہوہر چیک آئی تے میں چھیتی نال مڑ کے دور بین وچوں تکیا تاکیاں اتے پردے پے گئے سن پر اندر بتیاں بل رہیاں سن تھوڑا جیہا چرپا کے مائی دا پر چھاواں سر پھڑی چیکاں ماردا پڑدے اتے دی لنگھیا تے اوہدے کچھ بھائی دا پر چھاواں ڈنڈا پھڑی۔ پر چھاویں لنگھ گئے تے ڈنڈے دے سرو وچ وچن دی آواز آئی کھٹاک کھٹاک، کھٹاک مائی دیاں چیکاں ہولی پے گئیاں تے اخیر اوس کتورے دی چوں چوں وانگوں چپ ہو گئیاں جیہڑا بس پٹھ آگیا ہووے پھیر اوہناں دے پتر دی آواز آئی ابا جی امی نوں کیہہ ہو گیا اے؟ میں سوچیا ہو کیہہ گیا اے؟ ایس عورت دی ایس ڈائن دی اخیر ایہو ہونی چاہیدی سی میں پھیر سوچیں پے گیا نہیں بالکل نہیں۔ زندگی بھتوں مقدس شے اے کسے نوں ایہہ حق نہیں پہنچدا کہ اوہ کسے جی نوں جیوں مارے۔ نہیں ایہہ تے اک بہت غلط گل ہوئی اے قتل تے قتل دی اطلاع پولیس نوں ضرور دینی چاہیدی اے تاں جے قانون کسے جی نوں جیوں مارن والے نوں جیوں مار سکے میں گھروں نکلیا کجھ ہوہر لوکی وی گلی وچ آگئے سن میں ٹھدیاں پھنور سویٹ ہاؤس اپڑیا تے پولیس نوں فون کیتا تے مڑ آکے گلی دے موڑ تے پولس نوں اڈیکن لگ پیا لوکی مڑ اپنے گھراں وچ وڑ گئے سن جدوں میں پولیس نوں نال لے کے واردات والے گھر

اڑیا تے بھائی اکھیاں ملدیاں بوہا کھولیا سانوں ویکھ کے اوہ بڑا حیران ہویا تے ساڈے آون دا سبب پچھیا۔ سچ پچھیں گامیاں اوس ویلے اوہ بڑی ودھیا اکیٹنگ کر رہیا سی پھیر بڑے اوکھے اوکھے ڈائلاگ بول کے تے اکیٹنگ کر کے اوہنے ساہنوں دسیا جے اوہدی بیوی قتل نہیں ہوئی کہن لگا اوہ اک چوہی کولوں ڈرگئی سی تے میں اوہ چوہی مار دتی تھانیدار پچھیا اوہ موئی چوہی کتھے اے؟ تے بھائی کہن لگا اسیں مویاں چوہیاں گھروچ نہیں رکھدے اوہ تا کیوں باہر سٹ دتی سی میرا یقین نہ ہووے تے میری بیوی کولوں پچھ لوو پھیر اوہنے اپنی مائی نوں آواز دتی تے اوہ شرمندی اپنی چنی ٹھیک کر دی آگئی تھانیدار پہلے ایکٹرنوں پھیر اوہدی مائی نوں تکیا تے پھیر مینوں گھورن لگ پیا ہن تھانیدار اوہناں کولوں تکلیف دی معافی منگ کے مینوں تھانے کھڑن دے پیش پے گیا میں اوہنوں بڑا سمجھایا کہ ایہہ اک غلط فہمی والی گل ہوئی اے تے ایہدے وچ میرا ایہہ منشا بالکل نہیں سی جے میں پولیس نوں تے ایہناں شریف لوکاں نوں تنگ کراں پر تھانیدار اپنی گل تے اڑیا رہیا۔ غلط فہمی والی گل تے اوہنے سن لئی پر اوہ مینوں ایس لئی تھانے کھڑنا چاہندا سی جے میں لوکاں دے گھراں وچ جھاتیاں ماردا آں تے قانون دی نظروچ ایہہ اک جرم سی ایکٹر بولیا تھانیدار صاحب، ایہہ جھاتیاں وی دور بین نال ماردا اے اوہ سامنی تاکی دے کالے پردے پچھے ایہنے دو مہینیاں توں اک دور بین گڈی ہوئی اے ساڈے گھر دا نشانہ بنھی مینوں فکر پے گئی میں سوچیا یا اللہ، ایہہ سبھ سفنسی یا میرے نال دھرو ہو یا اے ایہ کل جھگڑا چیکاں، چوہی ایہہ سب اکیٹنگ سی؟ ایہہ گل ڈرامہ مینوں پھسان لئی کھیڈیا گیا؟ ہن اوہناں دانکا پتروں آگیا تے کہن لگا ”ابا ابا میری اکیٹنگ کسی سی؟ اوہدے اے کیہا بہت اچھی بیٹا پھر اوہ بھائی اک تھ میرے ول تے اک میری

تائی ول کر کے کہیا ہن ایہہ بھائی اوس تاکی وچوں ساڈے گھر کدی جھاتیاں نہیں مارے گاتے میں سرنیواں پا کے تھانیدار دے نال ٹر پیا۔ پہلا حوالا تی بولیا: باؤ ایہہ تے بڑی مزے دار کہانی اے۔“ دو جا حوالا تی سوچیں پے گیا، پھیر اپنے آپ نال گلاں کرن لگ پیا مزے دار کہانی، بہت اچھی کہانی، شاہکار کہانی، پھیر اوہ چھال مار کے اٹھیا تے حوالا ت دے بوہے دیاں سیخاں نال گھلن لگ پیا۔ محرر دے کمرے وچ اک سپاہی آ کے کہن لگا ”حوالدار جی دور بین والے بابو بڑا رولا پایا ہوا اے، اوہنوں قلم کاغذ دے کیوں نہیں دیندے کہ اوہ اپنی کہانی لکھ لوے۔“

ہمیر

کوئی اٹھوارے گو دی گل اے کہ جمیل میرے کول دی ہتھ ہلا کے لنگھیا تے میں
دو جے پاسے مونہہ موڑ لیا ہن اوہ تھاں کتھاں میرے خلاف تقریریاں کردا پھر دا
اے تے لوکاں دے دلاں وچ میری دماغی صحت بارے شک شبھے پاؤندا پھر دا
اے۔ میرے خلاف تقریر کردے سے اوہ وچلی گل سروں ای کھا جاندا اے۔ گل
ایہہ کہ جس دن اوہ ہتھ ہلا کے لنگھیا تے میں دو جے پاسے مونہہ موڑ لیا اوس توں
اٹھوارا کو پہلاں احمد نے پارٹی دتی سی احمد نوں پارٹیاں دین دا بڑا شوق اے
اوہ دے بزرگ وڈے زمیندر تے رئیس سن۔ نال سیاست دا کاروبار وی کردے
سن۔ وقت لنگھدیاں زمیناں دی ونڈی پیندی گئی۔ تے احمد فیصلہ ایہہ کیتا کہ اوہ دے
حصے دے مربعے اوہے مربعے نال سیاست نہیں چل سکدی تے اوہنے سیاست دا
کھیہڑا چھڈ سرکاری نوکری کر لئی باقی رہ گئی رئیس۔ رئیس وی پیسے نال ای ہوندى
اے پر کجھ لوکی پھانک ہوندىاں وی دلوں رئیس ہوندے نیں احمد دو جے تیجے مہینے
اک لمی چوڑی پارٹی ضرور کر چھڈ دا اے بھانویں اوہنوں پٹھاناں کولوں قرضہ ای

لینا پوے ایہناں پارٹیاں اتے اوہ ماوے نال آکڑے افسراں تے سفیراں توں لے
کر ٹنیاں چپلاں والے شاعراں تے میلیاں بش شرٹاں والے اخبار نویسوں
بلاؤندا اے اوہدی مائی نوں ایہہ کچھڑ چنگا نہیں لگدا پر احمد اپنی جھوٹھی رئیس نال اک
ادب پرستی تے فن پچھانی دی پونچھ وی نہی ہوئی اے اپنی ہر پارٹی وچ اوہ ایس
پونچھ نوں لشکا چمکا کے پیلاں پاؤندا پھر دا اے اوہدی ایس پارٹی اتے میں تے جمیل
اوہدی ایس پونچھ دے دو پرساں۔

جمیل شعر کہندا اے تے اوہدی شعراں دی اک کتاب وی چھپ چکی اے
میرے خلاف تقریریاں کرن توں پہلے اوہ اوس بندے دے خلاف تقریریاں کردا
ہوندا سی جیسے اوہدی کتاب چھاپی سی جمیل نوں امید ایہہ سی کہ کتاب چھپن توں بعد
اوہ گھٹو گھٹ لکھ پتی تے ضرور ہو جاوے گا پھیر کلر کی چھڈ کے اپنا چھاپہ خانہ لاوے گا
تے دنیا دے کل غریب لکھاریاں دیاں کتاباں مفت چھاپے گا پر جس بندے جمیل
دی کتاب چھاپی اوہ اپنی تھاں جمیل دی شاعری تے اپنے نصیباں بارے گلاں کردا
پھر دا اے جمیل نوں وارث شاہ نال بڑا پیار اے کچھ جیسے اوہ ایس گل بارے پھر ولا
پھرالی کر رہیا سی کہ وارث شاہ سویر ویلے کیہ کھاندا سی ایس پارٹی تے جمیل نے
کھانے دے نال پین پلان دا وی چنگا چوکھا بند و بست کیتا ہو یا سی ہن جیہڑا شاعر
اپنی دال روٹی لئی کلر کی کردا ہووے اوہ اپنے پلیوں تاں نہیں پی سکدا ناں تے
پارٹیاں روز دیہاڑے نہیں ہوندیاں۔ احمد دی پارٹی تے جمیل اوٹھ وانگوں اگلی
پارٹی تیکر دا کوٹاپی جاندا اے شروع شروع وچ اوہدی جیہڑ موٹی ہو جاندی اے تے
جس ویلے احمد اوہنوں دو جیاں لوکاں نال ملاندا اے اوس ویلے جمیل توں بولیا نہیں
جاندا بولن دی تھاں اوہ وقت ٹپائی لی مسکان دی کوشش کردا اے ایس کوشش دا نتیجہ

ایہہ ہوندا اے کہ اوہدے بلھ کجھ ایس طرح کھل جاندا ہے نیں جیویں سکی لکڑ وچ تریڑ آئی ہووے۔ جدوں کوئی مائی اوہدے بھیڑے شعر دی تعریف کردی اے اوہ پھیر وی مسکاندا رہندا اے ایس طرح احمد جمیل نوں اک نکلے اکھتوں دو جے نکلے اکھ کھڑا اے تے لوکی ایہہ جان کے کہ اوہ شاعر اے اوہدی تعریف کردے نیں سکی تعریف ای نہیں سگوں ہر کوئی اوہنوں احمد دی شراب دا اک گلاس وی پیش کردا اے جس ویلے اوہ مڑ میرے کول آ کے ہندا اے تے پندراں ویہہ گلاس اوہدے اندر ہوندے نیں اک ہتھ وچ تے مونہہ اُتے اک نہ مکن والی مسکان میرے کول بیٹھ کے وی اوہ ہر گلاس والے نوں روک کے اوہنوں اپنا خالی گلاس پھڑا ہوندا اے تے بھریا چک لیندا اے ایس طرح اوہ ایہناں غریب گلاساں والیاں دا بھار ہولا کردار ہندا اے۔ اوہنوں پتہ نہیں کسے حکیم دسیا اے کہ پین ویلے کھانا چنگا نہیں ہوندا ایس کر کے اوہنوں کوئی پکوڑیاں سیویاں مونگ پھلیاں والا بندہ نظر پے جاوے تاں اوہنوں دوروں ای انج ہتھ ہلاندا اے جیویں گڈی چلن ویلے پلیٹ فارم تے کھڑے لوکی۔ اوہدرا احمد جدوں لوکاں نوں ایس بے رحمی نال اپنی شراب پیندیاں ویکھدا اے تے اوہ وی اپنی پار (نوں غیر دی پارٹی جان کے اک نکرے جا لگدا اے تے گلاساں والیاں دا بھار: اکرن لگ پیندا اے وخت اوہدی مائی نوں پیا ہوندا اے جیہڑی کلی گلاساں والیاں دی ٹریفک کنٹرول کردی اے جس ویلے گلاساں والے بندے ساڈے ول میرا مطلب اے جمیل ول پھیرا پانا بند کردین تے سمجھ لو کہ جمیل گیا بے شک احمد دی مائی نوں رب بڑی سوجھ بوجھ بخشی اے پھیر بڑی دیر تیکر جمیل اپنے دونوں ہتھاں وچ خالی گلاس انج گھماندا رہندا اے جیویں لسی رڑک رہیا ہووے جس ویلے اوہدی کرسی دیاں پچھلیاں دوڑنگاں اچیاں ہو کے ڈگ پین تے میری سمجھ

مینوں دسدی اے اوہنے اٹھن دی کوشش کیتی سی تھوڑی دیر بعد اوہ اپنی بیمار مسکان نال میرے ول تگدا اے پھیر اپنے گلاس ول تگدا اے تے پھیر دو جیاں گلاساں والیاں بندیاں ول تک رہیا ہوندا اے میں چھیتی نال دو جے پاسے بیٹھے بندے نال کاراں دے دھوئیں تے دنیا دے موسم بارے یا ہو ر چھیڑ لیناں تے اپنے اک کن نوں شیشہ ٹن دی آواز اڈیکن تے لادیناں جس ویلے ایہہ آواز آوندی اے میں چور اکھیں جمیل ول ویکھدا آں اوہدے ہتھ خالی ہوندے نیں تے زمین اتے گلاس مرلے ادھ مرلے وچ بکھریا پیا ہوندا اے۔ ایہہ بڑا نازک ویلا ہوندا اے ایسے ویلے دو گلاں وچوں کوئی اک گل ہو سکدی اے اک تاں ایہہ کہ جمیل کچھ ہو کے کرسی دی پٹھ اتے اپنا سار بھار پاد یوے اوہدیاں دونوں ہاتھوں دھرتی اپنے ول کھچ لوے تے اوہدی مسکان مک جاوے ایہہ کوئی گھبران والی گل نہیں کیوں جے ایس طرح جمیل اپنے بچپن دیاں تانگھاں دی دنیا وچ اپڑ جاندا اے۔ ایس ویلے پندرہ ویہہ ڈھولی وی اوہنوں مڑ ایس کوڑ دنیا وچ نہیں کھڑ سکدے اک گل ضرور اے کہ پارٹیوں بعد پنج چھ مزدوراں دی لوڑ پے جاندی اے دوجی گل اوس نازک ویلے ایہہ ہو جاندی اے کہ اوہ اپنی کرسی اتے اگے نوں جھک جاوے۔ اپنیاں دوویں کہنیاں اپنے پٹاں اتے ٹکا لوے اپنے دونوں ہتھاں دیاں کل انگلاں نوں آپس وچیں اڑائے تے غصے والا مونہہ بنا کے اپنے سامنے دور بڑی دور کوئی شے ڈھونڈن لگ پوے۔ ایہہ فکر والی گل ہوندی اے کیوں جو ہن جمیل کسے ویلے وی کھڑا ہو جاوے گاتے ہیر گاؤن لگ پوے گا۔

اوس شامیں شیشہ ٹپاتے جمیل نوں ایہہ دوجی طرح دا دورہ پے گیا تے اوہ دور بڑی دور کوئی شے ڈھونڈن لگ پیا دوروں احمد دی مائی جمیل نوں ویکھیا تے اوہنوں

فکر پے گئی احمد اوس ویلے غیر دی پارٹی وچ رجھیا فکراں دیاں حداں ٹپ چکیا سی۔
 احمد دی مائی احمد نوں دوائی دی شیشی وانگوں ہلا ہلا کے مڑ اپنی پارٹی وچ کھڑیا تے
 دور بیٹھا جمیل دکھایا۔ کچھ دیر تے احمد اپنا سر جھٹکدا رہیا جدوں گل اوہدے پلے پئی
 تاں اوہدی کل پیتی شراب پسینہ بن کے اوہدے متھے راہیں رڑھ گئی احمد تے اوہدی
 مائی دال سیویاں مونگ پھلیاں تے پکوڑیاں دیاں پراتاں چکی جمیل ول ٹھے ایسے
 ویلے احمد ہمیش مینوں انج گھور کے دیکھدا اے جیویں میں قتل یا ہور کوئی ایسی طرح دا
 کم کیتا ہووے جمیل دے دونوں بھروٹے جڑ کے اک لماتے موٹا بھروٹہ بن گئے
 ہوئے سن تے اوس اک بھروٹے دی پٹھوں اہدیاں دواکھاں دھرتی تے اسماں
 دے جوڑ دے کول کوئی گواچی شے ڈھونڈ رہیاں سن احمد کہیا جمیل جمیل جمیل، جمیل
 تیرے چاچے دے کلیم دا فیصلہ ہو یا اے کہ نہیں؟ جمیل جمیل تیرے چاچے دا کہیہ ناں
 اے۔ میں اوہدا ناں ای بھل گیاں چل چھڈ ناں نوں پرویکھیں ناں جمیل اوہ دیکھ
 نیازی کھڑا اے چل اٹھ اوہدے نال گل کرے۔ جمیل چل اٹھ نیازی نال گل کرے
 جمیل جمیل اوس توں بعد بڑی دیر تیکر احمد طرح طرح دیاں بے تکیاں گلاں کردار ہیا
 تاں جے کسے طرح جمیل اوس غریبی ہیر دا کھیہڑا چھڈ دیوے احمد دیاں دھیاں
 کباب تے کوفتے لیا کے جمیل دے نک کول انج پھیرن لگ پیاں جیویں بڈھیاں
 مائیاں نظر لگے نیاں نوں ہرل گگل دی دھونی دیندیاں نیں اوہناں دی سبھ توں
 چھوٹی دھی اپنی بولن والی گڈی چک لیائی تے اوہنوں الٹا سدھا کر کے میاؤں
 میاؤں کران لگ پئی تے جمیل اپنی نک دی سیدھ وچ دور بڑی دور ہیر نوں ڈھونڈ دا
 رہیا پہلے پہلے مینوں جمیل تے غصہ آندا اسی پر وقت لنگھدیاں مینوں عادت جیہی پے
 گئی تے پھیر میں جمیل تے اوہدی ہیر تے نہ کدے ہیا تے نہ رویا پر اوس شامیں

جدوں احمد دی ساریاں توں چھوٹی دھی آپنی گڈی نوں میاؤں میاؤں کران لگی تے
 میرے اندراک ہا سا جیہا ہلیا پہلے تاں میں غور یا نہ پرویکھدیاں ویکھدیاں ایہہ ہا سا
 میرے اندر وادرو لے وانگوں ول کھان لگ پیا احمد اوہدی مائی تے بچیاں نوں اک
 بندے دے آ لے دوا لے گھیر اپائی دیکھ کے مہماناں دے کل اکٹھ ہولی ہولی ساڈے
 کولوں دور ہوندے گئے ہن میرے کہے اک انگریز بھائی بیٹھاسی اوہنے مینوں پچھیا
 کہ تیرے بلی نوں کیہ تکلیف اے۔ میں اوس ویلے اپنے دونوں ہتھ اپنے ڈھڈ دے
 اوس حصے وچ کھو بھے ہوئے سن جتھے ڈھڈ تے چھاتی دے بنے ملدے نیں میں
 ہا سے نوں چھاتی دے پٹھاں ڈکھیا ہو یا سی ہن جے کوئی بندہ تہاڈے کولوں کوئی گل
 پچھے تے اوہدا جواب دینا تے ضروری ہوندا اے ناں۔ پر مینوں ڈرائس گل داسی کہ
 بھانویں میں ہا سے نوں اپنے ڈھڈ اندر ڈک چھڈیا اے پر جے میں مونہہ کھولیا تے
 ایس بے ایمان دا کوئی اعتبار نہیں کہ کسے وتھ راہیں اپر چڑھ آوے پھیر میں اوس
 انگریز بھائی نوں اپنے نک راہیں جواب دتا اؤں آں تے اوہ بھائی مینوں بڑے غور
 نال گھورن لگ پیا۔ بڑی دیر تیکر بڑے غور نال مینوں گھورن توں بعد اوہ مینوں چھڈ
 کے احمد اوہدی مائی تے بچیاں نوں گھورن لگ پیا تے نال ایک جھوٹھی کھنگھ وی
 کھنگھن لگ پیا۔ دسنا اوہناں نوں اوہ ایہہ چا ہوندا اسی کہ تسیں تے الٹے پاسے لگے
 او اصل وچ تاں ایس بھائی دی فکر کرن دی لوڑ اے انگریز بھائی کھنگھدا تے احمد
 تے اوہدے گھر بار نوں گھوردار ہیا۔ میں اپنے ہتھ اپنے ڈھڈ وچ کھو بھی رکھے۔ پھیر
 پتہ نہیں کس طرح کس ویلے احمد اوہدی مائی تے دھیاں جمیل نوں کھڑا کر لیا تے
 اوہنوں اندر کھڑن لئی ایک جلوس بنا کے ٹر پئے۔ ہن اوس انگریز بھائی نوں میرے
 بارے فکر پے گئی تے اوہ شراب دا گلاس ہتھ وچ پھڑی شراب دیاں بدخوہیاں کرن

لگ پیا۔ تے کہن لگا جے توں اندر جا کے اک ٹکی مکھن دی کھالویں تے بالکل ٹھیک ہو جاویں گا۔ میں اندر کیوں جاسکد اسی اندر تے اوہ جمیل نوں لئی جا رہے سن کل نکلے نکلے اکٹھے ہو کے اک وڈا اکٹھ بن گئے سن جلوس جس ویلے عین اوس اکٹھ کول اپڑیا تے جمیل رک گیا۔ اوہنے اک ہتھ نال اپنی پتلون اچی کیتی میں اپنے ہتھ ڈھڈ وچ ہو زور نال کھو بھ لتے دوجی بانہہ اوہنے اک جھٹکے نال سدھی کیتی تے ہیر جوگی نوں جھوٹھا دن لگ پئی جس ویلے جمیل اپنی بانہہ سدھی کیتی اوہدا کوئی ادھا کوہتھ اک ماوا والے افسردی بکھی وچ جا وڑیا تے اوہ افسراک اچی چھال مار کے اک مائی کولوں معافیاں منکن لگ پیا میرے کھے بیٹھا انگریز مینوں بھل کے جمیل دا گانا سنن لگ پیا اوہنوں جمیل دی آواز بڑی چنگی لگی مینوں جا پدا اے کہ انگریزاں دے ملک وچ پھٹے بانس نہیں ہوندے تے اوہ میتھوں بولاں دا انگریزی ترجمہ کچھن لگا ہاسا میرے ڈھڈ وچ سرکس دے تماشے کر رہیا سی۔ میں اوس بھائی نوں غصے نال گھوریا تے غور نال گانا سنن لگ پیا اکٹھ ہولی ہولی کھانے دیاں میزاں ول سرکن لگ پیا کھانے دیاں میزاں اتے اکٹھ ہو گیا میں اپنا ڈھڈ پھڑی بیٹھا رہیا انگریز بھائی مینوں روٹی دی اک جھوٹی جیہی صلح مار کے اکٹھ وچ جا لیا۔ خالی لان وچ جمیل کلا کھڑا کل عالم نوں ہیر تے قاضی دے سوال جواب سنار رہیا سی احمد تے اوہدی مائی پہلے تے مہمانوں نوں رومال پلٹیاں پھڑاندے رہے پھیر ہولی پولیاں کردے جمیل نوں گاندیاں گاندیاں کسے پاسے لے گئے مہمان کھانا کھاوندے رہے میں اپنا ڈھڈ پھڑی بیٹھا رہیا ہولی ہولی اکٹھ کھنڈنا شروع ہو یا اخیر وچ میں وی احمد تے اوہدی مائی دا اپنی چپ زبانی نال شکریہ کر کے ٹریا۔

جدوں میں اپنی گڈی وچ بیٹھا تے مینوں سمجھ آیا کہ ٹردیاں ویلے جدوں میں احمد

تے اوہدی مائی دا مشکور ہو رہیا ساں تے اوہ دوجے پاسے کیوں دیکھ رہے سن۔ جمیل میری گڈی دی پچھلی سیٹ تے پیاسی جمیل نوں گڈی وچ پاؤن لئی پنج کو بندیاں دی لوڑ ہوندی اے تے گڈی وچوں باہر کڈھن لئی گھٹوگٹ اوس توں دگنے بندے چاہیدے نیں اوہدے گھر پہنچ کے میں کلا ای اوس لاش نال گھلن لگ پیا اوہدا ادھا پٹھلا دھڑ باہر کڈھ دیاں تیکر میرا کل زور مک گیا مینوں پسینہ ایس طرح آ رہیا سی جیویں کسے برف دی سل ہاڑھ دی دھپ وچ رکھ دتی ہووے میں بڑی داری ایہہ پڑھیا اے کہ جے کسے بندے تے کوئی وقت پیا تے رب نے اوہنوں اوہ طاقت بخشی کہ اوہنے پہاڑ دے ٹکڑے کردتے یا اک مکا مار کے شیر مار چھڈیا۔ میں ہمیش ایہناں گلاں نوں جھوٹھ سمجھیا تے کتاب رسالے دا اگلا ورقہ اتھل دتا پر اوس راتوں بعد مینوں یقین آ گیا اے کہ رب سچا بڑا بخش ہارا ہے۔ ڈھلدی راتیں پٹھلا ادھا جمیل سڑک تے پیاسی اوپر لا ادھا گڈی وچ تے میں اکلے کھے ڈگارڈ تے بیٹھا اپنے پرلے تے پٹھلے ساہ وچ صلح کرار رہیا ساں۔ کلا ڈکلا کوئی بندہ لنگھدا تے میں اوہدی منت کردا تے اوہ پرے دی ہو کے لنگھ جاندا جدوں کلے ڈکے وی لنگھنے بند ہو گئے تے مینوں کجھ گھبرا چہا پین لگ پیا میں سوچیں پے گیا میرے دل مینوں کہیا ایہہ کل بندے جیہڑے تیرے کولوں کنی کٹا کے لنگھے نیں سدھے تھانے گئے نیں تے ایس ویلے تیرے خلاف قتل دی رپٹ لکھا رہے نیں ہنے ای پولیس جھکڑیاں لے کے آجاوے گی لوکاں دا اکٹھ ہو جاوے گا تے پولیس تینوں غیر قانونی اکٹھ کرن کر کے پھڑ کے لے جاوے گی۔ ”میریا ربا“ اوس ویلے رب میرے اندر اچھی طاقت بھردتی کہ میں منھاں وچ جمیل نوں کڈھ گھیٹ کے اوہدے گھر دے بوہے اگے رکھ دتا تے آپوں گڈی نہٹا گھر آ پڑیا ہن تیکر ڈر غصے گرمی تے بھار چکن کر کے ہاسا میرے ڈھڈ دی کسے نکرے لکھا بیٹھا سی گھر اڑ کے میرا ساہ ٹھیک ہو یا تے اوہ مڑا پیاں کھیڈاں کھیڈن لگ پیا تے میں مڑ ہتھ ڈھڈ وچ کھوب لتے میری مائی بوہا کھولیا تے دیا

کہ ممتاز رحمن پوریوں آیا سی۔ ”بی بی بڑی بیمار اے تسی تے بڑی دیر کردتی۔“ ہن سویرے ای جاہو وے گا۔ بی بی دی بیماری دل گل سن کے مینوں بڑی فکر پے گئی تے میں کہیا کہنا کیہ سی اوہ ای ہو یا جس دامینوں ڈرسی میرا ہاسا نچ نکلیا جیویں کسے ٹوب ویل چلا دتا ہو وے میرے سامنے کھڑی میری مائی اوس ہاسے وچ پیراں توں سر تیکر نہاتی گئی اوہ دروازے وچ کاٹھ دی طرح آکڑی کھڑی سی میرا ہاسا وگدا گیا پھر اوہ اک دم اچی اچی رون لگ پئی میری ماں بیمار پوے تے متیوں ہاسا آوے اس بچاری تاں کدے تیرے گھروں اک ڈنگ دی روٹی نہیں کھادی تینوں اوہا کیہ دکھ اے۔ میں اوہنوں اپنا دکھ کیویں دسد میرا ہاسا رکدا تاں کوئی گل کردا بو ہے کھڑکے باریاں کھلیاں احاطے دے چار چھ بندے سوٹے پھڑی ٹھے آئے مینوں پچھان کے اوہ رک گئے۔ پر میرا ہاسا نہ رکیا ہسد یاں ہسد یاں میرا ہاسا ہاسا نہیں سی رہیا اوہ کجھ اجیہاں آوازاں بن گیا سی جہاں دا کجھ مطلب ای نہ ہو وے بندے تاں اپنے سوٹے لئی دل دیاں دل وچ لے کے ٹر گئے پر بو ہے تے باریاں آپس وچ گلاں کرن لگ پیاں پہلے تاں کدے اپنے اپنی مائی تے ہتھ نہیں سی چکیا لگدا اے اج بہتی ای پی کے آیا اے میری مائی اپنی منجی تے پئی کلی جواب سوال کردی رہی ہس ہس کے میں بیہوش جیہا ہو گیا تے پتہ نہیں کس ویلے مینوں نیند آگئی۔ ایس گل نوں پندراں کو دن لنگھ گئے نیں پر ہن تیکر میری مائی نو کرانی دے ہتھ مینوں روٹی بھجی اے تے بچیاں کولوں کتاباں کپڑیاں لئی پیسے منگواندی اے بچیاں نال پیساں بارے کوئی بحث نہیں ہو سکدی تے گھر دے خرچے ہتھوں میں بڑا تنگ پے گیا آں۔

ہن بے کر کوئی بندہ تہاڈے نال ایہہ کجھ کرے تے پھیر راہ جان دیاں تہا نوں ہتھ ہلاوے تے آس ایہہ رکھے کہ تسیں دو بے پاسے مونہ نہ موڑو تے تسیں دل لگدی دسو کہ پاگل اوہ اے یا تسیں۔

اسلم

کل شا میں میں دیر نال گھر پہنچیا تے ماں میری کہن لگی کدے تے چھیتی آجایا کراج اسلم آیا سی بڑی دیر اڈ یکدا رہیا تینوں کہند اسی انور نوں ملیاں ورھے ای ہو گئے نیں۔

جس دن اسلم میری پھوپھی دی دھی بھین نوں ویاہن آیا سی اوس دن میرے پھوپھڑ اپنا سر کھرک کھرک کے لہو لہان کرتا گل ایہہ سی کہ اسلم جج دے بہانے اک پوری فوج ساڈا شہر فتح کرن لئی لے آیا سی تے پھوپھڑ نوں کھڑیاں کھڑیاں چھ دیگاں ہو ر پکوانیاں پے گئیاں سن۔

لوکاں دا کہنا سی کہ اسلم دا پپو اسلم دے ویاہ نوں ای اڈ یکدا اسی جدوں ایہہ کم ہو گیا تے ولیموں اگلے دن اوہ وی چلدا ہو یا پپو دے قلاں توں اگلے دن اسلم نے گھر وچ اوہ چھنج پائی کہ اوہ بے بھین بھرواں نوں جدی پشتی دبی دیگ کڈھنی پئی تے اوہناں دیگ دا پیسہ کسے کل مکان آپس وچ ونڈ لئے اسلم دے حصے جیہڑے مکان آئے اوہ جگراواں دے اڈاڈ محلیاں وچ سن تے اوہناں دا کرایہ اگراہن لئی

اوہنوں اک رئیس ٹانگہ بنوانا پے گیا ایس ٹانگے اُتے اوہ کوچوان نوں پچھے بٹھا کے
شامیں سارے شہر دی سیر کردا دیگ دی دولت وچوں اوہ دے اگلیاں کدے فقیر فقرا
نوں اوہناں دا حصہ نہیں سی دتا۔ تے اسلم نوں ایہہ سوچدیاں بڑا دکھ ہوندا سی کہ
اوہ دے وڈ وڈیرے عذاب وچ ہون گے تے اوہناں دی پیڑ گٹ کرن لئی اوہنے
دیگ دے پیسے وچوں زکوٰۃ کڈھنی شروع کردتی زکوٰۃ وٹن لئی اوہنے جگر اواں
دے اک خاص محلے دیاں کجھ مائیاں نوں چنیا۔ ورہیاں کٹھی ہوئی زکوٰۃ اصل توں
وی ودھ گئی سی تے اسلم دیگ دی اپنے حصے دی کل دولت چھیتی اوہناں حقداراں
وچ وٹن دتی مکان دے کرائے تھوڑے ای سن تے گھر دا خرچہ چلان لئی اوہنے مکان
بیچ کے دو بساں خرید لیاں تے اوہناں بساں دا بھاڑ اگر ابھن لئی تے اوہناں دی
دیکھ بھال کرن لئی اوہنوں اک کار دی لوڑ پے گئی۔

ہن اسلم اتے اکو گھر دا خرچہ تے نہیں سی ناں اوہ مائیاں جہاں نوں اوہ زکوٰۃ
دیندا سی اوہناں نوں اوہ بھکھیاں مردیاں کیویں ویکھ سکدا سی بساں بھانویں نویاں
سن تے اوہناں دے انجن بڑے جند والے پر اوہ وی بہتی دیرا اپنے سارے گھراں
دا بھار نہ سہہ سکیاں تے چھیتی ای وفات پا گئیاں کار ایہناں بساں دے غم وچ
کھنگھدی کھنگھدی مر گئی جد اسلم کجھ قرضے لاہن لئی اپنا رہن والا مکان دی ویتج دتا
تے ساڈی پھوپھی دی دھی بھین اپنے اک بلورنوں موٹہ ہے تے دو بے نوں انگلی لا
کے لدھیا نے آگئی تے مانواں دھیاں اک دو بے دے گل لگ کے اوہ رولا پایا
کہ رہے رب داناں۔

اسلم بارے لوکی کہندے کہ اوہ مکے چلا گیا کوئی کہندا کہ اوہ پہاڑاں وچ
بوتیاں ڈھونڈ دا پھر دا اے اک بندے اوہنوں اک واری کلیں شریف دے میلے تے

ویکھیا تے اک نے کلکتے اک دن اباجی دفتر وں آئے تے اوہناں دے متھے نوں
ویکھدیاں ای میں اپنے حساب دے سوال کڈھن لگ پیا میرے چھوٹے بھائی حقے
نوں نہلا نہلا کے پاگل کردتا تے بھین میری بخسورہ کھول کے بیٹھ گئی پر اس دن کسے
نوں وی پھینٹی نہ چڑھی تے نہ ای ماں ساڈی نوں جھڑکاں پیاں سگوں پو لے جیسے ابا
جی نے ماں نوں دسیا کہ اج اسلم گھنٹہ گھر دے میدان وچ گل وچ سب پائی دوائیاں
وچدا سی۔ پھیر باقی دی ساری شام تے اگلے کئی دن ساڈا ابا اپنا سر جھٹکدا رہیا
ایس توں مگروں اسلم پھیر غائب ہو گیا کئی ورہیاں مگروں مڑیا تے اوہنے ساڈی گلی
وچ مکان لے لیا تے اپنی بیوی بچیاں نال اوہ تھے رہن لگ پیا۔

اوہ کنے ای میلے کما کے مڑیا سی تے ہن ایسے پیسے نال کوئی عزت دا کاروبار کرنا
چاہوندا سی اوہنے چینی دیاں پیالیاں سلور دیاں گڈ ویاں بچیاں دے کھڈونے تے
کوئی ہو رچھتی طرح دیاں شیواں خرید کے ہر مال تن آنے پھیر نہیں ملے گا تن آنے
دی ایک ریڑی لائی ہر مائی بھائی تے بچیاں نال اوہ ہس کے گل کردا تے رب دی
رضا تے اینا راضی کہ لوکی پٹھ پچھے اوہدی تعریف کردے۔ اوہ دے مٹھے بولاں
دناں وچ اوہدا سارا مال بکا دتا جد اوہ دے کول تن پیالیاں چار گلاس تے دو مصالحے
دیاں گڈیاں رہ گئیاں تے اوہنوں پتہ لگا کہ اصل تے مک گیا اے اصل وچوں
اوہنے کدے اپنے دن دی بکری تے خرچ دا حساب نہیں سی کیتا اوہنے بھلیاں ویلے
اپنے نوٹ نہیں سی گنے ایہہ تے آنے دوائیاں دی بھان دی گل سی مستری رمضان
دی ریڑی موڑ کے ہن اوہ دن بھر فتنائی یار حے ددھ والے دی دکان اُتے بیٹھ
رہندا تے پھوپھی ساڈے پھپھو کولوں لکا کے اپنی دھی نوں شام سویرے روٹی بھیج
دیندی۔

اک دن اسلم ساڈے گھر آیا تے ماں نوں کہن لگامی تیری سلائی دی مشین
 بڑی کھڑکھڑ کر دی اے میں چوک وچوں ایہدی آواز سن کے آیاں۔ پھیر اوہنے
 مشین نوں پیٹھوں اپروں ویکھیا باری باری اک اک اکھ بند کر کے دو جی اکھ نال
 اوہدیاں تیل پان والیاں موریوں وچ جھاکیا تے اوہنوں اگے کچھے چلان توں بعد
 ایہہ فیصلہ سنایا کہ ایس مشین نوں اوور ہالنگ دی لوڑ اے تے ایہدی اک گراری
 دی بدلنی پوے گی تے مامی جے توں ایس مشین نوں دو گیرے وی ہوڑ دتے تے
 ایہہ پرزہ پرزہ ہو کے ڈگ پوے گی تے پھیر ایہدا کجھ نہیں بن سکے گا۔ میری ماں
 نوں فکر پے گیا اسلم اوہدے کولوں باراں آنے تے مشین لے کے چلا گیا گھر
 جاندیاں ای اوہنے تن لکڑ دیاں پھٹیاں جوڑ کے اوہناں اتے کالا رنگ کیتا۔ تے
 اگلے دن اوس کالے پھٹے اتے سفیدے نال اردو تے انگریزی وچ اسلم انجینئرنگ
 ورکس لکھیا۔ اوس توں اگلے دن چودھری کریم بخش تے فتنے نائی وچ بڑی توں توں
 میں میں ہوئی۔ بڑے لوکی وچ پے پرگل ودھدی گئی۔ اک شامیں پنچائیت بیٹھی تے
 فیصلہ ایہہ ہویا کہ فتا ہر مہینے دی چوتھی نوں کرایہ چودھری دے تک تے ماردا ہووے
 پر جے چودھری اپنی ہٹی خالی کروانی چاہوندا اے تے فتنے نوں ہٹی خالی کرنی ای
 پوگی جس دن فتنے نائی نے ہٹی خالی کیتی اوہدے اگلے دن اسلم نے اوہدے باہر اپنا
 انجینئرنگ ورکس دابور ڈلا دتا۔

ہُن اوہنے سلائی دی مشین دا پرزہ پرزہ کھول دتا تے تھاں تھاں کلاں گڈ کے
 اوہنے پرزیاں نوں ہٹی دی اندر لی کندھ اتے سجا دتا مشین دے پٹھلے لکڑ دے ڈبے
 مہتی اوہنے اک ریتی اک پیچ کس تے اک پلاس رکھ کے اپنا انجینئرنگ ورکس تیار کر
 لیا جد کوئی مشین ایس انجینئرنگ ورکس وچ آوندی تے اسلم اوہدے پرزے پرزے

کر کے اپنے سامنے رکھ لیندا پھیر اپنی جیبھ تے تالوں دے جوڑ تے توڑ نال ٹخ ٹخ
 دیاں ایسیاں آوازاں کڈھدا کہ مشین والا بھائی تھٹھدا تے گھر جا کے ساہ لیندا۔
 اوہدے جان توں بعد اسلم مشین نوں مڑ جوڑ دیندا تے سرہوں تے مٹی دا تیل ملا کے
 اوہدیاں تیل پان والیاں موریوں وچ پاؤندا تے بھائی دی حیثیت یا اپنی بحث
 مطابق چار چھ اٹھ یادس آنے رکھوالیندا۔ جس کے دی مشین نال اوہنے ایس توں
 کجھ ودھ انجینئرنگ کیتی اوہ بھائی آ کے رولا پاؤندا اچی اچی بولداتے محلے دے
 نیانیاں سیانیاں نوں اکٹھیاں کر کے اسلم نوں ہیٹوں باہر نکلن لئی آہندا پر ایسے
 موقعیاں تے کدے اپنا اڈا نہیں چھڈیا تے نہ ای اوہنے کدی اوہناں پاگلاں نال
 بحث کیتی۔ اوہ چپ کر کے سبھ کجھ سندر ہندا تے جد اوہ اچا بولن والا بھائی بول بول
 کے خفا خون ہو جانداتے گھر جان لگدا اوس ویلے اسلم اوس نوں آواز دے کے بلا
 لیندا۔ تے بڑے پیار نال اپنے کول بٹھالیندا پھیر ساریاں نیانیاں سیانیاں نوں گھرو
 گھریں جان دی نصیحت کر کے اوس بھائی نوں انجینئرنگ دیاں باریکیاں سمجھاؤندا
 اخیر وچ اوہ بھائی سرینواں کر کے اپنے گھر چلا جانداتے اپنی مائی نال لڑا اگلے دن
 اوہ اسلم دے کول دو گھنٹے ضرور بیٹھدا تے دنیا دی بے ثباتی تے نویں پوچ دی بے
 حیاتی بارے گلاں کردا۔ تے اسلم اوہنوں بمبئی تے ہر دوار تے برما دیاں گلاں
 سناتا۔

چودھری کریم بخش نوں کرایہ دین دی تھاں اسلم اوہنوں اپنا چاچا بنا لیا تے
 کدی کدی چاچی دیاں منجیاں پیڑھیاں دی ٹھوک آؤندا۔ تے جد کدی بھکھ لگدی
 تے چاچی نوں کوئی ہو ر کم کچھن لئی چلا جاند محلے دیاں کل مشیناں مک گمیاں تے
 اوہنے ٹٹیاں کڑا ہیاں کڑ چھیاں تے بالٹیاں دے کڈے دستے تے تھلے لانے

شروع کرتے ایس کم وچ پیسے گھٹ سی پر اچا بولن والیاں دی کھج کھج گھٹ۔ اک دن اوہ کتوں اک اکھنوں لان والا شیشہ تے اک پرانے ٹائم پیس دا کھوکھالے آیا تے اپنی گھڑی نوں کھول کے ایس شیشے دے نال سارا دن تکدار ہیا۔ اگلے دن اوہنے اپنی ہٹی دانوں بدل کے اسلم وچ ہاؤس رکھ دتا تے پندرہاں مہینیاں بعد مڑ جوڑ کے میری ماں دی مشین واپس کر گیا۔

اسلم دا وچ ہاؤس کوئی بہتا نہیں چمکیا۔ ایس کر کے ساڈے محلے وچ جولا ہے تے گھمیا رو دھسن تے اوہ چڑھدے اتر دے پر چھانویاں تے ملاں تے لکڑ دی بانگ توں ای اپنا کم چلا لیندے سن۔ تے گنتی دے پڑھے لکھے کھاندے پیندے لوک اپنیاں گھڑیاں ریل بازاروں ای ٹھیک کر اوندے بھانویں اوہناں نوں اسلم کولوں چار گنا ودھ مزدوری نہ دینی پوے۔

ہن تیکر اسلم دامنٹ کیمرہ بوری وچ بنھیا پیاسی ایس عید تے محلے دے کل بچیاں اپنیاں کل عیدیاں دیاں فوٹو آں کچھوالیاں ٹروتوں بعد ایس کم داوی منداپے گیا پر چھیتی ای ٹانگیاں دی کمیٹی پاس دے دن آگئے تے اسلم نے چوراں کولوں ادھ مزدوری تے ست ٹانگے نیل بوٹیاں سنے رنگ روغن کردتے ٹانگیوں بعد اوہنے اپنے بورڈ اتے اپنا ناں چھڈ کے باقی دے اکھر بجھا دتے تے اوہناں دی تھاں آرٹسٹ پیٹر لکھ دتا۔ ہون شیشیاں اتے یا اللہ، یا محمد، یا علی لکھ کے تے اوہناں دے آلے دوالے نیل بوٹے واہ کے تے اوہناں دے پچھے پانی چڑھا کے فریم کر کے اپنی ہٹی دے اندر باہر تنگ لئے تے ہر دھ دہی لین لئی نکلیا نانا اوہناں فریماں نوں تے اوہناں وچ اپنی شکل نوں گھنٹیاں تکدا۔

اسلم نوں ہٹی پایاں جد کوئی تن سال لنگھ گئے تے چاچے کریم بخش نوں کھڈیاں

لان لئی اپنی دکان دی لوڑ پے گئی تے اسلم بڑے کبے بھتیجیاں وانگوں ہٹی خالی کرن دی حامی بھری۔ اگلے دن اوہنے فتنے نائی دے کن وچ کچھ پھوک ماری تے اوہنے اسلم کولوں پنج قطعے تے اک دو فٹ تن فٹ داشیشہ خرید لیا اسلم کل سامان گھر لے آیا تے اپنی بیٹھک وچ اپنا کاروبار کرن لگ پیا اوہدی بیٹھک وچ بڑا تک سک بھریا ہوا سی۔ صفائی کردیاں اوہنے سنگل لوہے دے کڑے تے لکڑ دے گولے اک کباڑیے نوں چکا دتے اک ڈبے وچ تاش دے کوئی پنجہ سٹھ پیکٹ بھرے ہوئے سن اوہناں وچوں اسلم نے اک پیکٹ مینوں دے دتا اوس پیکٹ دے کل بونجا پیتاں اتے پان دا شاہ بنیا ہو یا سی۔ ایس بیٹھک دی اک کندھ وچ اوہنے اک کل گڈی تے اوہدے اتے اک سکے بیراں دے دانیاں ورگی تسبیح تنگ دتی۔ اک کھونجے وچ پاتھیاں دی سواہ کر کے اوہدے اتے ایک گیند دے پھلاں دا ہار رکھ دتا ہن محلے دیاں کل سساں تے نوہاں اسلم کولوں اک دو بے دے خلاف گنڈے تعویذ کروان لگ پیاں اک دن اوہنے لوٹا گھما کے اک مائی دی چوری دی۔ تے دو بے دن پولیس نے اوس چٹی دھوتی کا لے پنڈے تے ننگے پیریں چور نوں اوس مائی دیاں چاندی دیاں پزیریاں و سپچدیاں پھڑ لیا۔ ایس توں بعد اسلم نے چوریاں تے ٹونے پھڑنے شروع کردتے تے محلے وچ نت لڑائیاں ہون لگ پیاں ہولی ہولی کچھ بھیڑے بندے اسلم دیاں بدخونیاں کرن لگ پئے پر گیند دے دے ہار تے تسبیح توں ڈردیاں کسے نوں اسلم نوں کچھ کہن دی ہمت نہ پئی۔ اک دن اسلم میرے کولوں اک دن لئی شلوار ادھاری منگی اوہنے اک انٹرویو لئی جانا سی اوہنوں نوکری مل گئی تے اوہ ہرستویں دن اپنے سڑکان کلن والے انجن نوں لیا کے اپنے بوہے اگے پارک کر دیندا تے سارا دن اپنی آل اولاد نال گزار کے اگلے دن اپنا انجن سٹارٹ کر کے اپنے کمیں چلا جاند

اک اتوار اک بابو جیہا بھائی اک مستری جیہے بندے نوں نال لے کے آیتے اسلم
 نوں اک کاغذ پھڑا کے انجن لے کے چلا گیا۔

ہُن میں اپنی پڑھائی مکا کے اک سرکاری دفتر وچ کلرک بھرتی ہو کے دلی چلا
 گیا میتھوں بعد سنیا اے اسلم اپنے بال بچیاں نوں لے کے سندھ چلا گیا۔ ایس گل
 نوں ورھے ای بیت گئے پرایویں لگدا اے جیویں کل دی گل ہووے۔

کل شامیں جد میں دیر نال گھر پہنچیا تے میری ماں بڑی ناراض ہوئی تے کہن
 لگی اسلم تینوں اڈیک اڈیک کے چلا گیا میں پچھیا بی بی اج کل اسلم کیہ کم کردا اے
 کہن لگی پتر اوہدی جیب وچ اک ڈاکٹراں والی ٹوٹی سی۔

ہمزاد

مینوں عبدالرحمان نال اک کم پے گیا تے پتہ نہیں اوہ پاکستان بھوں بعد
 لدھیانویں کتھے ٹریا اے ایہہ عبدالرحمان اک ترکھان سی تے جیہڑے لوکی اوہدی ہٹی
 اتے بیٹھ کے اوہدے کولوں یوسف زلیخا سن دے اوہناں دا کہنا سی جے عبدالرحمن بڑا
 کاریگر ترکھان اے۔ اوہدے ورگیاں جوڑیاں تے چوکھاٹاں شہر وچ کوئی دو جا
 ترکھان نہیں بنا سکدا۔ میں تے اوہنوں ہمیش منجیاں پیڑھیاں ٹھوکن دے ای ویکھیا
 اے یا پھیر یوسف زلیخا پڑھدیاں کجھ لوکی ایہہ وی کہندے جے اوہنے جن قابو کیے
 ہوئے نیں یوسف زلیخا توں دکھ اوہدے کول اک ہو ر کتاب وی سی جیہہ اناسی
 اصلی بنگال کا جادو میں اصل وچ عبدالرحمن دی ہٹی اتے ایس اصلی بنگال دے جادو
 خاطر بیٹھدا سی اوکدیں کدیں ایس کتاب وچوں عمل حب تے تسخیر دے نسخے پڑھ
 کے سناںدا سی۔ ایہناں نسخیاں وچوں اک نسخہ ہمزاد نوں قابو کرن داوی سی۔ مینوں
 ہمزاد قابو کرن دی بڑی اچھا سی۔ کیوں جے کتاب کہندی سی جے ہمزاد تھاڈے لئی
 بے موسے پھل لیا سکدا اے طلسمی ٹوپی لیا سکدا اے جیہڑی تسیں پالووتے آپوں تے

ساریاں نوں ویکھو پر تہا نوں کوئی نہ دیکھ سکے۔ مینوں ہمزاد دیاں ایہہ گلاں بڑیاں چنگیاں لگدیاں سن تاں جے ایہہ گلاں سکولے تے گھر میرے بڑے کم آسکدیاں سن۔ پر ہمزاد نوں قابو کرن دا عمل کجھ اوکھا جیہا سی۔ پہلے تے سوا سیر آٹا اڑانا بڑا اوکھا سی۔ پھیر ایس سوا سیر آٹے دیاں اک سواک اکو جیہاں گولیاں بنانا پھیر اوہناں اک سواک گولیاں نوں سورج چھپیاں باری باری جادو پڑھ کے دریا وچ پاناتے پھیر ایہہ کل عمل چالی دن تیکر بغیر ناغیوں کرنا جے اج مینوں اوس جادو دے اکھریاد ہون تے میں ایہہ عمل بڑے آرام نال کر سکداں پر او دوں میں نیا نا ہوندا سی تے پو میرا بڑا ظالم انج تے ماں وی میری گھٹ نہیں سی پر جس طرح اوہ مینوں نکلیاں نکلیاں گلاں توں پھینٹی چاڑھ داسی لوکی پٹھ پچھے اوہنوں قصائی کہندے۔ میں بڑے دن قصائی تے ہمزاد بارے سوچدا رہیا اخیر اک دن میں گولیاں دریا وچ پا ای آیا دو جے دن گولیاں دیر نال پیاں تے نال مار وی تہی شا میں میرا پیو حقہ لے کے بوہویں باہر تھڑی اتے بہہ گیا ایس طرح ہمزاد قابو آوندا آوندا میرے ہتھوں نکل گیا تے میرے کل منصوبے رڑھ گئے۔ اک گل دامینوں بڑی دیر تیکر ڈر رہیا جے عمل وچکار چھڈن نال ہمزاد کتے الٹ نہ گیا ہووے کدیں کدیں سکولوں ٹھن توں یا نقل مارن توں مار پیندی تے مینوں لگدا جے ہمزاد دی کارستانی اے۔ پر پھیر میں ایہہ سوچدا جے ایہہ گلاں تے میرے نال پہلے وی ہوندیاں رہندیاں سن ایہدے وچ وچارے ہمزاد دا کی دوس۔

وقت لنگھدا گیا تے میں آٹے دیاں گولیاں تے ہمزاد نوں بھل گیا پر ہمزاد مینوں نہیں سی بھلیا۔ شروع وچ تے میں ایہہ سمجھدا رہیا جے ایویں اک حقیر نامراد مکھی اے۔ جیہنوں مینوں تنگ کرایاں مزا آوندا اے پر ایس مکھی دیاں باقی

کارگریاں دیکھ کے مینوں یاد آ گیا جے ایہہ میرا ہمزاد اے ہاڑھ تے سون بھادوں دے دنناں وچ تے کدیں کدیں دوسرے موسماں وچ وی ایہہ مکھی بن کے آوندا اے ایہنے اپنے چھپیاں پیراں وچ ٹھن والیاں والے کلاں والے بوٹ پائے ہوندے میں تے اپنی سنڈ نال اک چاقو بنیا ہوندا اے۔ ایس طرح چھپیاں کانٹیاں نال لدیا ایہہ میرے سریر دے کل ان ڈھکے انگاں تھکن کنک مونہہ تے پیراں نوں باغ جناح دے لان سمجھ کے اوہناں اتے چہل قدمی کر دا اے کتے کتے رک کے میرے سریر دی اپچی نیویں مٹی نوں اپنے سنڈ والے چاقو نال پدھری وی کر دا اے ایہنوں مارن لئی میں تھپڑاں مکیاں نال اپنے پنڈے وچ چب پالینداں پر ایہدا کجھ نہیں وگڑدا کدیں کدیں میرا تھپڑا بالکل نشانے تے لگدا اے پر جد میں اپنا ہتھ نشانے توں چکدا آں تے نشانے والی تھاں اتے سوائے میریاں انگلاں دیاں لاشاں توں ہو رکھ نہیں ہوندا پھیر ایہہ چپ کر کے کتوں آوندا اے تے میرے نک دی نوک اتے بیٹھ جاندا اے نک اتے مکھی کون پٹھن دیندا اے بھانویں ایہہ مکھی تہاڈا ہمزاد ای کیوں نہ ہووے۔ نک اتے بیٹھی مکھن مارن دا اکو ای طریقہ اے جے تسیں اپنیاں دونوں اکھیاں ٹیریاں کر کے نک دی نوک نوں نظر دی سیدھ وچ کر لوو پھر اپنا سجایا کھبا جیہڑا وی ہتھ ودھ چلدا ہووے اوہ دیاں پہلیاں دو انگلاں دی ایک چپڑ جیہی بنا لووہن ایس چپڑ والے ہتھ نوں مونڈھے دے اینا کچھے لے جاوو جے مکھی نوں ایہہ ہتھ نظر نہ آوے پھیر ٹھیک وقت تے پھرتی تے نشانے نال ایہہ دو انگلی چپڑ ایس طرح چلاوو جے مکھی مروی جاوے تے ایس مرن دے عمل وچ تہاڈے نک اتے وی نہ چڑے۔ میں جدوں ایہہ کرنا آں تے یا تے میرا ہتھ ہمزاد دے اوپروں لنگھ جاندا اے یا میری نکسیر پھٹ جاندی اے تے ہرواری اوہ اڈ کے کسے ہو رہاں جا بہندا

اے کدی کدی اوہ میرے گریبان وچ جاوڑ دا اے تے او تھ کوئی شے ڈھونڈا پھر دا
اے اوہدی ایہہ مسخری مینوں سبھ توں ودھ بھیڑی لگدی اے میں چھاتی تے ہتھ
ماراں تے اوہ پٹھاتے جاہندا اے جے میں اپنی کبھی بانہہ دی استری تر وڑ مروڑ کے
رکھ دیواں تے اوہ میری بجی بانہہ وچ پٹوسیاں ماردا پھر دا اے غسٹخانے جا کے میں
مادرزاد حالت وچ اپنے کل کپڑیاں دے بنجیے ادھیر دینا آں تے اوہ غسٹخانے دی
کے نکرے لگا اپنے اگلے دو پیراں نال تاڑیاں مار رہیا ہوندا اے پچھلے دو پیراں نال
پہلے اوہ اپنے پیراں نوں پونجھدا اے پھیراں نہاں دو پیراں نوں آپس وچ مل مل کے
اوہناں توں اوہ گند مند جھاڑ دا اے جیہڑا اوہدے خیال وچ میرے پنڈے توں
اوہدے پنڈے تے پراں نوں لگ گیا ہوندا اے جدوں کدی میں جی چھڈ کے
اوہنوں کھلی چٹھی دے دیندا آں تے اوہ مینوں چھڈ کے میرے سامنے پئی کسے شے
اتے جاہندا اے تے پھیراں اپنے پر جھاڑ جھاڑ کے تے اپنے پیراں نوں آپس وچ مل
مل کے مینوں دنیاں چڑاند اے۔ ربا ایس تیری دنیا وچ شریف آدمی نوں کسے
طرح دی جینا نہیں ملدا۔

مینوں چنگی طرح یاد اے جے جد میں جوان تے بیوقوف ہوندا اسی مینوں اک
کڑی نال پیار ہو گیا ایہہ سکھ کڑی کالج وچ میرے نال پڑھدی سی تے ہر ویلے باپو
جی دیاں گلاں کردی رہندی تے میں اوہنوں کانت دا فلسفہ سمجھاندا رہندا ہن میں
اپنے قصائی پیو بارے اوہدے نال کیہ گل کردا۔ کدی کدی مینوں اوہدی گل یاد
آوندی اے جے جدوں اوہنے مینوں کہیا سی جے میں اپنے باپو جی نوں کہاں جے
اوہدے باپو جی نوں ملن تاں اوہدی ایس گل دا مطب کیہ سی۔ اودوں اوہدی ایہہ
گل میرے پلے نہیں پئی تے میں اوہنوں ازلوں پرانی بحث ”من دی آزادی“

دیاں گنجھلاں وچ پادتا۔ اک دن اسیں دونویں کمپنی باغ دی اک بنج اتے بیٹھی سی
اوہ باپو جی دیاں گلاں کردی سی تے میں اندروں اندری کوئی بڑے ای بنجواں
بھرے فقرے جوڑ رہیا سی تاں جے اوہ میری جنم ساتھی بننا قبول فرما لووے۔ عین
اوس ویلے ایہہ ہمزاد کتوں بوٹیاں وچوں نکل کر بھیں بھیں کر دامیرے کن دے کول
دی لنگھ گیا ایہہ اوہدا ٹھٹھا مارن دا طریقہ اے میں اک کچھنی لے کے اپنا لک سدھا
کیتا تے اوہ کہن لگی تہاڑی طبیعت تے ٹھیک اے ناں۔

میں کہیا ”ایویں کچھ ٹھنڈ جیہی لگدی اے۔“

”پر تہاں توں تے تریلیاں آوندیاں نیں۔“

مینوں تریلیاں کیوں نہ آوندیاں ہن اوہ میرے بوٹ اتے بیٹھاسی پھیرا اوہ
اڈ کے میرے والاں وچ جاوڑ یا مشکلاں نال او تھوں کڈھیا تے اوہ میرے کن اتے
آ کے بہہ گیا اوہ باپو جی دیاں گلاں کردی گئی تے اوہ میرے چہرے دے ٹوٹیاں
ٹہیاں نوں ناپن لگ پیا پھیرا اوہ میری نک اتے آ کے رک گیا تے اوہ دیاں چپ
بڑھکاں نک تھانیں میرے سر وچ جا کے میرا دماغ پھاڑن لگ پیاں میں فقرے تے
پہلے ای بھل چکیا سی ہن ایہہ وی بھل گیا جے میں اک کڑی نال کمپنی باغ دی اک بنج
بیٹھاں۔ اوہ میری بجی ناس اتے بیٹھاسی تے کڑی وی میرے سجے ہتھ بیٹھی سی بڑی
کول کر کے ہولی ہولی کردیاں اوہ نک دی نوک اتے اپڑیا۔ پھیر زری دیر ساہ لین
توں بعد میری کبھی ناس دی اٹھان اتے آ کے بہہ گیا میرا کھبا ہتھ بڑا ای نافرمان
اے ایہنے میرا آکھا کدے نہیں سنیا۔ تے کبھی ناس اتے اوہ ایس طرح پھسکڑا مار
کے بیٹھا جیویں کڑک کڑی انڈیاں اتے بیٹھی ہووے تے ہن پورے اکی دنوں بعد
ای اٹھے گا میں اپنی دو انگلی چپیر بنائی بیٹھا رہیا۔

”پنڈ دے جٹ تے سید اپنیاں کرپاناں تے تلواراں لشکان لگ پئے“ کلتار کور کوئی اکا نوں واری مینوں اپنے پنڈ دی گل سنار ہی سی۔ ایس گل وچ سکھاں دی اک کڑی سیداں دے اک منڈے نال نٹھ جاندی اے تے سکھ تے سید اپنیاں چھو یاں کرپاناں چکاندے نیں تے منڈا تے کڑی شہر جا کے اک مجسٹریٹ اگے حلفیہ بیان دے کے اپناہ ویاہ کر لیندے نیں ہن اوہ میری ناس توں اتر کے اوس تھاں بہہ گیا جتھے ناس تے اپر لے بلھ دا اپر لا حصہ ملدے نیں منڈا کھرکی کر لیندا اے تے کڑی اوہدیاں روٹیاں پکاندی اے ایس اوٹ والی تھاں وچ میں اوہدا کجھ نہیں سی بگاڑ سکدا سکھ تے سید اکٹھے ہو کے شہر جاندے نیں تے منڈے تے کڑی نوں پنڈ لے آندے نیں جد اوہ میری کھی ناس اندروڑن لگاتے میں مونہہ بند کر کے زور نال نک تھائیں ساہ کڈھی تے اوہ اڈ کے میری بجی لگھ اتے جا اتریا ہن سیداں دا منڈا اپنی سکھ دھرم پتی نال گوردوارے جاند اے تے سکھاں دی کڑی اپنے مسلمان کونت نال امام باڑے جاندی اے۔ اوہ اپنی سنڈ والے چاقو نال میری لگھ دے چھلر لاہ رہیا سی۔ میں اپنی چپڑ تیار رکھی کوئی تتاں ورہیاں بعد جد اوہ میری نک دی نوک اتے اپڑیا تے میں چپڑ کڈھ ماری میں پہلے ای ایس گل دارو نارو چکیا آں جے میرے کجے ہتھ میرا آکھا کدے نہیں منیا اوہ نک دی نوک توں کوئی اک میل اپر دی لنگھ گیا تے نکسیر کلتار کور دی پھٹ گئی بعضیاں کڑیاں ویکھن وچ تے بڑیاں بھولیاں لگدیاں نیں پر کسے کی جیہی گل اتے سوئی ہوئی گدڑی وانگوں تہاڈے پچھے پے جاندیاں نیں۔ دو جے ایہہ گل پلے بنھ لوو جے جنا کوئی کمپنی باغ سنا نظر آوے او نے ای ودھ بندے اوہدے بوٹیاں بیلاں وچ لکے ہوئے ایہہ اڈ یکدے ہوندے نیں جے کوئی کڑی تہاڈے نال اوکھا بولے تے اوہ نکل کے تہانوں چاروں پاسیوں گھیرا

پالین میری واری ایہناں وچ اک سکھ پولیس والا وی سی اوہنے جدوں کڑی دی بانہہ وچ کڑا دیکھیا تے اوہدی سکھی جوش وچ آگئی تے اوہ کڑی نوں گھریں جان لئی کہہ کے مینوں تھانے کھڑن دے پیش پے گیا ہن تے کلتار کور مینوں جاندی وار دی اک ہور لت ماری اوہ ایہہ جے اوہ سپاہی نال اک جٹاں والی اڑی لائیٹھی جے جیکر توں ایہوں تھانے کھڑیں گاتے میں وی نال ای تھانے چلاں گی سکھ سپاہی دھی کا کونوں بڑا سمجھاندار ہیا پر اوہ نہ منی اخیر اوہ سانوں دوہاں نوں چھڈ کے آپوں کلا ای تھانے ٹر گیا۔ میں اوس کڑی دے ویہہ گز پچھلے سائیکل اتے اوہدے ہوشل تیکر گیا پر اوہ پچھے مڑ کے ویکھیاں بناں ای گیٹ وچ وڑ گئی۔

کلتار کور اپنے ماں پیوی دی کلی دھی سی ایس طرح کلتار کور تے اوہدے باپو جی دی پنج سومر بے زمین میرے ہتھوں نکل گئی تے مینوں اپنی دال روٹی لئی آئی سی ایس دا امتحان دینا پے گیا۔ ایس امتحان وچ میرے ہمزاد میرے پرچے خراب کروا دتے تے میں فیل ہو گیا پی سی ایس دے انٹرویو اتے اوہ میتھوں پہلے ای انٹرویو دے کرے وچ اپڑ گیا تے بھیں بھیں کر دیاں مینوں کل جواب بھلا دتے اک ہور نکلی جیہی نوکری لئی میں گیا تے اوہ مینوں چھڈ کے انٹرویو کرن والے دے پچھے پے گیا۔ اوس بھائی اوہ ہتھ پیر چلائے جے میتھوں ہاسا نہ رک سکیا میں ہسدیاں ہسدیاں باہر نکلیا تے دو جے امیدوار میرے کولوں سوال پچھن لگ پئے میں اوہناں نوں کیہہ دسد ا جے اوہناں تے مینوں سوال پچھیاں بناں ای باہر کڈھ دتا اے۔

ہن تیکر میں بڑے ای جتن کیتے پر ہر واری میرا ہمزاد میرے نال ہتھ کر گیا اک واری اوہ میری چاء دی پیالی وچ ڈگ کے مر گیا پر جس ویلے میں اوہنوں چاء سنے پرنا لے وچ روڑھ کے خوش خوش مڑیا تے اوہ پہلے ای میری سگرٹاں دی ڈبی اتے

بیٹھا مینوں دندیاں چڑا رہی سی۔ میں گھروں دفتر جاناں تے اوہ بناں پچھیاں ای
میری سائیکل اتے بہہ جاندا اے بس کنڈکڑاں کدے اوہنوں ٹکٹ نہیں پچھیا اک
واری ہوائی جہاز وچ اک سواری رولا پادتا جے جہاز وچ کھیاں نہیں سیورڈاں تے
جہاز دیاں ٹیڈی کڑیاں فلٹ مار مار کے جہاز نوں گیس چیمبر بنا دتا اوہ بھائی شکایت
دافارم بھروا رہیا اخیر اعلان ہو یا خواتین و حضرات کراچی دا ہوائی اڈہ بالکل نیڑے
آگیا اے او تھے دا موسم بڑا چنگا اے۔ کل مسافر اپنیاں پیٹیاں بنھ لین تے سگرٹ
نوشی توں پرہیز کرن تے شکریہ ہاں تے جیہڑے مسافر صاحبان اپنے نال کھیاں
لیائے نہیں اوہ اتر دیاں اوہناں نوں اپنے نال ای لے جان اوس ویلے اوہ میرے
سجے ہتھ دے اٹے پاس دی اک ناڑا تے چڑھ اتر رہی سی۔ بڑی واری مینوں
خیال آیا ہے درجن دو درجن سون والیاں گولیاں کھا کے سوں جاواں پر میرے نکے
نکے بچے نیں تے جیہڑے کالج پاس دی کر گئے نیں اوہ دی اے تیکر گھروں خرچہ
منگواندے نیں جے کسے پڑھن سنن والے نوں عبدالرحمان دا پتہ ہووے اوہ مینوں
ضرور اوہدا پتہ لکھے جے کراوہ آپ پڑھے یا سنے تے آپوں مینوں ہمزاد دے اٹے
ہو جان دا اپاؤ لکھ بھیجے میں تے میری آل اولاد اوہنوں دعاواں دیواں گے۔

موتی

”ست سمندر پار کر کے چھوٹیاں جناں نال لڑدا کھپدا چڑیلاں نوں بنے
لاوند اجدوں شہزادہ شہزادی کول اپڑیا تے شہزادی شہزادے نوں دیکھ کے پہلوں ہسی
تے پھیر روئی۔“

میری پھوپھی جدوں وی کسے بادشاہ تے اوہدیاں ست رانیاں دی کہانی
سناوندی تے اوہدے وچ ایہہ ہسنے تے رونے دی گل ضرور آوندی۔ جدوں موتی
ساڈے گھر آیا اوس دن میں وی رویا سی ایہہ اک کالا سیاہ ڈیڑھ گٹھ اچا تے کوئی سوا
دو گٹھ لما کتا ساڈے محلے دے منڈے کتوں سیٹیاں بار دے پچکار دے اپنے نال
محلے تے لے آئے سن پر ہن اوہناں نوں ایہہ سمجھ نہیں سی پیندا جے اوہدا کیتا کیہہ
جاوے گل ایہہ سی جے کریم پورے دے ودھ و سنیک ان پڑھ سن اوہناں وچوں
ودھ اپنیاں یا دو جیاں دیاں کھڈیاں اتے دریاں بندے سن۔ اوہناں توں کجھ گھٹ
مٹی دے بھانڈے گھڑ دے سن اوہناں توں گھٹ دکاندار پھیر گنتی دے کجھ مولوی
پہلو ان موچی تے دوجی طرح دے کاریگر سن تے ٹانواں ٹانواں کوئی پڑھیا لکھیا

بابو۔ ہاں تے کبوتر باز اں نوں تے میں بھل ای گیاں۔ پر ایہہ کبوتر باز مولویاں تے باو آں نوں چھڈ کے باقی دے کل کارو باراں والے لوکاں وچوں ای سن جے کر کبوتر باز اں نوں گھڑی بھڑی وکھری ذات من لیا جاوے تے کریم پورے وچ ایس ذات دی نفری باقی ذاتاں کولوں ودھ جاوندی اے پر بھیڑ ایس ذات وچ ایہہ سی جے کمیٹی دیاں ممبریاں اتے ایس ذات دے کل بندے ٹھیکریاں ٹھیکریاں ہو کے مڑ اپنیاں اپنیاں اصلی ذاتاں وچ جا ملے جے کر ایہہ آپس وچ سلوک رکھدے تے اصلی ذاتاں بھانویں ٹل لالیندیاں پھیروی ممبریاں اتے کبوتر باز دے مقابلے وچ اوہناں دا امیدوار اپنی ضمانت گواندا ای گواندا پر میں دسیانا جے ایہہ کل کبوتر باز اُن پڑھ سن تے دور دی گل ایہناں دی سوچ توں باہر۔ کبوتر باز اں توں وکھ کریم پورے وچ اک ایس طرح دی ہو روی ذات سی اوہ سی بلیاں رکھن والیاں دی۔ کبوتر باز کبوتر اں نوں سید کہندے تے بلیاں رکھن والے بلیاں نوں اُچا جنور جاندے بلیاں نوں کبوتر اں دے گوشت نال بڑا پیاری ایس کر کے ایہناں دوہاں ذاتاں میرا مطلب اے جے کبوتر باز اں تے بلیاں رکھن والیاں وچ اٹ کتے داویر سی۔ پر ایہہ کبوتر باز، بلیاں رکھن والے تے دو جی طرح دے کل کاریگر کتے نوں بہت بھیڑا جاندے سن۔ تے جے کوئی کتا کسے بلی دے پچھے غلطی نال مسیتے جاوڑا تے مولوی مسیت نوں دھوا دھوا کے اوہدا فرش اکھیر دیندا تے اگلے جمعے ممبرا تے چڑھ کے کتیاں دے خلاف وعظ کردا۔

جس دن محلے دے منڈے سیٹیاں مار دے، پچکار دے ایس کالے کتے نوں اپنے پچھے لا کے محلے لے آئے اوس شامیں اوہناں نوں نہیں سی سمجھ آوندا جے راتیں اوہنوں رکھیا کتھے جاوے ہر کوئی اوہنوں اپنے گھر کھڑن توں ڈردا۔ ایس کر کے جے

اوہناں دے ماں پو کریم پورے دے باقی کل وینکاں سنے ایہہ سمجھدے سن جے جس گھر کتا ہووے اوس گھر برکت دا فرشتہ نہیں وڑدا میرا پو محلے دے اوہناں ٹانویاں ٹانویاں بندیاں وچوں سی جیہڑے بابو کہلاؤندے سن۔ تے نہ تے اوہ کتیاں دے خلاف سی تے نہ ای اوہناں دا طرفدار پر مینوں ایہہ گل نہیں سی سمجھ آوندی جے برکت دا فرشتہ کتے کولوں ایناں ڈردا کیوں اے جدوں فیض دودھ والا اپنی دکان بند کر کے ٹر گیا تے ایہناں منڈیاں پہلے تے اوہدا برف والا بکسا پار کیتا۔ پھیر مولابخش دی تھڑی دیاں دواٹاں اکھیریاں تے ایس طرح اوس کتے نوں برف دے بکسے پٹھ تاڑ کے تے اتے دواٹاں رکھ کے اپنے اپنے گھریں جاتے راتیں ایس کتے دے چیخ چھاڑے لوکاں نوں سون نہ دتاتے دو جے دن فجرے فجرے مولابخش تھڑی والا اللہ رسول داناں لین دی تھاں اچی اچی گند بولن لگ پیا ایہہ منڈے آنے بہانے آوندے تے سدھے پئے بکسے نوں ویکھ کے مڑ جاوندے اس دن کالیا اپنے لوہارے نہ گیا تے نہ ای تا جا سا بیگلاں دی دکان اتے میں وی اپنا بستہ چکی ایہناں دے نال کتے نوں ڈھونڈن ٹر پیا دوپہروں بعد ایہہ کتا سانوں قبراں وچ ملیا۔ پر ایہہ ساڈیاں پچھلے شام دیاں کل روٹیاں تے دودھ بھل کے ہن سانوں انج گھر گھر کرن لگ پیا جیویں ساڈے نال ایہدی کدیں صاحب سلام ای نہ ہوئی ہووے اوہدے کول اک سکی ہڈی سی تے اوہ ایس ہڈی نوں انج اک اوٹ دی تھاں توں دو جی اوٹ دی تھاں کھڑا سی جیویں اسیں اوہدے کولوں ہڈی کھوہ لینی ہووے۔ اوہنوں مناوَن دا اکو طریقہ سی جے کسے طرح اوہدے لئی روٹی پانی دا بندوبست کیتا جاوے پر گھریں جاوندیں ہر کوئی پھڑیا جاوند ا خیر کالیا جا کے دو جے محلیوں اک وڈے قصائی دی دکان توں کجھ چھچھڑے تے اک ہڈی لے آیا چھچھڑے

کھان توں بعد اوہنے اپنی سکی ہڈی چھڑ مڑ ساڈے نال صلح کر لئی سکولوں چھٹی ہون
ویلے میں اپنے گھر بستہ رکھن تے دو جے منڈیاں نوں دس چلا گیا تا جے تے کالیے
اوس کتے نوں ہڈی دھیانے لائی رکھیا تے اپنے کموں مڑن ویلے اوہ وی کتے نوں
نال لے کے مڑ محلے آ گئے۔ ہن کتا دو جیاں منڈیاں سانجھ لیا تے کالیا تے تاجا
اپنے اپنے گھریں ٹر گئے اوس شامیں میں اپنی ماں نوں چوراں تے کتیاں دیاں گلاں
بنائیاں رات پئی جدوں کل منڈے کتے نوں اپنے گھر کھڑن توں انکاری ہو گئے
تے میں اوہدی رسی پھڑ کے اپنے گھر لے آیا اوس ویلے میرا پیو فیض دودھ والے دی
دکان اتے اپنا ڈیڑھ پاء دودھ ملائی سنے پی کے پیچ اتے بیٹھے دو جے بندیاں نوں
اوس دن دے اخبار دیاں خبراں دس رہیا سی۔

اوہناں دناں وچ ساڈے گھر بجلی نہیں سی لگی تے میں لالٹین بڑی کول کر کے
اپنی ماں نوں اوہ کالا کتا دکھایا پر میری ماں میرے پیو کولوں ڈردی سی تے اوہنے
میری حمایت دی حامی نہ بھری رات پئی پیو میرا گھر مڑیا تے کتے دی گھر گھر سن کے
لالٹین لیا کے اوہنوں دیکھن لگ پیا تے میری ماں نوں کہن لگا جے کتا تے نسلی اے پر
کسے دار کھیا لگدا اے دیکھیں ناں ایہدی پونچھ جڑوں ایوڈی ہوئی اے اسیں کسے دا
کتا اپنے گھر نہیں رکھ سکدے پر جدوں اوہ رسی کھولن لئی میری منجی دے پاوے نوں
ہتھ لاؤندا تے کتا اوہنوں گھر گھر کر دا میں دڑوٹی اکھاں میچی رکھیاں میری ماں کہیا
جے ایہنوں سویرے چھڈ دیاں گے ایہدی نکلی جنی جان ایں راتیں تے محلے دے
جنگلی کتے ایہنوں انج ای چیر پھاڑ دین گے دو جے دن فجرے فجرے میرے پیو اپنا
نادر شاہی حکم سنایا تے میں اچی اچی روں لگ پیا پھیر میری ماں کجھ میری طرف
داری کیتی تے میں وی اپنے پیو دی گل من لئی جے جس دن وی کتے دے مالک نے آ

کے اپنا کتا منگیا او سے ویلے کتے نوں اوہدے نال ٹور دینا کتے دا مالک تے نہ آیا پر
تاجا کالائے دو جے منڈے ساڈے گھر آوندے تے اوہدے نال کھیڈ دے۔ کتے
نال کھیڈن اوہنوں بلاون اوہدے اتے حکم چلاون لئی سانوں اک ناں دی لوڑ پے
گئی تے اسیں اوہداناں ”موتی“ رکھ دتا۔ موتی نوں اک دن وچ ای پتہ لگ گیا
جے ساڈے گھر وچ حکم کھیدا چلدا اے۔ ہن جدوں میرا پیو دفتر وں گھر مڑداتے
موتی اپنی دیڈھانچ پونچھ ہلا ہلا کے اوہنوں جی آیاں نوں کہندا۔

موتی نوں ملن والے سارے منڈیاں وچوں ظفر بڑا کرو دھی سی اوہ اپنے ٹبر
دے باقی جیاں وانگوں بڑا میتر سی پنچے نمازاں پڑھدا کل روزے رکھداتے موقعہ
ملن اتے قبراء وچوں پھلاں دے گئے چراند۔ موتی نوں اوہ دوروں ای سیٹیاں
ماردا پر اپنے کپڑیاں نال نہ لگن دیندا دوجے اوہ موتی اتے دو جیاں کولوں ودھ اپنا
حق جتا وندا۔ اوہدا کہنا سی جے موتی اوہدیاں سیٹیاں اتے مست ہو کے ای اوہدے
نال ساڈے محلے آیا سی پر مینوں اوہدی ایہہ کپڑے بچان والی گل بڑی بھیڑی لگدی
سی ہولی ہولی اوہ مینوں انج ای بھیڑا لگن لگ پیا۔ تے ظفروی موتی نوں ملن آونا بند
کردتا۔ پھیرا ونے باقی دیاں منڈیاں نوں میرے خلاف چکنا شروع کردتا اک دن
کالے آکے مینوں دسیا جے اج ظفر دو جیاں منڈیاں نوں نال لے کے اپنا کتا منگن
آوے گا۔ اوس شامیں جدوں ظفر ساڈے گھر دے باہر آکے ”موتی“ ”موتی“
کہیا تے میں موتی دی سنگھی پھڑی باہر آ گیا۔ ظفر نے ایدھریاں او دھریاں مار کے
مینوں سمجھان دی کوشش کیتی جے کتا ساڈا اے تے اسیں اوہنوں لین آئے ہاں میں
کہیا کیہڑا کتا؟ کہیدا کتا؟ تسیں کتے دے لگدے کیہ او؟ جدوں ظفر میرے نال اچی
بولپاتے موتی میرے ہتھوں سنگھی چھڑا کے اوہدی شلوار پھاڑ دتی تے مڑا کے تھڑی

اتے میرے برابر کھڑا ہو گیا۔ موتی ظفردی شلوار پھاڑ کے جھگڑے دا فیصلہ تے دو ٹوک کردتا سی پر ظفرووی چھیتی کتے منن والے شے نہیں سی اوہنے اک ہور چھنج کھڑی کر لی۔

اوہناں دناں وچ مجلس احرار اسلام تے جمعیت العماے ہند والیاں نوں ایہہ فکر لگی ہوئی سی جے اسلامیان ہند اللہ تے اوہدے رسول دے فرماناں توں گمراہ ہو گئے نیں تے ایہناں نوں ایمان دی رسی نال بنھ کے اکٹھا کرنا بڑا ضروری اے تاں جے مسلمان تے ہندوا کٹھے ہو کے کافر فرنگی نوں ہندوستانوں باہر کڈھ سکے اگے نویاں نویاں اسمبلیاں وی بنن والیاں سن۔ ایس کر کے لدھیانے دے کل مولویاں اپنے اپنے محلے اک تبلیغی انجمن بنائی۔ ہر محلے دی انجمن دا دفتر اوس محلے دی سبھ توں وڈی مسیت دے حجرے وچ ہوند اہر انجمن دانان اوس محلے دے ناں تے ختم ہوند ایس حساب نال کریم پورے دی انجمن دانان انجمن نو جوانان اسلام کریم پورہ رکھیا ہر انجمن دا اک تے اپنا جھنڈا ہوند اپنے ناں والا تے پھیر باقی دے کئی ہور طرح دے جھنڈے ہوندے۔ جیہناں اتے کلمہ شریف تے قرآن مجید دیاں آیتاں تے اردو فارسی دے شعر لکھے ہوندے۔ سبھ توں اگے چلن والا اک تن کونہ جھنڈا ہوند اجیہدے اک پاسے اندر تے لہا بانس ہوند اتے دو جے دو پاسیاں اتے سنہری یا کسے ہور رنگ دی جھالر لگی ہوندی تے ڈنڈے دے پر لے سرے اتے براسو نال چمکایا اک پتل دا چند لشکارے ماردا ایہہ تن کونا جھنڈا ہمیش لال رنگ دا ہوند اتے باقی دے جھنڈے سفید یا لال ہوندے تے اوہناں اتے لکھائی یا تے رنگ نال کیتی ہوندی یا سنہری کاغذ دے اکھر کٹ کے اوہناں اتے چمیرے ہوندے اہالیان لدھیانہ دیاں ایہہ تہیہ چالی انجمنیں جمعے دے جمعے، جمعے توں بعد جلوس کڈھ دیاں

تے کل شہر والیاں نوں گاگا کے جنت دارستہ دسدیاں۔ کل شہر دا دورہ کر کے جدوں ایہہ جلوس ہر جمعے اک دکھری انجمن دے دفتر اگے رکدے تے کل جلوس اکٹھے ہو کے بڑی دیر تیکر نعرہ تکبیر اللہ اکبر دے نعرے لاوندے۔ اوس انجمن اپنے محلے والیاں کولوں چندا کر کے گنڈیریاں کھجوراں تے شربت دا بندوبست کیتا ہوند۔ کھان پین توں بعد کل مولوی بڑیاں اوکھیاں اوکھیاں تقریراں کردے۔ تقریروں بعد کل جلوس مڑا اپنے اپنے جھنڈے پھڑی گاوندے گاوندے اپنے اپنے محلیاں مڑ آوندے ایہہ جلوسیے ودھ کر کے جوان بندے ای ہوندے۔ تے کچھ ٹانوں ٹانویں پکی عمر دے بندے تے مولوی وی۔ ایہناں جوان بندیاں طرح طرح دے حلیے بنائے ہندے کجھناں چٹے رومال کالیاں رسیاں نال سراں تے بنھے ہوندے۔ کجھناں اٹیخ ای سرا تے کپڑا بے تکا جیہا لپیٹیا ہوند اتے کجھناں مولویاں والے سنہری بیل بوٹے کڈھے چٹے رومال موٹدھیاں اتے رکھے ہوندے۔ کریم پورے دے دو ٹانگے والے جمعے نوں اپنے گھوڑے نہ جوئدے تے اوہناں اتے چڑھ کے جلوس دے اگے اگے چلدے پھیر کچھ جلوسیے ڈھکن دار دو جیہاں والیاں لال قمیھاں پان لگ پئے تے میرا چھوٹا ماما اپنی تلوار گھر چھڈ کے خالی پیٹی پا کے جلوس دے اگے اگے چلدا اتے دو جے جلوسیاں وانگوں چکاں پچھوں جھاکن والیاں مائیاں نوں گھوردا۔ کچھ لوکی کپڑے دیاں پیٹیاں پان لگ پئے پھیر ایہہ رواج کچھ اجیہا چلیا جے انجمن نو جوانان اسلام کریم پورہ دے کل جلوسیاں لئی ایہہ پیٹیاں پانیاں ضروری ہو گئیاں۔ انجمن۔ دے وڈیریاں لال کپڑے دیاں پیٹیاں سلا کے پھوندے سنے چار چار آنے و پچتیاں شروع کردتیاں۔ سانوں ساریاں منڈیاں نوں سیانیاں کولوں ودھ انجمن ہوئی ہوئی سی۔ پر سانوں ایہناں سیانیاں نال اک خاری۔ تے

اوہناں نوں ساڈے نال۔ گل ایہہ سی جے اوہناں دیاں آوازاں بھاریاں تے
اچیاں سن تے جدوں اوہ نعرے مار دے سانوں ساڈیاں۔ باریک آوازاں آپوں
وی نہ سنائی دیندیاں۔ تے سانوں ایہہ گل چنگی نہ لگدی۔ اوہ تے پنج چھ نعرے مارن
توں بعد تھک کے چپ کر جان دے پر ساڈے نعرہ تکبیر اللہ اکبر اودوں تیک چل دے
رہندے جدوں تیک اوہ جھڑک جھڑک کے اکھاں کڈھ کڈھ کے سانوں چپ نہ کرا
دیندے سانوں جلوس نال چلن توں تے اوہ روک نہیں سی سکدے پر ایس خار پچھے
اوہ سانوں ہمیش جلوس دے پچھے رکھ دے تے ایس وی خار وچ آ کے آنہ آنہ پا
کے اپنا وکھرا جھنڈا بنا لیا انجمن دے وڈیرے چھوٹیاں آنے آنے والیاں لال
پیشیاں وچکن لگ پئے۔ تے مولوی صاحب ساڈی انجمن دانان ”انجمن نوںہالان
اسلام کریم پورہ“ رکھیا۔ ایس مولوی توں پہلے اک انھا حافظ ساڈی مسیت اذان
دینداتے نماز پڑھاونداسی۔ جدوں محلے والیاں ایس دیوبند پاس مولوی غلام رسول
نوں امام بنا دتا۔ تے انھا حافظ کئے ای دن مسیت دے بوہے اگے بیٹھ کے اپنا سوٹا
گھماوند ارہیا تے لوکی نماز پڑھن لئی کھوہ پاس دے چھوٹے بوہے راہیں مسیت
آوندے جاوندے پھیر کئی ورھے حافظ گلی گلی چوک چوک کھڑا ہو کے دیوبندیاں
دے غارت ہون دیاں دعاواں منگدا رہیا۔ مولوی غلام رسول نے کریم پورے
دے لوکاں دی آل اولاد دی وی فکر کیتی تے اوہناں نوں قرآن شریف تے چار
جماعتاں پڑھاون لئی اک سکول کھول لیا۔ ہر آخری جمعے جدوں مسیت بھر جاوندی،
نمازی ڈلہہ کے گلیاں وچ اپنے جانماز وچھالیندے تے مولوی غلام رسول اک بڑا
ای لما وعظ کردا۔ ایس وعظ دے اخیر وچ اوہ اک حدیث ضرور سناوندے۔ جیہدا
مطلب ہونداسی جے جیہڑا بندہ دین دی تعلیم لئی اک درہم خرچ کردا اے اللہ تبارک

و تعالیٰ اوہنوں آخرت وچ ستر دینا عطا فرماوند اے۔ پھیر اوہ اپنے سکول دی گل
کرداتے اوہناں لوکاں دے نال پڑھ کے سناونداتے اوہناں لئی دعائے خیر منگدا
جیہڑے ایس بوٹے مطلب جے اوہدے سکول لئی چندہ دیندے سن۔ پھیر اوہ بھیڑا
جیہا مونہہ بنا کے بڑی رونی آواز نال سکول دی مالی حالت بارے گلاں کردا۔ تے
ایس گل داڈرا وادیندا جے جیکر ایس بوٹے نوں پسایاں دا پانی نہ دتا گیا۔ تے ایہہ
بوٹا سک کے ٹنڈ منڈ ہو جاوے گا۔ ایس توں بعد خلیفہ عبد الحمید ایس گل داسرا پھڑ کے
اگے ودھاوندے۔ مولوی صاحب دیاں وڈیاں گناوندے۔ مسلماناں دی کم سمجھی تے
ساتن دھرم ہائی سکول بارے گلاں کردا۔ تے اپنی آواز تے اپنے ہتھان بانہواں
نوں کدی کٹھیاں تے کدی باری باری ورت کے کریم پورے دے وسنیکاں نوں
ڈب مرن لئی کہندا۔ پھیر کچھ لوکی کھڑے ہو کے اپنا اپنا ناں تے رقم ماہانہ چندہ
لکھواندے۔ تے کچھ جیہناں نوں پچھلے آخری جمعے یاد ہوندے اپنے نال لیاے چار
چار آنے اٹھ اٹھ آنے کڈھ کے خلیفہ عبد الحمید دی جھولی وچ پاوندے جاوندے۔
اخیر وچ خلیفہ عبد الحمید اوہی جھولی اسمان ول چک کے قرآن شریف دیاں آیتاں
پڑھداتے مولوی غلام رسول جزاک اللہ کہندا۔ تے باقی دے کل نمازی وی اپنی
اپنی آواز مطابق جزاک اللہ کہندے۔

میں دسیاں ناں جے سانوں وڈیاں کولوں وی ودھا انجمن تے تبلیغ ہوئی ہوئی
سی۔ جوان تے سیانے جمعے دے جمعے جلوس کڈھدے پر ایس اپنا وکھرا جھنڈا بنان
توں بعد ہر روز مونہہ ہنیرے جلوس کڈھن لگ پئے۔ تے فجرے فجرے لالٹین تے
ڈنڈے پھڑکے گاگا کے مسلماناں نوں ایس دنیا دی بے ثباتی یاد دلاوندے تے اپنے
اللہ دے اگے سر جھکاؤن لئی کہندے۔ جس شامیں موتی ظفر دی شلوار پھاڑ کے فیصلہ

میرے حق وچ کردتا اوس توں اگلی سویر منڈے مینوں جگاون نہ آئے تے میرے تیاں ای جلوس دو جیاں گلیاں وچ پھر کے مسیتے جاوڑیا۔ اگلی فجرے تاجے نوں بخار چڑھ گیا تے ہوردو منڈیاں نوں ڈھڈ پیڑ ہو گئی۔ اوس توں اگلے دن وی اوہناں نوں بخار تے ڈھڈ پیڑ رہی۔ سگوں تن ہور منڈے وی بیمار پے گئے تے باقی دیاں منڈیاں بوڑے کھوہ تے سخت نم توں ڈردیاں جلوس نہ کڈھیا۔ ہن ظفر میرے خلاف تبلیغ کرنی شروع کردتی۔ اوہ دیاں کل تقریراں داست ایہہ سی جے ”انجمن نونہالاں کریم پورہ“ دے کل ممبر ایہہ چاہوندے سن جے موتی توں وچ کے اوہناں پسیاں نال نونہالاں لئی وردیاں بنائیاں جاون پر میں کتے نوں غصب کر کے اسلام نوں خطرے وچ پادتا اے۔ پر اوہدی گل نہ چلی۔ سگوں ہن کل منڈے آکے موتی نال کھیڈن لگ پئے۔ سویر دا جلوس تے اکا ای بند ہو گیا سی۔ تے جمعے دے جلوس وچ وی صفائی وغیرہ کر کے مولوی غلام رسول کچھ اڈیاں اچیاں کر کے ٹرن لگ پیا سی۔ تے ایہہ ”انجمن نونہالاں اسلام کریم پورہ“ تے ساڈے سویر دے جلوس اوہنے بناں کسے دے پچھیاں ای اپنے کھاتے پالنے سن۔ سویر دے جلوس دی بندی تے جمعے دے جلوساں وچ منڈیاں دی گھٹ حاضری توں اوہنوں کچھ فکر جیہی پے گئی۔ جدوں ظفر اوہنوں مریج مسالے لا کے گل دی تے مولوی چھیتی وچ اک بے سمجھی کر بیٹھا۔ اوہنے اگلے جمعے انھے حافظ، موتی تے میرے خلاف وعظ کردتا، تے کچھ گلاں انگریزی پڑھیاں ٹوڈیاں بارے وی کر گیا۔ کریم پورے وچ کوئی اخبار نہیں سی چھپداتے لاہور شہر دے اخبار تے سریوں لدھیانے نوں نہیں سیاندے۔ پر کریم پورے دے وسنیک ہمیش ایس گل دادھیان رکھدے جے ہر بندے نوں ہر دو جے بندے بارے ہر کل دا چھیتی توں چھیتی پتہ لگ جاوے۔ ایس بھائی چارے خاطر

کچھناں میرے پیونال وی اوس وعظ بارے گل کیتی۔ مولوی غلام رسول وعظ بڑی اوکھی اُردو وچ کرداسی تے سنن والے ان پڑھ اپنی اپنی سمجھ مطابق اوہداو کھ دکھ پنجابی مطلب کڈھ لیندے۔ میرے پیو کول اوس وعظ دیاں خبراں دکھ دکھ ویلیوں دکھ دکھ مطلب نال دکھ دکھ ویلے اپڑیاں۔ تے کئی دن تیکر تے اوہنوں گل دے سر پیر دا پتہ ای نہ لگا۔ جس دن اوہنوں گل دی سمجھ پئی اوس شامیں میری ماں نوں لون وچ ودھ مرچاں بہانے جھاڑ پے گئی۔ اگلی شامیں مولوی غلام رسول ساڈی گلی وچوں لنگھیا تے میرے پیو اپنے حقے دی نڑی دو جے پاسے کر کے اپنا مونہہ پھیر لیا۔ مولوی وی سلام کیتیاں بناں ای لنگھ گیا تے مغرب دی نماز پڑھا کے دو جی گلی راہیں اپنے بال بچیاں نال جا لیا۔ راتیں پیو میرے فیض ددھ والے دی دکا نوں اپنا ڈیڑھ پاء ددھ ملائی سننے پی کے بچ اتے بیٹھے دو جیاں بندیاں نوں پچھیا جے ایہہ مولوی غلام رسول کیہو جیہا بند اے۔ کسے کہیا بڑی اوکھی وعظ کردا اے۔ کسے کہیا بند اتے بھیڑا نہیں لگدا پر بیوقوف ضرور اے۔ سیلا بولیا کچھ کہہ لوو مولوی بڑا قابل اے۔ سکناں وچ نماز پڑھا کے ویہلا ہو جاندا اے۔ ایس گل تے سارے بندے زور نال ہسے تے پیو میرے کہیا۔ سیلیا تینوں ہمیش مسخری سمجھدی اے۔ توں کدی موقع محل نہیں دیکھیا۔ ہن سارے لوکی چپ ہو گئے تے پیو میرے حقے دی چلم لاه کے اوہدے سوئیاں ہو یاں کولیاں نوں پھوکاں مار مار کے جگاون لگ پیا۔ ایس توں بعد کئی دن تیکر کریم پورے نے چپ وٹی رکھی۔ تے ایس ہم وچ پتہ نہیں انھا حافظ کتھوں آوڑیا۔ اوہ بڑی دیر توں گواچیا ہو یا سی۔ کچھ لوکی کہندے اوہ اپنی بھین کول سر ہند شریف چلا گیا اے۔ پر ہن جدوں گواچے منڈے وانگوں مڑ کریم پورے آیا تے نویں نویں فقرے سکھ کے آیا سی۔ تے اوہ مڑ چوک چوک گلی گلی مجمعے لان لگ

پیا۔ تے مولوی غلام رسول اپنے سکول دے منڈیاں نوں مارن ویلے اپنا ہتھ نرم کردتا۔

اک اتوار خلیفہ عبد الحمید پوکول آیا تے نیانیاں دی صحت سکولاں بارے پچھن توں بعد اللہ بخشے میرے دادے دیاں گلاں کرن لگ پیا۔ ایہہ خلیفہ عبد الحمید ساڈے محلے ولوں کمیٹی دامتبرسی۔ تے ممبریاں اتے ایہوں ووتاں دی بڑی لوڑ ہوندی سی۔ ساڈے محلے احراریاں دازوری۔ میری ماں ولوں سارے ای احرار یے سن۔ تے پیو میرے دائبر مسلم لیکیا سی۔ خلیفہ عبد الحمید دی احرار یا سی تے اوہنے کریم پوریاں نال ایہہ وعدہ کیتا ہویا سی جے وقت پین تے اوہ احرار تے اسلام لئی جان دے دیوے گا۔ پر مینوں لگدا سی جے اوہ بند ایناں چنگا اے جے کریم پورے دی ودھ نفری مسلم لگی ہو جاوندی تے اوہ وی اوہناں دا ساتھ دیندا۔ اگلی شامیں فیض دودھ والا اپنی دکان اُتے اپنے پترنوں بٹھا کے میرے پوکول آ کے حقہ پین لگ پیا۔ تے مینوں موتی دی فکر پے گئی۔ پیو میرے نے فیض دودھ والے دی دکان اتے بیٹھنا بند کر چھڈیا تے اپنا دودھ ملائی سنے گھرای منگوا کے پی لیندا۔ پر ہر شامیں کوئی نہ کوئی نواں بندہ میرے پوکول آ کے بیٹھدا تے نالے ساڈا حقہ پیندا تے نالے کریم پورے دے بھائی چارے تے مسلماناں دی بھلائی بارے گلاں کر کے چلا جاندا۔ اک اتوار خلیفہ عبد الحمید، کریم پورے دے ست اٹھ سرکڈھ بندے فیض دودھ والا تے ساڈا دھوبی ساڈے گھر آئے تے میرے پیونوں نال لے کے ٹرپے۔ ٹردیاں جدوں فیض دودھ والے ساڈا حقہ وی چک لیا تے خلیفہ عبد الحمید کہیا۔ ”فیض ایہہ چنگا کیتا اے۔ بندے ودھ نے تے حقہ گھٹ پے جانے نیں۔ اوس دن خلیفہ عبد الحمید دادالان کریم پوریاں نال بھر گیا تے باقی دے لوکی گلی وچ کھڑے ہو گئے۔ میں تے

کالیا گلی وچ کھڑے بندیاں دیاں لتاں وچ لکی سن دے تے ویکھدے رہے۔ اوس کل اکٹھ وچ نہ موتی دی گل ہوئی، نہ میری، نہ انھے حافظ دی تے نہ ای ظفر دی۔ سویرے دس بجے توں ظہر دی نماز ویلے تیکر ایہہ لوکی محمد بن قاسم، بابر، خالد بن ولید، مال غنیمت دے کپڑے تے حضرت عمرؓ دے لمبے چونے بارے تے غدر وچ مسلماناں دے قتل عام دیاں گلاں کر دے رہے۔ اخیر وچ مولوی غلام رسول ہتھ چک کے تے اکھاں چھت ول کر کے بڑی بھاری آواز نال دعائمنگی۔ امت رسول صلی اللہ علیہ وسلم دی نیک راہی لئی۔ مسلماناں دے اتحاد لئی۔ تے دنیا دے کل مسلماناں دی سلامتی لئی۔ تے ہر فقیروں بعد کل اکٹھ زور نال آمین کہندا۔ پھیر کل لوکی اپنے اپنے ہتھ اپنے اپنے مونہاں اتے پھیر کے اپنے اپنے گھریں چلے گئے۔ تے کجھ لوکی اپنے حقے پچھانن لگ پیے۔

جیہڑا فیصلہ موتی نے ظفر دی شلوار پھاڑ کے کیتا سی ایس پنچایت نے اوہ برقرار رکھیا۔ ہن موتی گھر دے باقی جیاں وانگوں ساڈے گھر رہن لگ پیا۔ تے کدی کدی باہر جا کے کسے کریم پورے دی شلوار تھدی پھاڑ آ وندا۔ بلیاں رکھن والے موتی نوں برا بھلا کہندے پر کبوتر بازاں نوں اوہدا الشکد اکالارنگ، اوہدا گول مول سریر تے اوہدی ڈیڑھ انچ پونچھ بڑی چنگی لگدی۔ موتی کنے ای ورھے ساڈے نال رہیا اوہدا قد کاٹھ ڈیڑھ گٹھ جمع سوادو گٹھ توں نہ ودھیا۔ شروع شروع وچ اوہ بڑا ای نچدا ٹپدا ہوندا سی۔ ہولی ہولی اوہ ست جھیا پے گیا۔ پھیر اوہ عملیاں وانگوں بہتا ویلا سٹا رہندا۔ اک دن اوہنے اپنی پیڑی اُتے سے پیاں پیشاب کردتا۔ ایہہ ٹٹی پیشاب دا کم اوہنے کدی وی ساڈے گھر نہیں سی کیتا۔ ہمیش باہر جاے دو جیاں دے بوہیاں اگے ای کردا سی۔ تے ماں میزی کہیا۔ ”موتی، ایہہ کیہ کیتا؟“ موتی اٹھ کے باہر چلا گیا۔ تن چار گھنٹیاں بعد محلے دے منڈیاں ساڈے گھر آ کے دسیا۔ جے موتی باہر

مریا پیا اے۔ میں اوہناں دناں اپنی چودھویں پاس کر کے شملے نوکری کر داسی۔
میرے چھوٹے بھائیاں تے ظفر تے کالے دے چھوٹے بھائیاں اوس شا میں سپاں
والے سائیں دی قبر دے کول اک ہو قبر بنا دتی۔ ایہہ قبر موتی دی سی۔ کوئی تنان
چونہہ دناں بعد میرے پودی چٹھی آئی۔ اوہدے وچ گھر دیاں ہو رگلاں توں بعد
اوہنے ایہہ وی لکھیا سی جے موتی مر گیا۔ مینوں مڑا وہ دن یاد آ گیا۔ جدوں موتی
نوں گھر رکھن لئی میں رو یا سی میریاں اکھاں اتے اک پانی دا پڑا جیہا اتر آیا پرہن
میں وڈا تے جوان سی۔ تے دنیا ایس گل نوں چنگا نہیں جاندی جے سیانے سمجھدار
بندے رون ویلے روون تے ہسن ویلے ہسن۔ میں چھیتی چھیتی چار پنچ واری
اپنیاں اکھیاں جھپکائیاں تے اپنے اگے پئی فائل دے ورے اتھلن لگ پیا۔

چھٹی

جولی.....

مینوں یاد پیندا اے تیری اک چٹھی آئی سی پر ایہہ یاد نہیں آؤندا جے میں اوہدا
جواب دتا سی یا نہیں۔ پتہ نہیں تیری چٹھی میرے ول لگدی اے۔ یا میری تیرے
ول۔ گل ایہہ جے میں امریکیاں وانگوں کدی چٹھیاں دار جٹر نہیں رکھیا۔ ہاں تے
توں جیہڑی چٹھی مینوں لکھی سی تے جیہدا پتہ نہیں میں تینوں جواب دتا سی یا نہیں اوس
چٹھی وچ توں میرے کولوں پاکستان بارے پچھیا سی۔ سچی گل اے پاکستانوں باہر
جا کے بندے نوں پاکستان بڑا ای یاد آؤندا اے۔ مینوں یاد پیندا اے جے جدوں
میں امریکہ وچ سی تے اک شا میں اک کڑی نال گلاں کر دیاں مینوں پاکستان یاد
آ گیا تے اوہ کڑی میرے کولوں اٹھ کے ایس طرح نس گئی جیویں میں اوہدے
چونڈھی وڈھ دتی ہووے۔ ہن تینوں آپوں پتہ اے جولی جے پاکستان وچ ایہہ کم
وڈے بندے ای کردے سی۔ میں بچارا کس گنتی وچ۔ مینوں تے کوئی بہتا ای دکھ
ہوند اے تے میں کلب چلا جانا آں۔ تے شراب پی پی کے اپنی مت مار لیناں تے

دو بے دن پسیاں دادکھ ہو رو دھ جاندا اے۔ کل شامیں سوچیا جے بھانویں میرا
ڈاکٹر جیہنے مینوں شراب پین دا سٹوٹکیٹ دتا اے۔ پٹ کے کیوں نہ مر جاوے میں اج
ایہہ کم بالکل نہیں کرنا پر نال ای کلب جان دی اک وڈی لوڑ وی آپی۔ ہن توں
کہوئیں گا جے بند اک بھیڑا کم کرن لئی سو بہانے گھڑ لیندا اے۔ رب جاندا اے
جے اجیہی کوئی گل نہیں۔ گل ایہہ سی جے افضل میرے دفتر اک منڈا لے کے آ گیا
جے ایہوں کالج وچ داخل کروانا اے ایہہ کالجاں دے داخلوں میں کیہ ساری دنیا
بڑی تنگ پئی ہوئی اے تے اج کل جے کر کوئی داخلے دی گل کر دا اے تے آ لے
دوالے دے لوکی ایویں اٹھ ٹھڈے نہیں جیویں کے کیہہ دتا ہووے جے شیر آیا۔
ایس سال میری دھی دسویں دا امتحان دتا تے مینوں شام نوں ہلکا ہلکا بخار رہن لگ
پیا۔ جس دن اوہدی نو نمبر اوپر فرسٹ ڈویژن آئی تے میرا بخار ہو تیز ہو گیا۔ گل
ایہہ جے اج کل کالجاں وچ داخلے نمبر اں نال ہوندے نیں۔ بڑے ای اچے نمبر اں
نال تے بڑے اچے نمبر اں والیاں توں گھٹ اچے نمبر اں والیاں نوں دو بے وسیلے
لوڑ نے پیندے نیں۔ بڑے اچے نمبر پنڈاں تے چھوٹے شہراں وچ امتحان دین
والیاں دے ای آوندے نیں لاہور شہر وچ نہیں سیانے ماں پو اپنیاں بچیاں نوں
امتحان ای پنڈاں تے چھوٹے شہراں وچ دواندے نیں۔ لاہور شہر وچ بھائی
چارے والیاں گلاں مک گمیاں نیں۔ پر پنڈیں تھائیں اچے وی لوکی اک دو بے
دے کم آوندے نیں۔ تے جیہڑے بندے اک دو بے دے کم آون رب سچاوی
اوہناں اتے مہربان ہوندا اے تے اوہناں دے بچیاں دے نمبر وی اچے آوندے
نیں۔ دوجی طرح دے سیانے ماں پو اپنی آل اولاد نوں اچے نمبر دوان لئی دوجی
طرح دے طریقے ورتدے نیں۔ مڑ گل او تھے ای اپڑ دی اے جے نمبر بڑے اچے

ہونے چاہیدے نیں۔ بھانویں اچے نمبر لین لئی تہانوں کجھ ای کرنا پوے آخر ایس
دنیا وچ اولاد توں ودھ ہو رکھی شے اے جے کر نمبر اچے نہ ہون تے تہاڈا وسیلہ
ڈھیر تگڑا ہونا چاہیدا اے۔ ڈھیر تگڑے وسیلے نال بھانویں تہاڈا پتر فیل ہونیوں بچیا
ہووے تے اوہنوں فٹ بال تے کرکٹ دے بلے وچ کوئی فرق نہ لگدا ہووے
اوہدا داخلہ ضرور ہو جاوے گا۔ میری دھی نوں لے دے کے سدھیاں لیکاں لائیاں
آوندیاں نیں۔ تے مضمون وی اوہ مصوری دالینا چاہندی سی ہن توں جاندا ایس
لاہور شہر وچ کڑیاں دے کالجاں وچوں دو کالجاں وچ ای مصوری دا مضمون پڑھایا
جاندا اے۔ اوہناں وچوں اک کالج اجیہا اے جیہڑا اوہناں کڑیاں دے مزاج
نال ای میل کھاندا اے جیہناں نال اوہناں دے ماں پو چھوٹے ہوندیاں ای
بھیڑی انگریزی بولن لگ پیندے نیں۔ سدھی گل اے جے ساڈا مزاج ایس کالج
نال میل نہیں کھاندا۔ تے نہ ای ایس کالج دا مزاج ساڈے نال میل کھاندا اے۔ رہ
گیا دو جا کالج۔ میں اپنی دھی نوں بڑا سمجھایا جے ایس مصوری دا کھیڑا اچھڑ۔ کوئی
ہو کر کم دا مضمون لے لے۔ کسے ہو کر کالج وچ داخل مل جاوے گا۔ پر مینوں شک پیندا
اے جے مینوں تے میری اولاد نوں کسے پیر فقیر دی بددعا اے۔ بڑے دن ایدھر
اودھر پھر دار ہیا۔ بڑے لوکاں دے لطیفے سنے۔ تے ہرواری کھل کے ہسیاں بڑیاں
کولوں پاکستان دی سیاست بارے نویاں گلاں سنیاں تے بغیر شک شبہ اوہناں
تے ایمان لیاندا پر میری گل تے کسے نے کھل کے ہاں نہ کیتی۔ اخیر اوس کالج دی
مصوری دی استاد نوں جا سلام کیتا۔ تے مصور برادری دا واسطہ پایا۔ اوس دن
مینوں پتہ لگا جے بعضے مصور کارٹون شاں نوں مصور نہیں مندے۔ پھیر سوچیا گل اخیر
ٹھیک اے ناں۔ ایہہ مصور لوک تے آپس وچ ای اک دو بے نوں مصور نہیں

مندے۔ توں تے اپنی دھی داخل کروانی اے۔ اوس مائی اگوں ڈرائنگ دے امتحان دی کچھ لادتی۔ گھر آکے میں اپنی دھی اگے اک آکسفورڈ ڈکشنری تے اک گجرات دی پیالی رکھ اوہنوں ڈرائنگ تے لادتا۔ تے کول اوہدے میں گھگھونوں اک کرکٹ دا بلا پھڑا کے بٹھا دتا۔ کرکٹ دا بلا ایس کر کے بے ساڈے گھروچ لاٹھی سوٹے قسم دی کوئی شے نہیں اے۔ لے دے کے اک ریڈ یو دا ایریل اے جیہڑا اک تے ایڈالما اے بے کمرے وچ نہیں آسکدا۔ دو بے اوہ موٹیاں کلاں نال چھت اتے گڈیا ہو یا اے تے اوہنوں لاہن لئی مزدور بلانے پیندے نیں۔ ایہہ گھروچ لاٹھی سوٹا نہ ہون دا پتہ سانوں اوس شامیں لگا جس شامیں ساڈی کیمرے والی پٹھلی کوٹھڑی وچ سب نکلیا سی۔ میں ٹی وی تے اک انگریزی فلم دیکھ رہیا سی۔ ٹی وی تے انگریزی فلماں توں دکھ ہو ر کوئی دیکھن والی شے وی تے کدی نہیں ہوندی ناں۔ گھگھو گھبرایا جھیا آیا تے کہن لگا ڈیڈی کوٹھڑی وچ سب اے۔ اوس فلم وچ کچھ بندے دنیا تے انسانیت نوں بچان لئی اک دو بے نوں مار رہے سی تے میں سمجھیا بے کسے سپاہی نوں سب لڑ گیا اے پھیر میرے گوڈے کمبن لگ پئے تے میں سوچ سوچ کے ایہہ فیصلہ کیتا بے رات ویلے سب نال لڑائی اوکھا کم اے۔ ہنے کوٹھڑی نوں جندرا مار دیو۔ سویرے دیکھی جاوے گی۔ وچوں میں ربوں ایہہ منگ رہیا سی بے راتوں رات ایہہ سب جتھوں کتوں وی آیا اے او تھہ ای چلا جاوے۔ تے ایس لڑائی سوٹے بازی توں بچت ہو جاوے۔ دو بے آخر سب وی رب دی مخلوق اے تے رب دی مخلوق نوں مارنا کوئی چنگی گل تے نہیں۔ پر سب داناں سن کے گھروچ سارے اوہناں بیچاریاں سپاہیاں نوں بھل گئے جیہڑے انسانیت نوں بچاؤن لئی اک دو بے نوں مار دے پئے سی۔ گھگھو تے ٹھیک اے پر ساڈے کھروچ پچواک پی

پیدا ہو یا اے۔ جیہڑا ایمان بڑیاں دی ہر گل دی مخالفت کرنا اے۔ اوہ فوجیاں والے بوٹ پا کے آگیا اوہدا پروگرام کلیاں جا کے اوس سب داسر پھین داسی۔ میں اوہنوں روکیا بے اسیں سارے ای چل کے اوس سب دی خبر لینے آں۔ اوس ویلے مینوں پتہ لگا بے ساڈے گھروچ کوئی لاٹھی سوٹا نہیں اے۔ اخیر اسیں دو پتر تے اک پیو کرکٹ دا اک اک بلا پھڑ کے کوٹھڑی وچ گئے تے اوس بچارے سب نوں ماریا۔ مار کے کوٹھڑی باہر رکھیا تے کل محلے والے نوکراں نوں نال لے کے سوٹے پھڑی آگئے تے سپاں دیاں کہانیاں پاؤن لگ پئے۔ میرا نیال اے بے ایہہ سب اوہناں سبھناں نوں سنگھ کے پھیر کوٹھڑی وچ وڑیا سی اوہ دن جاوے تے اج دا آوے اسیں شوٹنگ کی بند کر چھڈی اے۔ جس کوٹھڑی وچ تسیں سب ماریا ہووے او تھہ تسیں رات ویلے کس طرح کم کر سکدے او۔ تے کم ساڈا سارا رات ویلے کرن دا اے۔ دن ویلے بجلی اپنی گھٹ ہوندی اے بے کیمرے دی ماچس دی ڈبی جنی موٹر نوں اک گیرا نہیں دے سکدی رات نوں ساڈھے نوں توں لے کے گیاراں تیکر بجلی ٹھیک ہوندی اے تے اسیں چھیتی چھیتی جنادی کم نکل سکے کڈھ لینے آں۔ پونے گیاراں توں سوا باراں تیکر بجلی ودھ جاندی اے تے اسیں وچ وچ کیمرے دی موٹر بند کر دینے آں۔ تاں بے اوہ سڑ نہ جاوے۔ پھیر سوا باراں توں لے کے سویرے چھو بے تیکر بجلی بہت ای ودھ جاندی اے۔ ایس دا علاج اسیں ایہہ کر دے آں بے اک ہیٹر لا کے کوٹھڑیوں باہر رکھ دینے آں۔ بے بجلی والیاں نوں پتہ لگ جاوے بے اسیں اوہناں نال ایس طرح دھوکھا کر کے اپنا کم کر لینے آں تے اوہ ضرور اپنا میٹر لاہ کے لے جان۔ میرا مطلب اے بے ایس طرح اسیں اپنا کم کر دے سی۔ پر جدوں توں اساں اوہ سب ماریا اسیں اوس کوٹھڑی وچ وڑنا بند

کر دتا اے۔ تے میرا خیال اے جے کوئی کم دا گاہک ٹکرے تے میں اپنا کیمرہ تے
دو جیاں اوٹ پٹانگ شیواں ویچ ای چھڈاں۔ میری دھی دا ڈرائنگ دا امتحان ہو یا
تے مس قریشی کہیا جے اوہنے اچھی ڈرائنگ کیتی۔ پھیر انٹرویو ہو یا تے اوہناں میری
دھی نوں پچھیا جے توں کالج کیویں آویں جاویں گی اوہنے کہیا میرے ڈیڈی کول
اک صابن دانی اے۔ (ساڈے محلے دے منڈیاں میری کار دا ایہی ناں پایا اے)
پھیر اوہناں پچھیا تیرا ڈیڈی کر دا کیہ اے۔ اوہنے کہیا کارٹون بنانا اے تے میری
دھی گھر آ کے کہیا جے داخلہ ہو گیا اے اگلی شامیں میں گھر آیا تے گھر شاں شاں کر دا
سی۔ پتہ لگا جے انٹرویو دے نتیجے دی لسٹ ویچ میری دھی دا نام نہیں سی۔ میں ہن تیکر
سمہناں نوں تسلیاں دیندا رہیا سی جے داخلہ ہو جائے گا۔ فکر دی کوئی کل نہیں وغیرہ
وغیرہ۔ پر اوس شامیں میرا قد گھٹ کے اوس بونے جنا رہ گیا جیہڑا ویسٹرن ہوٹل دا بوہا
کھولدا بند کر دا اے۔ میری اولاد بے سمجھی ویچ مینوں کوئی بہتا ای اچا بندا جاندی
سی۔ اک واری میں پاکستان دے اک صدر نال ہتھ ملایا سی تے میرے پتر اں محلے
دے منڈیاں نال کھیڈنا چھڈ دتا سی۔ اوس شامیں اوہ منڈے باری باری آ کے
میرے پتر اں نوں سمجھدے رہے ”تہاڈی بھین دا داخلہ ہو یا کہ نہیں؟“ اگلے
دیہاڑے میں آپوں کالج گیا جے مس قریشی نال دو گلاں کر آواں کالج دے دو
کھرکاں وچوں اک نوں کچھ بندے گھیرا پائی کھڑے اوہدے نال ہس ہس کے
گلاں کر دے سی۔ دو جا دو گھنٹیاں بعد آیا تے ٹیلیفون کرن لگ پیا۔ میرا بابو جی
بابو جی کہندیاں سنگھ سک گیا پر اوس رب دے بندے نے نہ اوں کیتی نہ آں۔ نہ
میرے ول تکیا تے نہ ای مس قریشی نوں بلاوا بھیجیا۔ باہراک درخت پیٹھ اک
تھانیدار دو اک بندے کٹھے کری دھڑا دھڑا سگریٹ پی جاندا سی۔ ایدھر او دھر کٹھے

دکھ لو کی کھڑے اپنے اپنے متھے اپنے اپنے رومالاں نال پونچھ رہے سی۔ اوس
ساری دیہاڑی میں تھیں تھیں کھان جا کے اپنی بے عزتی کرواندا رہیا تے ساری دنیا
نوں برا بھلا کہندا رہیا۔ اخیر پتہ لگا جے داخلہ تے اوہناں میری دھی دا کر لیا اے پر
اوہناں نوٹس بورڈ والی لسٹ ویچ نہیں سی رکھیا ایہہ کسب کالج والیاں کچھ ہوراں
دیاں دھیاں نال وی کیتا سی۔ چال اوہناں دی ایہہ سی جے جیکر تے کوئی بندہ لسٹ
وچوں اپنی دھی دا ناں غائب دیکھ کے بڑبڑ کر دا چلا جاوے تے اوہدی دھی دے
تھان کسے ہو رو سیلے والے دی دھی نوں داخل کرتا جاوے تے جے کر کوئی بندہ بہتا
ای رولا پاوے پھیر مجبوری اے۔ ظاہر اے اوہناں نوں میری دھی داخل کرنی پئی۔
اوہدی فیس تے میں جمع کرا آیاں۔ پر مینوں ہن تیکر دھک دھکا چھیا لگا ہو یا اے۔
ایہہ افضل بچارا۔ ایہدے کول نہ صابن دانی اے، نہ ایہہ کارٹون بنانا اے۔ ایہہ
مینوں ای وڈا وسیلہ سمجھ کے اوس منڈے نوں پھڑ کے میرے کول لے آیا۔ ہن جے
میں افضل نوں دسدا جے اوہنوں بھلیکھا لگا اے تے اوہنوں اپنی بے سمجھی اتے بڑا
دکھ ہونا سی تے اوہنوں ایس دکھ توں بچان لئی میں کچھ نہ کچھ ضرور کرنا سی۔ پھیر دو جی
گل ایہہ جے بندہ ہور کے نوں ٹرخا دیوے پر افضل نوں نہیں۔ کسی شامیں تیں اپنی
مت بہتی ودھ مار لوو تے اوہ تہا نوں گھر پہچان داتے باقی دا بندوبست کر دا اے جے
تیں ”بڑا گھر بھل آو“ تے اوہ ہس کے ”جی کوئی گل نہیں“ کہندا اے۔ مطلب
ایہہ جے تیں افضل نوں نہ نہیں کر سکدے۔ تے اوہ منڈا جیہڑا نال لیا یا سی بھانویں
اوہدا بھیجتا ہووے بھانویں نہ مینوں افضل لئی کچھ نہ کچھ ضرور کرنا سی۔ مینوں ساڈے
اک رپورٹر اک چٹھی دتی۔ ایہہ چٹھی میں افضل نوں دینی سی۔ اوہنے ایہہ چٹھی
یونیورسٹی دے اک بندے نوں دینی سی۔ تے پھیر افضل اوس بندے دی چٹھی لے

کے کالج دے اک پروفیسر نوں دینی سی۔ پھیر اوس پروفیسر..... مکدی گل ایہہ جے میں افضل نوں چٹھی ضرور پہنچانی سی۔ تے نال ایہہ وی سوچیا سی جے اج دی شام مت نہیں ماری۔ افضل نوں اکوتھاں ملیا جاسکد اسی۔ کلب وچ۔ اوہدے گھر دا کسے نوں پتہ نہیں۔ سوچیا فیض تے اوہدی بیوی نوں کلب لے چلاں۔ اوہناں نوں اک اک کوکا کولاتے آپون اک وڈا چھیتی چھیتی اندرسٹ کے تے افضل نوں چٹھی پھڑا کے ٹر آواں۔ پر جس بندے دی تقدیر وچ جس شام مت ماری لکھی ہووے۔ اوہنوں فیض تے اوہدی بیوی تے نہیں بچاسکدی ناں۔ تقدیر اوس شامیں اوہناں دوہاں نوں انارکلی بھیج دتا تے مینوں کلیاں جا کے افضل نوں چٹھی دینی پئی۔ افضل نوں میں چٹھی دی ترکیب استعمال دس ای رہیا سی جے اوپروں ماجد آ گیا۔ ماجد تے میں اج کل کافی ملدے جلدے رہنے آں۔ اوہ مینوں اپنیاں کل بیماریاں گناہار ہندا اے تے میں اندر خانے خوش ہوندا آں۔ ایس توں پہلے میں ایہہ سمجھدا سی جے رب وی ایڈی وڈی دنیا وچ میں ای سبھ توں ودھ دکھی آں۔ گل ایہہ جے ماجد اج کل بیمار شمار رہندا اے۔ ایہی کوئی ورھا اک ہو یا اوہ بوا سیر دا اپریشن کرا بیٹھا۔ ڈاکٹر اں اوہدا تھوڑا جیہا گوشت کٹ چھڈیا۔ پر اوہدی بوا سیر نہ گئی۔ ہن اوہنوں اپنے گوشت دے نقصان دا دکھ اے۔ تے ایس دکھ پتہ نہیں اوہنوں ہور کئے دکھ لادتے نیں۔ ایہہ دکھ اوہی جان سکدا اے جیہڑا اوہدے کول بیٹھ کے اوہدیاں گلاں سنے۔ جوکی! توں ست سمندروں پار بیٹھا کیویں ایہہ گل سمجھ سکدا ایں۔ اک گل ہور جیہڑی اوہنے پلے نبھی ہوئی اے ایہہ جے اوہ ڈاکٹر جس اوہدا اپریشن کیتا سی۔ انج تے اوہدا دوست سی۔ پر اوہ ماجد دے سریر دی اندرلی حالت بارے اوہدے نال جھوٹ بولداریا۔ ماجد دا خیال اے جے اوہ ڈاکٹر پیشے دلوں

بددیانتی، جھوٹھ تے مکاری دا بڑا وڈا بت اے۔ نال ای اوہ نرساں دے وی بڑا خلاف ہو گیا اے۔ ہسپتال وچ جد تیکر اوہنے اچی اچی رولانہ پایا۔ نرساں اوہنوں دوائی نہ پلائی۔ ایس طرح اوہ اج کل دنیا دے سبھے ڈاکٹر اں سبھے نرساں تے اوہناں توں بچدی کل رب دی مخلوق دے مخالف ہو گیا اے۔ میں ہر واری ماجد دیاں گلاں سن کے اوہنوں ایہہ دسد آں جے ماجد تینوں اکو بیماری اے اوہ اے نقصان دا احساس۔ تینوں اپنے گوشت دے نقصان دا احساس اے۔ توں جیہڑے دیانت داری سچ تے ہور ایس طرح دیاں اوٹ پٹانگ شیواں دے بت بنائے ہوئے سی تینوں اوہناں دے ٹٹن دا احساس اے تے جے کرتوں ایس احساس نوں دلوں کڈھ دیویں تے توں اج چنگا ہو جاویں۔ میں اوہنوں بڑی واری ایہہ دسیا اے جے میں بی۔ اے تیکر نفسیات دا مضمون پڑھیا ہو یا اے۔ میں جولی نوں تا شاں دے پتیاں نال تماشے کر دیاں وی بڑی وار ویکھیا اے۔ اک نفسیات دا ماہر میرا یار بلی اے۔ میرا اک استاد اج کل ورتن والی نفسیات دے محکمے دا پردھان وی اے۔ پر ماجد کدی میرا اعتبار نہیں کیتا تے نہ ای میری گل منی اے۔ اوہنے اپنے نقصان دے احساس نوں اپنے دلوں نہیں کڈھیا۔ الٹا اوہ ایس احساس نوں طرح طرح دیاں سوچاں دی مکھن چوری نال پالدا اے۔ تے اوہدے ایس احساس وی ایہہ احسان لاہن لئی اوہدے سریر اندر بیماریاں وی اک فیکٹری لادتی اے۔ اے جے تیکر ایکسپورٹ پروموشن والیاں نوں ایس گل دا پتہ نہیں لگا۔ میں تے ماجد بڑی دیر تیکر بیٹھے رہے۔ جدوں ساڈا گھریں گھریں جان دا ویلا آیا۔ عین اوس ویلے اک بندہ آ کے ساڈے نال بہہ گیا۔ اوس بندے نوں ایہہ ڈھڈ پیڑ سی جے اوہدی اک کارور کشاپ وچ پئی سی تے دوجی اوہنے کسے ہور تھاں بھیجی ہوئی سی۔ اوہنے دسیا پر

میں ہن بھل گیاں جے کتھے؟ ایہہ بندہ ساڈی کلب دامبر اے تے اک دفتر وچ نوکر۔ ایہدی تنخواہ پتہ نہیں کنی اے پر ایہہ بندہ ایٹا خدا ترس اے جے ایہنے اک غریب نچن گان والی عورت دامیری تنخواہ توں ودھ وظیفہ لایا ہو یا اے تے نال ای اک کارڈ رائیور سنے لے کے دتی ہوئی اے۔ تاں جے بچاری توں بساں وچ دھکے نہ کھانے پین۔ ہن کوئی بہت ای بھیڑا بندہ ہووے گا جیہڑا ایڈے چنگے بندے دے کم نہ آوے۔ میں کہیا فکر نہ کرو جی میں چھڈ آواں گا۔ رب جان دا اے جے جدوں میں اوہنوں گھر چھڈن دی ہاں کیتی سی اوس ویلے میرا مطلب بالکل ایہہ نہیں سی جے میں دو جے دن تیکر بیٹھا رہاں گا۔ میرا مطلب سی جے اوہ اپنا گلاس ختم کر لوے تے میں اوہنوں گھر چھڈ آواں۔ پر اوس چنگے بندے اپنا گلاس ختم ای نہیں ہون دتا۔ اے اوہدے گلاس وچ دوائی مکدی نہیں سی تے اوہ دو جا گلاس منگوا کے اوہدے وچ پالیندا سی تے دوائی وی اوہ سکاٹ لینڈ والی پیندا سی میں تنگ پے کے اپنے لئی اک چھوٹا مری والا ہور منگوا لیا۔ اوس بھائی چاروڈے پی لے۔ ہن افضل تے اوہدے بلی اپنیاں زہرتے سوڈے دیاں بوتلاں اکٹھیاں کرن لگ پئے۔ جدوں اوہناں آخری آواز دتی تے ایس بھائی دووڈے ہور منگوا کے اپنے اگے رکھ لے۔ میری اوس ویلے کچھ اجیہی حالت ہوئی سی جیویں کسے بندے نوں چھ دن اک سو چار ٹمپر پچرہ کے ہنے ہنے بخار بٹیا ہووے تے میں وی اک چھوٹا مری والا منگوا لیا۔ مینوں تے ماجدنوں چپ دے دورے پئے ہوئے سن۔ باغ وچ ڈڈو بولدے سی تے وچ وچ پولیس والیاں دیاں سیٹیاں۔ اک ایہہ بھائی سی جیہڑا ٹرٹر کری جاندا سی۔ جدوں رب دی مرضی ہوئی تے ایہہ رب دا بندہ اٹھیا تے ایہنوں گھر چھڈ کے میں اپنے گھر اپڑیا مینوں ویلے دی تے سرت نہیں سی۔ پر میرا دل کہندا اے جے

اوس ویلے ساڈی مسیت دا مولوی فجر دی بانگ دین لئی وضو کر دا ہونا ایں۔ ٹھنڈا ٹھار لون تے باسی ہوئیاں روٹیاں۔ زہر مار کر کے میں روٹی گلیوں لاہی تے مینوں بڑیاں ساریاں گلاں یاد آ گئیاں۔ ایہہ گلاں میں ورھیاں توں اپنے پلے بنھیاں ہوئیاں سی تے ایہناں کر کے مینوں اچھا راجیہا رہندا سی۔ میں اپنی مائی نوں جگا کے اچی اچی تے چھیتی چھیتی ایہہ کل گلاں اگل دتیاں تے ہلکا ہو کے سوں گیا۔ سویرے اوہنے مینوں جگا کے چاء دتی تے اک پوری پنڈ گلاں دی مینوں سنا کے چلی گئی۔ اوہدے جان توں بعد میں اپنے نال وعدہ کیتا جے ڈاکٹر بھانویں کچھ کہے۔ آج توں دوائی اکی بند۔ پہلا کم داتا صاحب نوں جا کے سلام کرنا اے تے داڑھی رکھ لینی اے۔ پر عادت بناں مینوں پچھیاں بناں میرے جاناں میری داڑھی من دتی کار میری روز دی راہیں لگی مینوں میرے دفتر پچا دتا۔ داتا صاحب مینوں اڈیکدے ای ہون گے۔ تے شامیں سورج چھپیاں تیکر میرے دوائی نہ پین دے وعدے دا کیہ بندہ اے۔ میں ایس بارے کچھ نہیں کہہ سکدا۔ آخر مینوں کوئی غیب دا علم تے نہیں اے ناں۔

ہاں جولی، توں پچھیا سی جے پاکستان دا کیہ حال اے۔ ویکھ گل ایویں ای لی ہو گئی تے میرے کول ہور ٹکٹاں لئی پیسے نہیں اگلی چھٹی وچ میں ضرورتیوں پاکستان بارے لکھاں گا۔

کے پڑھ دیناں۔ جدوں میں چھوٹا ہوندا سی تے لدھیانے وچ تیرتھ رام دا گھڑا کھلدا سی۔ مینوں یاد پیندا اے کہ کسے وی نہ ایہہ گھڑا تے نہ ای تیرتھ رام نوں ویکھیا سی۔ پر ایس اللہ دے بندے تے ایس مٹی دی شے بارے کدے کسے شک شبہ نہیں سی کیتا۔ ساڈا اک دوروں نیڑیوں رشتے داری جیہوں برادری دے کل لوکی سٹے باز کہندے تے پٹھ پچھے اوہدیاں بدخوبیاں کردے۔ اوس بچارے دا اک واری سٹا نکل آیا۔ چنگا چوکھا۔ تے خوش ہون دی تھاں میرے دادے کہیا ”ہن اوہدا کوٹھاوی وک گیا“ جدوں اوہ تے اوہدا ٹبر کرائے دے مکان وچ رہن لگ پئے تے میں اوہناں لوکاں دی سمجھ بھگہ نوں من گیا جیہڑے میرے دادے کوں تعویذ لین آوندے سن۔ دو جا گھڑا مستری حسن دین دی بیٹھک وچ پیا ہوندا سی۔ مستری حسن دین آپوں ہارمونیم بجاندا تے نال پکا گانا گاندا سی تے اوہدے نال فضل ایس گھرے تے ٹھیکا لانداسی۔ فضل اصل وچ بیلداری داکم کرداسی۔ جدوں فساد شروع ہوئے تے اک دن اوہ گھر نہ آیا۔ تے لوکی کہندے کہ سکھاں اوہنوں رکھ وچ وڈھ دتا۔ پر کوئی وی اوہدی پچھ پچھان لئی رکھ وچ نہ گیا۔ اگلے دن جدوں اسیں اپنے محلیوں نٹھے تے ساڈی گلی دے سرے دی نم پٹھ اک کمہاری دی کڑی مری پئی سی۔ تے اسیں اوہدے توں پرے دی ہو کے لنگھدے۔ تیرتھ رام دا گھڑا۔ فضل دا گھڑا۔ کمہاری دی کڑی۔ نہیں کہانی والی گل نہیں بنی۔

جدوں وی میں کہانی سوچداں تے ٹہل ٹہل کے سگرٹ پی کے سوچدا آں۔ ٹہلن نال میری صحت چنگی رہندی اے تے سگرٹ پین نال سگرٹاں دے کارخانے چلے نہیں۔ لوکاں نوں نوکریاں ملدیاں نیں۔ تے ہر دو بجے تیجے مہینے کچھ لوکی سگرٹ لکا کے کوٹھیاں بنالیندے نیں۔ میں سگرٹ دا ٹوٹا سٹن لئی کوٹھیوں پٹھاں

کالیاں اٹاں، کالے روڑ

اللہ بخشے میرا دادا کہندا ہوندا سی کہ پڑھن لکھن نال بندے نوں سُر ت آجاندی اے۔ اودوں مینوں کدے ایس گل دی سمجھ نہیں سی پئی تے سیانیاں نال سوال جواب کرن توں مینوں کئی واری پھینٹی پے چلی سی، ایس کر کے میں ہمیش اپنے دادے دی ایس گل نوں پی جاندا۔ اج کل جس دن اخبار نہیں چھپدا اوس دن میں شام تیکر بے سرتا جیہا پھر دار ہناں۔ تے مینوں اپنا دادا مڑ مڑ یاد آ وندا اے۔ اج فجرے فجرے جدوں میں اخبار وچ ”اج لاہور وچ“ ہون والے کاروباراں دا کالم ویکھیا تے مینوں کانبا جیہا چھڑ پیا۔ اج پنجابی اکٹھ دی مینٹنگ وچ میں کہانی پڑھنی سی۔ کئی مہینیاں توں کسے اخبار چھٹی نہیں سی کیتی پھیر ایہہ کیوں ہو سکدا سی کہ میں مرزے نوں کہانی پڑھن لئی کہہ کے بھل گیا ہو واں۔ گل ایہدے وچ میری بھل دی نہیں سی۔ مرزا رسول بخش دے بھلیکے دی سی۔ اوہنوں ہمیش میرے بارے ایہہ بھلیکھا رہیا کہ میں کہانیاں لکھ لکھ کے گھرے وچ پانداجاناں تے جس دن مینوں کوئی کہانی پڑھن لئی کہندا اے میں گھرے نوں ہلا کے جیہڑی وی کہانی ہتھ آوے کڈھ

جھاتی ماری تے سڑک دے ار لے کنڈھے اٹاں دی پڑی لمی پئی سی۔ اپنے بوڑتوں بے پرواہ۔ پہلے ایہہ اتھے نہیں سی ہوندی۔ ایہدی تھاں گھٹا ہوندا سی۔ تے جدوں کوئی کار یا بس گیوں اتر کے ایس کچے وچ پہیہ پا کے لنگھدی تے دکاندار تے راہی کجھ تے اپنیاں اکھیاں ادھیاں میٹ کے مونہہ اتے ہتھ یا رومال رکھ لیندے تے کجھ گند بکدے۔ پھیر پتہ نہیں کہ کار پوریشن اپنے بھلے لئی یا راہیاں دے بھلے لئی ایہہ پڑی بنادتی۔ جدوں ایہہ پڑی نویں نویں بنی سی اودوں ایہہ بوڑی نہیں سی۔ ایہدے بن توں پہلے میرے گھرتوں کوئی پندراں ویہہ گز پرے پچھواڑ دے محلے دیاں جمعہ دریاں کچے اتے میلا، کوڑا سٹ جاندیاں سن۔ پڑی بن تے اوہ بچاریاں کتھے جاندیاں۔ اوہ پڑی اتے ای ڈھیر لان لگ پیاں۔ پھیر جدوں کار پوریشن دی کوڑے والی گڈ آوندی تے اوہ کوڑے دے نال تن چار اٹاں وی لے جاندی۔ تے ٹرک والا پندرہ ویہہ۔ ویکھو ویکھی ایڈھر اودھرے رہن والیاں دی اپنے بنے بنیرے ٹھیک کر لئے۔ تے پڑی وچ اک وڈا سارا کھپا پے گیا۔ پر کچے کتھے نہیں ہوندے۔ تصویری خبر نامہ طرح طرح دیاں تر قیاں دسد اے۔ پاکستان داجی۔ این۔ پی ودھ کے کتوں داکتے جا پڑیا اے پر میری آمدنی تے خرچے دے کچے وچ جو وادھا ہو یا اے ایہہ جی۔ این۔ پی اودے نیڑے دی نہیں ڈھک سکدا۔ تے جس آہر نال ایہہ ترقی دی راہ تے ٹھیا جا رہیا اے۔ چلو چھڈ والیس گل نوں۔ گل ایہہ کہ ہن بڑی دیر توں میں تے میری مائی ایس کچے دی گل کرنی بند کر چھڈی اے لڑائی جھگڑے والی گل توں بچنا ای چنگا ہوندا اے۔ پہلے جدوں ایہہ پڑی بنی سی تے پڑیوں پٹھ پیل دی گٹھ وچ نہر ویٹھدا سی۔ اوہ اے تیکر اتھے ای ویٹھدا اے۔ اپنے تن ایٹے چلھے کیتلی تے ایس کم توں بچیاں لکڑ دیاں چھلڑاں نال

اپنی روٹی ہانڈی تے چاء بنالیندا اے۔ نہر ودا اصلی نام تے مسلمانی اے پر ایہہ پتا نہیں کہ اوہ اصلی مسلمان اے یا نسلی؟ اودہ نام کیہڑی لسٹ وچ اے؟ تے اخیر اودہ میری طرح کیہ ہونی اے؟ ساڈے احاطے دے نام پاؤن وچ بڑے کاریگر نیں۔ میری پہلی گڈی نوں اوہ سڑکاں کٹن والا انجن کہندے سن تے ہن والی گڈی صابن دانی اے۔ نہر ودا نام اوناں اودہ چٹی کپڑے دی ٹوپیاں توں بنایا سی۔ ساڈیاں ویلیاں وچ دو شیواں ودھ مشہور سن۔ اک ”نہر وواسکٹ“ تے دوجی ”گاندھی ٹوپي“ ایہہ نہر و نہ تے نہر وواسکٹ۔ پاندا اے تے ٹوپیاں ایہدی بالکل ایویں کیویں جیہی اے۔ اک دن فجرے میں گھگھو کہیا کہ ذرا نہر نوں بلا لیا۔ ایہہ بوہیاں دے دو چار کنڈے ٹھیک کروالینے۔ گھگھو کلا ای مڑ آیا تے کہن لگا ”نہر و نہیں آوندا“ گھگھو توں پہلے اک مائی نہر و کولوں باراں آنے داکم کروا کے لے گئی سی تے اوہنوں ودھ پیسیاں دی لوڑ نہیں سی۔ میں بیٹھاں جھاتی ماری تے اوہ اکھاں سیٹی بیٹھاسی۔ اودہ اسنداں والا جنڈرا مار یا ٹیٹا ٹرنک اودے کول پیاسی تے تن ایٹے چکھے اتے کیتلی بھافاں ماردی سی۔ میں اپنی مائی نوں نہر و دے باراں آنیاں تے اپنے باراں سو آں دی گل دسی تے اوہ کہن لگی۔ ”نہر و دے پتر سکولاں کالجاں نوں تے نہیں جاندے ناں۔ اوہ ٹوپیاں دی کپڑے دی پاندا اے۔ تسیں ایہہ قراقلی کنے دی لئی سی؟“ میں کہیا ”کیہڑی قراقلی؟“ کہن لگی ”اوہ جیہڑی الماری وچ پئی اے“ میں ایس قراقلی نوں بالکل ای بھل گیا سی۔ گل ایہہ کہ جدوں میں امریکہ جان لگاتے میرے اک بلی مینوں صلاح دتی ”اک ٹوپیا نال لے جا۔ ایہہ پا کے باہر نکلیا کریں۔ رنگ تیرا چوکھا پکا اے تے بال وی تیرے ولاں والے نیں۔ کتے کوئی چٹا امریکی تینوں کالا امریکی نہ سمجھ لوے“ پاکستان وچ قراقلی پاؤن لئی بندے نوں یاتے

لنڈی کوتل داسوٹ سوانا پیندا اے یا پھیر دو گھوڑے دی بوسکی تے اوہدے نال ہور مہنکیاں شیواں۔ ایس کر کے میں ایس ٹوپو نوں بہت ساری فرنیل پا کے الماری وچ بند رکھدا آں۔ تے کسے جنازے لئی ورتدا آں۔ جنازے دی تہی پنجویں یا ستویں صف وچ میں تے فرنیل دی بوکلے کھڑے ہوندے آں۔

اک دن اک میلے کپڑیاں والا بھائی بال، داڑھی چھڈی، اک بھاری جیہی بوری موٹڈھے ماری ایس پٹری اتے آ کے کھڑا ہو گیا۔ تے کچھ سوچن لگ پیا۔ پھیر اوہنے بوری پٹری اتے رکھ دتی تے آپ کچھ پرے جا کے اپنے فوجی بوٹ دی اڈی نال پٹری دی اک اٹ نوں مارن لگ پیا۔ جدوں ایہہ اٹ ہل گئی تے ایہنوں کڈھ کے ایہدے نال..... دی اٹ نوں مارن لگ پیا۔ ایس طرح اوہنے پٹری دیاں چار اٹاں کڈھ لئیاں ایہناں اٹاں وچوں اک اتے تاں اوہ آپ بیٹھ گیا تے باقی دیاں تن اٹاں چوڑے دارکھ کے اوہنے اک چلھا جھیا بنا لیا۔ پھیر اوہنے اپنی بوری وچوں اک ہور بوری کڈھی تے ایس بوری وچوں اک چمٹا، اک کھجور دی کھھی تے کچھ کولے۔ جدوں کولے سلگ پئے تے اوہنے پہلی بوری وچوں کچھ مکی دے بھٹے کڈھے تے اوہناں دے پڑدے لاہ کے اوہناں نوں اک اتے بھنن لگ پیا۔ اوہدے کولیاں وچ اک اجیہا کولاسی جیہدے وچ رب نے پھل جھڑیاں تے پٹاخیاں دی اک پوری ہٹی بھری ہوئی سی۔ اک نکا جیہا ننگے پیریں منڈا آ کے اوہدے کول کھڑا ہو گیا تے پٹاخیاں تے پھل جھڑیاں نوں بڑے غور نال دیکھن لگ پیا۔ بھائی بھٹیاں نوں بھندا گیا، کولیاں وچوں آتھیاں نکلدیاں رہیاں، منڈا کولیاں نوں غور نال دیکھدا رہیا۔ پر جدوں اوس بھائی دودو آنے بھٹے دارولا پایا تے اوہ نکا جیہا ننگے پیریں منڈا رس کے چلا گیا۔

ایہہ بھٹیاں والا بھائی وچوں ایہا بھیراوی نہیں سی۔ جدوں تھوڑے دنوں بعد اوہنے حجامت کروالئی تاں اوہ اپنے صاف کپڑیاں نال چنگا بھلا بندانکل آیا۔ ہن ہر فجرے اوہدا باراں چوداں ورہیاں دا پتر سائیکل اتے اوہدی ہٹی چھڈ جاندا تے شامیں آ کے لے جاندا۔ بھٹیاں دی بہار مک گئی تے اوہ بھائی سنترے، مالٹے تے مسالے دیاں گڈیاں وچن لگ پیا۔ ہن اوہنے اپنے چھست ورہیاں دے پتر نوں اپنا بھائی وال بنا لیا۔ ایہہ چھست ورہیاں دامنڈا ہٹی سجاونداتے آوازاں لاونداتے۔ ایہہ دوویں بھائی وال اپنے اپنے لنڈے دے کوٹ پائی ہٹی اتے بیٹھدے تے کدی کدی اک دو بے نوں دھپے کھڑے ہون دی باری وی ویندے۔ ایہہ منڈا بڑا سیانا سی تے انج وی نیک لگدا سی۔ میں کہیا کہ ”نیک لگدا سی“ کیوں جو بعضے ٹوٹی جیہناں نوں ویکھ کے شیطان دی پچھلے پیریں نٹھ اٹھدا اے اپنے پیوواں دے نال ہوندیاں انج بن دے نیں جیویں فرشتے ہن ہن اسمانوں اتر کے آئے ہون۔ میں دسیاناں کہ ایس منڈے دا پیو کپڑے دھواں تے نائی دی دکا نوں ہو آن توں بعد چنگا بھلا نکل آیا سی۔ ایس توں وکھ ایہدے وچ کچھ ہور دی اولڑیاں جیہیاں گلاں سن۔ ایہنے اپنی ہٹی اتے نہ تے ایک دام تے نہ ای ”آج نقد کل ادھار“ دے پھٹے ٹنگے ہوئے سن پر ایہہ نہ تے کسے نال ادھار کرواتے نہ ای سودے بازی۔ تے بعضے گاہک جیہڑے مل گھٹ کرایاں بناں سودا لینا اپنی بے عزتی سمجھدے نیں ایس بھائی نوں انج ویکھدے جیویں ایہہ پٹری دی تھاں پاگل خانے ہونا چاہیدا سی۔ جدوں ایہہ بھائی دھپ سکیداں میرے سڑکاں کٹن والے انجن نوں احاطیوں باہر آوندیاں ویکھداتے انجن نوں لاٹکھا دین لئی ذرا کوپرے ہو جاندا۔

ایہہ بھٹیاں والا بھائی جیہڑا ہن مالٹے، سنترے تے مسالے دیاں گڈیاں

وہیچہ اسی ارلی پٹری دھپ سیکدا۔ ایہدے وچ اک غریباں والی مسکینی، مزدوراں والی انکھ تے انسان والی اناسی۔ بن صاحب سلاموں وی ایہہ بھائی مینوں بڑا چنگا لگدا سی۔ پر بھلیکھا سیانیاں سمجھداراں نوں وی ہو جاندا اے۔ مائیاں من من پوڈر مونہہ تے مل کے عمر دیاں لیکاں لکالیندیاں تے بھکھے بندے تہاڈی جھوٹی صلح نوں۔ رب ہو ردیوے کہہ کے اگے لنگھ جاندا اے نیں۔ اک دن کارپوریشن دا ٹرک آیا تے کجھ بھائی اوہدے اتوں چھالاں مار کے اترے تے چھیتی چھیتی ایس بھائی دے مالے، سنترے تے مسالے دیاں گڈیاں کوڑے وانگوں کٹھا کر کے ٹرک وچ لدن لگ پئے۔ پہلے تاں ایہہ بھائی اوہناں نال کجھ بحث کرن لگا۔ پھیر اوہناں دے ہتھ پھرن لگ پیا۔ پھیر اپنے ہتھ اوہناں اگے جوڑن لگ پیا۔ پر کارپوریشن دے بندے بڑی کاہلی وچ سن۔ ایہدا نکا جیہا بھائی وال پتر ایس لٹ وچ مسالے دیاں کجھ گڈیاں اپنی جھولی وچ پا کے پرے کھبے کول چھڈ آیا۔ ہو رگڈیاں لٹن لئی آیتے کارپوریشن دے بندیاں کل کوڑا ٹرک وچ لد لیا سی۔ پھیر اک بھائی ٹرک اتے کھڑیاں کہیا ”اوئے مجید یا!“ تے بانہہ لمی کر کے اوس کھبے ول اشارا کیتا جیہدے کول دس باراں گڈیاں پئیاں سن۔ منڈا بھمیری وانگوں کھبے کول اپڑ گیا۔ اوہ گڈیاں اکٹھیاں کرای رہیا سی کہ مجید اے اوہنوں آ پھڑیا۔ تے اوہدے کولوں کل گڈیاں کھوہ کے ٹرک ول نٹھ آیا۔ بھٹیاں والا بھائی ہن ٹرک والیاں دے گوڈے پھڑ رہیا سی۔ پھیر اوہ اپنی نقلی کھل دی ٹوپی لاہ کے اوہناں دے بوٹاں اتے رکھن لگ پیا۔ جدوں مجید امنڈے کولوں گڈیاں کھوہ کے نٹھیا تے منڈا چبا جیہا مونہہ بنا کے اوہنوں تے ٹرک نوں گھورن لگ پیا۔ جدوں ٹرک ٹر پیتا تے اوہنے مونہہ بھر کے اک بڑی ای گندی گاہل ٹرک والیاں نوں کڈھی مینوں پہلے ای ایس منڈے دے نیک

ہون بارے شک شبہ سی۔ جدوں اوہنے اوہ مونہہ بھر کے گاہل کڈھی تے میں اپنے کٹناں اتے ہتھ رکھ لے۔ پر ساریاں توں ودھ میری بے عزتی اوس بھٹیاں والے بھائی نے کیتی سی۔ اوہنے اپنیاں منتاں، ترلیاں نال تے اپنی ٹوپی دو جیاں دے پیراں تے رکھ کے اپنی مسکینی، انکھ تے اناں نوں تے میری سمجھ تے سیان پنے نوں مٹی وچ رول دتا سی۔ جدوں اوہ ٹرک کچھے ٹھہدا، اچی اچی رولا پاندا تھک گیا تے مڑ آ کے اپنے چانگاں مار دے پتہ دے سراتے ہتھ رکھ کے تے اپنا سراپے گوڈیاں وچ لکو کے بیٹھ گیا۔ ایہہ پیو پتر مینوں پٹری اتے پئی اک کوکدی، کرلاندی گندی پنڈ لگی۔

پتہ نہیں ساڈے لوکاں نوں صفائی نال کیوں اینا دیر اے۔ پٹریاں گند سٹن لئی نہیں ہوندىاں تے نہ ای کھونچے، چھا بڑیاں لان لئی۔ ترقی یافتہ ملکاں وچ لوکی ایہہ کم بالکل نہیں کردے۔ ساڈا ملک ترقی یافتہ نہ سہی پر ساری دنیا سانوں ترقی پذیر تے ضرور کہندی اے۔ تے ساڈا جی۔ این۔ پی ودھ کے کتوں داکتے جا پڑیا اے عید دی شامیں ٹی وی اتے اک مائی بہت سارا جی این پی، میرا مطلب ایہہ کہ سیراں مونہہ سوناتے بڑے ای مہنگے کپڑے پائی نیا نیاں نوں واری واری اپنے کول بلاندی تے اوہناں کولوں اوہناں دے نام پچھدی تے نال ای عیدی دی رقم۔ میری مائی مینوں ٹی وی والی مائی دے گہنیاں دے نام دسن لگ پئی تے اوہناں دے مل بجھن لگ پئی۔ میں اپنی جوان دھی ول ویکھیا تے میریاں انگلاں میتھوں پچھیاں بناں ای میری جیب وچ پئے ٹیڈی پیسے گنن لگ پئیاں۔ میں بڑی واری رسالیاں اخباراں وچ پڑھیا اے کہ بعضے بندیاں بیہوشی دی دوائی سنگھیوں بناں ای بڑے اوکھے اوکھے اپریشن کرائے پر ”سی“ نہ کیتی۔ پر میں بڑا ای بودا بندا آں۔ تے

جدوں ٹی وی والی مائی اپنیاں بڑے ای لمے نو نہاں، والیاں تے مند ریاں بھریاں انگلاں کچھ نیا نیاں دیاں گلھاں تے پھیرن لگی تاں میرے دماغ اتے ایویں ای جھڑیاں پین لگ پیاں۔ میرا جی کہندا اے کہ اوس مائی پروگراموں بعد ضرور اپنے ہتھ دوائی والے پانی نال دھوتے ہونے نیں۔ اوہنے اپنے وال پچھے نوں واہ کے اک بڑا ای وڈا جوڑا بنایا ہو یا سی۔ میری دھی کہن لگی ”نہیں ڈیڈی، ایہہ نقلی جوڑا اے تے پناں نال نہنیا ہوندا اے“ پر مینوں لگدا سی کہ ایہہ جوڑا اصلی اے تے ایہنا وڈا تے اوکھا جوڑا بناون لئی گھٹو گھٹ دو دن تے ضرور لگے ہونے نیں۔ پھیر میں ایس سوچیں پے گیا کہ مائی ایہہ جوڑا کھولے گی کس طرح۔

پچھلے دنیں جدوں منڈے تے پولیس والے آپس وچ اٹ کھڑا کھیڈ دے سن میں ہر ویلے اپنے پتراں بارے سوچدا رہندا۔ پھیر ایہہ منڈے مال روڈوں چل دیاں، دو جیاں سڑکاں راہیں اک دن ساڈی سڑک اتے آ گئے۔ ایہناں شتو گڑیاں وچوں کسے بوڑی پٹری وچوں اک اٹ ہو رکڈھ لئی تے ساڈے گھر دے پیٹھلی دکان وچ کڈھ ماری۔ ایس دکان والیاں اپنی دکان دی مشہوری لئی دکان دے سامنے پاسے وڈے وڈے شیشے لائے ہوئے سن تے ایہناں شیشاں دے پچھے طرح طرح دے بوٹاں، گرگابیاں دا اک اک پیر لشکا، چپکا کے سجایا ہو یا سی۔ ایہناں منڈیاں نوں پتہ نہیں کیوں ہر سرکاری بند اتے ہر سرکاری شے بھڑی لگدی سی پر ایہہ دکان تے سرکاری نہیں سی تے۔ ایس دکان دے شیشے نوں دیکھ کے پتا نہیں کس دا ہتھ کیوں اٹ ول گیا۔ شیشے خانے وچ بوٹاں، گرگابیاں دا کلا کلا پیر پیا سی تے ایہہ منڈے دو بے پیر لوڑن لئی اندر وڑ گئے۔ ایہہ بوٹ وچن والے بھائی مینوں مداریاں دے بھائی بند لگدے نیں۔ تسیں کے دکان وچ جا کے اک پونے

اٹھ نمبر دا، ہلکا براؤن، تن مورییاں تے باریک پہاں والا یا کوئی ہور ایس طرح دا اوکھا جیہا بوٹ منگو تے دکاندار منڈے کوں چوتھے خانے دی اتوں تیجی لائن دا ستواں یا کوئی ایس طرح دا اوکھا ڈبا منگے گا۔ تے ایہہ بالکل اوہی اوکھا بوٹ ہووے گا جیہڑا تسیں منگیا سی۔ مینوں بوٹاں والیاں دی ایہہ جادوگری کدی سمجھ نہیں آئی تے نہ ای ایس گل دی سمجھ ایہناں منڈیاں نوں سی۔ ایہناں کل ڈبے خالی کر چھڈے۔ جیہنوں اٹھ دا بوٹ چاہیدا سی اوہنوں پنج دی گرگابی لہھی۔ ہن منڈیاں نال نیانے سیانے وی رل گئے تے دکان اوہناں لئی چھوٹی پے گئی۔ ایس بھیڑ وچ جے کر کے نے اک ڈبے دے بوٹاں دا اک پیر پایا تے دو بے نے دو جا پایا۔ پھیر کجھناں بہت سارے بوٹ اکٹھے کر کے باہر لیار کھے تے اوہناں وچوں اپنے اپنے ناپ لوڑن لگ پئے۔ تے گڈمڈ ہو رو دھ گئی۔ کجھ منڈیاں ملک تے قوم دی خاطر بہت سارے بوٹ ڈبیاں سنے سڑک دے وچکار رکھ کے اوہناں نوں اک لادتی۔ تے کسے شتو گڑے کجھ خالی ڈبیاں نوں دکان دے اندر ای اک لادتی۔ میں بوہے ماری اپنے پتراں نال اوپرای وڑیا ہو یا ساں۔ مینوں کوئی دو بندے ملن آ جان تے سانوں گھٹو گھٹ اک گلاس تے ضرور کھڑیاں کھڑیاں منگوانا پے جاندا اے۔ جے کر کوئی مہمان آوڑے تے ساڈے گھر اوہدے لئی لیف تے منجی نہیں ہوندی۔ پر اوس دن جدوں دھواں اپر آن لگا تے مینوں پہلی وار پتا لگا کہ ساڈے گھر وچ تے بڑا ای ٹک سک بھریا ہو یا اے۔ پر ساڈے گھڑیاں بالٹیاں وچ پانی نہیں سی۔ اتلی منز لے رہن وچ اک بڑا گھانا ہوندا اے۔ ساڈے گھر صرف سردیاں نوں مونہہ ہنیرے تے شامیں بڑی رات پیاں ای پانی آوندا اے۔ تے اسیں اپنے گھرے، بالٹیاں تے کل چھنے کو لیاں بھر لینے آں۔ سویرے اٹھ و بے تیکر ایہہ کل پانی مک جاندا اے

تے اوس توں بعد جے کر کوئی پین لئی پانی منگدا اے تے میری مائی اوہنوں کھان نوں پیندی اے۔ تے نال ای کارپوریشن بارے وی کجھ بڑ بڑ کری جاندی اے۔ کارپوریشن نوں پٹھلے دکاندار وی تیجے چوتھے ضرور برا بھلا کہندے نیں۔ دکاناں دے نال دی اک گندا نالہ وگدا اے۔ اتوار نوں چھڈ کے ہر روز فجرے فجرے دکاندار اپنیاں دکاناں دی صفائی کراندے نیں۔ تے کل مٹی تے طرح طرح دا کوڑا کباڑ ایس نالے وچ روڑھ دیندے نیں۔ ایہہ نالا کتوں کتوں چھتیا اے تے کتوں کتوں کھلا۔ تے ایس کوڑے کباڑ نوں ایہہ بھیڑی عادت اے کہ ایہہ نالے دی کسے چھتی تھاں وچ پھس کے بیٹھ جاندا اے، نالا ڈکيا جاندا اے۔ اوہدا گندا پانی دکاناں اگے سیر کرن لگ پیندا اے تے دکاندار اچی اچی کارپوریشن نوں گاہلاں کڈھن لگ پیندے نیں۔ میں اپنے پتران نوں اپر رہن تے بالٹیاں تیار رکھن لئی کہہ کے پچھلے پاسیوں پٹھاں اتر گیا۔ اوس دن نالا ڈکيا ہو یا سی تے اک دکاندار اگ بجھان والیاں نوں پن رہیا سی۔ مینوں ویکھ کے کہن لگا ”انور صاحب! ساڈے باران منٹ ہو گئے نیں فائر بریگیڈ والیاں نوں فون کیتیاں اے تیکر نہیں اڑے۔“ تسیں فون کر کے ویکھ لو۔ تسیں تے اخبار نویس او۔ تہاڈے کولوں تے ضرور ڈر جان گے۔ میں اوہنوں کیہ دسدا کہ چودھری جی تہانوں کسے غلط خبر دتی اے۔ اج کل تے محکمہ اطلاعات دا کوئی کلرک کسے اخبار دے ایڈیٹرنوں فون کر دیوے تے ایڈیٹر اٹھ کے کھلو جاندا اے تے اخبار چھاپن والی مشین نوں رکوا دیندا اے۔ میں کارٹون بنان والا کیہ شے؟ میں فون کیتیاں بنا ای سڑک پاسے ول آ گیا۔ بوٹاں والی نوں چھڈ کے ساریاں دکاناں بند سن۔ ایہہ وی صرف شیشے خانے ولوں ای کھلی سی۔ تے ایس شیشے خانے راہیں لوکی انج نیویں ہو کے لنگھدے جیویں ایہہ کسے

بزرگ دامزار ہووے۔ سڑک دے وچکار سلگدے بوٹاں دے آ لے دوالے کجھ منڈے گھیرا پائی کھڑے سن۔ ایہناں منڈیاں وچ کجھ سرکاری بندے وی سن، کالج والے کوٹ پائی۔ ہور ناں نوں تے بھانویں ایہہ کالجاں دے منڈے ای لگدے ہون پر میں ایہناں دی برادری نوں چنگی طرح پچھاند اسی۔ اک دن میں دیر نال دفتر اڑیا تے ساڈے دفتر دے کل بندے مونہہ سجائی پھر دے سن۔ میں پوڑیاں چڑھ کے اپر آیا تے ہوا داناں دے اتے مناں مونہہ لوہا پیاسی۔ تے کجھ سرکاری بندے ایہناں ہتھکڑیاں نوں انج کھڑکاندے سن جیویں ایہہ دکاؤ مال ہووے۔ میں چھیتی نال اپنے کمرے وچ جاوڑیا۔ ایہناں سرکاری بندیاں وچوں اک نے میرے چتر اسی دے سٹول اتے قبضہ کیتا ہو یا سی۔ پتا نہیں کس سرکار نوں مخبری کیتی سی کہ ایس اخبار دے دفتر وچ اسلحہ تیار ہوندا اے۔ تے سرکار ملک تے قوم نوں بچان لئی ایس اخبار اتے قبضہ کر لیا۔ اوس دن سرکار نے لاہور شہر تے آ لے دوالے دے کل علاقیاں دے کل سرکاری بندے ساڈے دفتر بھیج دتے۔ ایس توں پہلے میں ایہناں وچوں چوکھے سارے بندیاں نوں لاہور دیاں سڑکاں اتے آواگون پھر دیاں ویکھیا سی پر مینوں کدی وی ایہناں اوتاں اتے سرکاری بندے ہون دا شک شبہ نہیں سی پایا۔ اوس دن کنٹین دے چلھے ٹھنڈے سن تے میں باہروں کسے نوں چاء لیاں دا کہن لئی اپنے کمریوں نکلیا تے باہر شیخ اپنے مونہہ اتے پیلا رنگ ملی کھڑا سی۔ میں کہیا۔ ”شیخ صاحب! طبیعت تے ٹھیک اے؟“ کہن لگا ”جاء جا کے اپنا مونہہ شیشے وچ دیکھ“ میں شیشہ تے نہیں دیکھیا پر سوچیا شیخ میرے مونہہ بارے ٹھیک ای کہندا ہونا اے۔ شیخ کدی جھوٹھ نہیں سی بولیا۔ تے جیہڑا بند ا جھوٹھ وی نہ بول سکے اوہ بمب کیویں بنا سکدا اے۔ سرکاری بندیاں توں ودھ نہیں تے گھٹو گھٹ اونے کوہر طرح

دے اوپرے جیسے بندے وی اوس دن ساڈے دفتر وچ سیر کر دے پھر دے سن۔
ایہناں دے ہتھاں وچ بڑے پھلے ہوئے تھیلے سن۔ پہلے میں سمجھیا جے ایہناں
تھیلیاں وچ بمب ہن۔ پر نہیں۔ ایہناں بندیاں وچوں س بھناں نوں میں پچھان
داسی۔ ایہہ لکھاری قسم دے لوکی سن۔ ایہناں وچوں کجھناں دے جواب مضمون
جو ہڑکانہ سانگلہ ہل تے چچو کی ملیاں جیہاں تھانواں دے رسالیاں وچ چھپے سن۔
تے باقیاں دے مضمون ایڈیٹراں جدی پشتی دشمن کر کے نہیں چھاپے سن۔ ایہہ کل
بھائی اپنے کل چھپے تے ان چھپے مضمون بڑے بڑے تھیلیاں وچ پائی ساڈے دفتر
دے برانڈیاں وچ پیلاں پاوندے پھر دے سن۔ ایہناں نوں ویکھ پتا نہیں کیوں
مینوں گر جھاں یاد آ گئیاں۔ پر جیہڑا سرکاری افسر سرکار نے ساڈے اتے لایا سی اوہ
بڑا نیک سی۔ اوہنے سانوں ساریاں نوں اکٹھیاں کر کے کہیا کہ تہا نوں چتا کرن
دی کوئی لوڑ نہیں۔ اخبار چھپدار ہووے گا تے تہاڈیاں نوکریاں برقرار۔ دو بے
سرکاری افسرکاں، کاں کر دے اوہدے چھپے پے گئے۔ اوہ جٹ تے نہیں سی پر اپنی
گل اتے اڑیا رہیا اوہدا کہنا سی کہ جیکر ساڈی تھان ہو رہندے رکھ لے گئے تاں لوکی
کہن گے اخبار سرکاری ہو گیا اے۔ تے کیوں نہ ایہناں بندیاں کولوں ای اوہ کم لیا
جاوے جیہڑا سرکار چاہوندی اے۔ ایس طرح سرکار وی خوش تے سرکار دی رعایا
وی خوش۔ اخبار دا اصلی مالک مقدمے لڑن لگ پیا۔ پر جدوں وی سرکار نوں
انصاف دا ڈر پیا اوہناں اک مارشل لارگیولیشن ہو رلا دتی۔ ایس طرح پتا نہیں۔
سرکار نوں کتے درجنوں ریگولیشناں گھڑنیاں پیاں۔ جدوں ریگولیشناں دیاں اٹاں،
روڑیاں انصاف دے کل بوہے بند کر دتے تاں اوہ بھائی مر گیا۔ شامیں میں تے شیخ
دفتر وں نکل کے جد ہال روڑ تے پہنچے تاں ایہناں سرکاری بندیاں وچوں کجھ ساڈے

کول دی ہو کے لنگھے۔ تے پھیر کے گل تے بڑے زور نال ہسن لگ پئے۔ نکلے
ہوندیاں جدوں وی مینوں تاپ چڑھدی سی میں رات نوں بڑے زور نال چیرکاں
ماردا جاگ پیندا سی۔ اوس دن وی مینوں انج لگا جیویں میں اوسی ہنیر گھپ، بن
بوہے گیند ووانگوں گول کرے وچ وڑیاں آں تے چڑیلاں دے ہاسے تے چیرکاں
ایس ہنیرے دیاں کالیاں کندھاں نال ٹکراں ماردیاں میرے چار چو پھیریوں
لنگھیاں نیں۔ جدوں ایہہ چیرکاں، ہاسیاں داتا نا بانا کیا جاندا تے میرا ساہ گھٹیا
جاندا اوس ویلے میں چیرکاں مار کے جاگ پیندا تے ماں میری مینوں چھاتی نال
لا کے واری واری جاندی۔ جدوں اک پولیس دی جیپ آئی تے سلگدے بوٹاں دا
گھیرا ڈرا کوپرے ہو گیا تاں جے جیپ لنگھ جاوے۔ دکانداراں اوس جیپ نوں ہتھ
دے اشارے کیتے تے نال اوس لٹ دی دکان ول۔ پر جیپ وچ بیٹھا تھانیدار
سانوں کجھ ایس طرح ہتھ ہلاندا لنگھ گیا جیویں اوہ ساڈا بڑا ای جگری یار ہووے۔
بوٹاں دی دکان وچوں دھواں نکلدار ہیاتے میں نال دی دکان دے اک وچن کار
نال موسم بارے گلاں کرن لگ پیا۔ ہولی سبھ میں بوٹاں دی دکان اگے اپڑ گیا۔
میرے پتر اپروں مینوں بٹر بٹر تک رہے سن۔ مٹے شیشے خانے وچوں میں جھاتی ماری
تے دکان اندر بڑا دھواں بھریا ہو یا سی تے ایس دھوئیں وچ لوکی ادھیاں میٹیاں
اکھیاں نال انج ایدھرا دھردیکھ رہے سن جیویں اوہ اپنے گواچے پتر لوڑ دے ہون۔
شیشے خانے راہیں اک جوان جیہڑا منڈا اپنی پتلون دیاں جیہاں وچ ہتھ پائی باہر
نکلیا تے مینوں دیکھ کے اوہنے اکھیاں نیو یاں پالیاں۔ اوہ اپنی ایس گل توں پھڑیا
گیا۔ میں کہیا ”کا کا! پھڑیاں ایس منڈے نوں“ کا کے، میرا مطلب ایس پتلون
تے نیو یاں اکھیاں پائی منڈے اک بچہ بھری نظر میرے دل ماری تے میں کہا

”ہاں، ہاں، پھڑیں ایس حرامدے نوں۔ ایس عمرے ای لٹ مار کرن لگ پیا اے۔ بڑے ہو یاں پتا نہیں کیہ کرے گا۔ ایس پتلون والے منڈے توں پہلے اک نکا جنامنڈا اپنی جھولی وچ چھ، ست پیر بوٹاں، گرگابیاں دے پائی دکان وچوں نکلیا سی پتلون والے منڈے اوس نکلے جنے منڈے دے چیر کڈھ ماری تے نکا جنامنڈا چھیتی نال اپنی جھولی خالی کر کے نٹھ گیا۔ پتلون والے منڈے اوہ پنج ست پیر بوٹاں گرگابیاں دے اپنے پیراں نال اکٹھے کر کے کندھ نال لادتے۔ پتلون والا منڈا میرے نال ہو گیا سی۔ تے اوہ وچن کار جیہدے نال میں موسم بارے گلاں کیتیاں سن اوہ وی آ کے میرے برابر کھڑا ہو گیا تے میں بڑی جی داری والی آواز بنا کے کہیا ”پتا نہیں مسلماناں نوں کیہ ہو گیا اے؟ کجھ لوکی میرے ول دیکھن لگ پئے“ لوگو، ایس قوم دا کیہ بنے گا؟ کجھناں دے ہتھوں بوٹ گرگابیاں ڈک پیاں اسلام تے لٹ مار دا سبق نہیں دتا۔“ سلکدے بوٹاں والے گھیرے کن کھڑے کر لئے۔ قوم تے ملک دے مال نوں اجاڑنا تے اسلام نہیں دیا۔ مسلمانو، تہانوں کدوں سرت آوے گی۔ تہانوں ستمبر دی جنگ بھل گئی اے۔ اوہناں شہیداں دا خون.....“

لوکی لٹن دی تھاں بوٹ گرگابیاں اکٹھے کر کے اک پاسے ڈھیر لان لگ پئے۔ سلکدے بوٹاں دا گھیراٹ گیا۔ منڈے ہولی ہولی کھسک گئے۔ کالجاں دے کوٹ پائی سرکاری بندے نٹھ کے میرے سامنے آ کھلوتے تے اپنیاں ڈائریاں بھرن لئی بڑے دھیان نال میریاں گلاں سنن لگ پئے۔ پرہن تقریر دی لوڑ نہیں سی رہی۔ لوکی کھلے بوٹ گرگابیاں اکٹھے کر کے لٹن والیاں نوں اچی اچی گالاں کڈھن لگ پئے۔ میرے پتر بالٹیاں لے کے بیٹھ اتر آئے۔ اوہناں لوکاں جیہناں پہلے دکان لٹی سی پھیر کھلے بوٹ گرگابیاں اکٹھے کر کے لٹن والیاں دیاں مانواں بھیناں

بارے بھیڑیاں، بھیڑیاں گلاں کیتیاں سن ہن میرے پتر اں کولوں بالٹیاں پھڑلنیاں تے ڈکے نالے دے کندھے پائی نال اک جھان لگ پئے۔ میرے گونڈھی دانو کر اک چادر لے آیا تے اوہنے کل بوٹ گرگابیاں دی اک گھڑی بنا کے دکان اندر اک نکرے لادتی۔ لوکی اک اک، دو، دو کر دیاں اپنی اپنی سوچ سوچیاں اپنے اپنے گھریں ٹر گئے۔ جدوں ریڈیواتے کر فیو دا اعلان ہو یا تاں میں اپنے پتر اں نوں لے کے کوٹھے چڑھ آیا۔ اج پڑی دی اک اٹ ہو رگھٹ گئی سی۔

بوٹاں دی لٹی بلی دکان دے سامنے تے میرے گھر دے بالکل پیٹھ فوجیاں دی اک کنوائی آ کے کھڑی ہو گئی۔ گھراں والے تھیلے پھڑی آئے دال دیاں دکانان ول تے دکانوں گھراں ول ٹھن لگ پئے۔ تے میں اپنے لئی سگرٹاں دا شاک پالیا۔ کنوائی چلی گئی تے پولیس دا اک ٹرک آ کے پرلے چوک وچ کھڑا ہو گیا۔ کر فیو شروع ہو گیا تے لوک ایس ٹرک توں پرے دی ہو کے اپنے گھریں ٹھدے گئے۔ میں اپنے کوٹھے اتے کھڑا سگرٹ پیندا گیا۔ اک بابو جیہا بند اپنی پتلون دیاں جیہاں وچ ہتھ پائی اپنی پتلون دی استری نوں دیکھدا تے اپنے کالے بردار بوٹاں اتے پئے گھٹے نوں گھوردا ایس ٹرک دے کول دی لنگھیا۔ ٹرک وچ اک حوالدار تے کجھ سپاہی کھڑے سن تے پڑی اتے اک تھانیدار تے دو سپاہی۔ جدوں ایہہ بابو جیہا بند ٹرک تے تھانیدار دے کول دی لنگھ گیا تے پتا نہیں کیوں تھانیدار نوں اچھا کر فیو دا وقت یاد آ گیا۔ اوہنے آواز دے کے بابو نوں روک لیا تے اوہنوں ٹرک اتے چڑھن لئی کہیا۔ اوس بابو پتا نہیں کجھ نہ نکر کیتی ہوئی اے کہ قانون دی پینت برس پئی ایہہ بابو مینوں کجھ اجیہے بابو آں وچوں لگدا سی جیہدے اپنے اکلے سوٹ نوں دن وچ دو داری استری کر کے نکلدے نیں تے جیہناں کول سکوتر ہوندے نیں اوہ اپنے

سکوڑاں دے پچھے اپنی مائی تے دواک نیانیاں نوں تے اک نوں اگے کھڑا کر کے مال روڈ دی سیر کراندے نیں تے گلبرگ دیاں کوٹھیاں دکھاندے نیں۔ اوس جھلے بابونوں کوئی پچھدا کہ اک تے توں کر فیو توڑیا، دو جے تھانیدار نال اوکھا بولیا۔ تے ہن مار کھا کے وی ٹرک اتے نہیں چڑھدا۔ پھیر دو سپاہیاں اوہنوں کلاوا بھر کے ٹرک وچ سٹ دتا۔ ٹرک دے سپاہیاں چھیتی اوہنوں قانون دا آکھاننا سکھا دتا۔ تے اوہ ٹرک وچ دو ہرا جیہا ہو کے انج لما پے گیا جیویں نم پیٹھ کمہاراں دی کڑی پئی سی۔

کمہاراں دی کڑی گھرے، بھٹیاں والے، پٹری دیاں اٹاں۔ مینوں پتا اے اکٹھ والیاں کہنا اے کہ ایہہ اٹاں، روڑ کیہ اکٹھے کر چھڈے نیں۔ اٹاں، روڑاں نال کدی کہانی بنی اے۔ کجھناں ایہہ وی کہنا اے کہ ایہہ کہانی نہیں، ایہنوں کجھ ہو رہا کہہ لو۔ تے جیکر اوہ بھائی وی اج آیا جیہو ہمیش گل شروع کرن لکیاں کہند اے ”پردھان جی، مینوں تے ایہدے وچ کوئی شے نظر نہیں آندی“ پھیر مرزیا، ویکھ میں تیری گل رکھن لئی جو سریا لکھ لیا یاں۔ میرے کول ایہو ای اٹاں روڑ نیں ایہہ میں آپ نہیں گھرے۔ جیہو ی گل مینوں اٹ وانگو و جی میں اوہنوں چک کے جھولی وچ پالیا۔ تے جیہو روڑ مینوں چھیا اوہنوں اکھاں نال لایا اے۔ ایہہ اٹاں، ایہہ روڑ تیرے سامنے نیں مرزیا۔ توں اج میری لاج رکھنی اے۔ ویکھیں کتے توں وی ادھی نہ کریں جو بھٹیاں والے بھائی میرے نال کیتی سی۔